

Василий Лодыгин



Сыктывкар  
2012

ББК 84(2Рос=Коми)  
Л70

*Издано при финансовой поддержке  
Агентства Республики Коми по печати и массовым  
коммуникациям в рамках долгосрочной республиканской  
целевой программы «Сохранение и развитие государственных  
языков Республики Коми (2010-2012 годы)»*

**Лодыгин В.Г.**

Л70 Чибльӧг: Кывбуръяс, серпасъяс. – Сыктывкар: ООО «Ан-  
бур», 2012.– 192 л.б.

ISBN 978-5-91669-075-0

Василий Лодыгинлӧн тайӧ аслыспӧлӧс книгаын вӧр-ва йылысь кывбуръяс да серпасъяс. Наясь тыдалӧ гижысьлӧн аслас чужан му дінӧ пыдӧстӧм да помтӧм муслун. Тайӧ книгаыс абу серпасалӧм, а ыджыд да пӧсь сьӧлӧмӧн висьтасьӧм, кызди тай пӧся аттьӧбалӧмӧн висьтасьлан му вылын меддона мортлы – муса мамлы. Кызди шулис ӧти кывбурын асланым жӧ ыджыд поэт Тима Вень, тайӧ кӧрышас «абу прӧстӧ сідз найӧс (кывъяссӧ – *ред.*) лӧдӧма, сэтчӧ пуктӧма мый меддонаыс».

Тайӧ книгаыс став арлыдалы. Сійӧс окотапырысь лыддясны и верстӧ морт, и ыджыд олӧмӧ пырысь, и парта сайын на пукалысь. Торйӧн нин лӧсялас сійӧ школаын велӧдчысьяслы, кодъяс мед эскӧ гӧгӧрвоисны, мый вӧр-ва – абу сӧмын тшак да вотӧс, звер да пӧтка, чери да ва, но и медся ыджыдасӧ олӧмлӧн подув, татчӧс войтырлӧн оласног, миян ставыс.

Юӧй поэтлӧн чибльӧгысь сӧстӧм ёль кодъ поэзиясӧ, горшныд веськалас, сьӧлӧмныд бурмас.

**ББК 84(2Рос=Коми)**

ISBN 978-5-91669-075-0

© Лодыгин В.Г., 2012

© Оформление. ООО «Анбур», 2012

## ВОДЗКЫВ ПЫДДИ

**Ч**ужан – и синъясыд вочасөн велаласны югыдас, а сэсса и кутан аддзыны, мыйяс эмось вольной светас. Дерт жö, медводз весьтад копыртчöм мамтö, кодлысь чурскан чöскыд йöла нёнсьö. Сэсса казялан чой-воктö да мукöдöс, кодъяс бергöдчöны керка пытшкын.

Моздорын на петкöдасны ывла вылö (а тэнö петкöдасны гажа лунö) да синъясад нэм кежлö колясны и шондыслөн небыд зарниыс, и енэжыслөн югыдлöзыс, и керка мышыввса вöрыслөн уна рöма мыгöрыс. Коркö да мамыд, моздорас жö на, нулас ю кыр йылö да аддзан нöшта öти чуймöданатор – дзолядырйи медся ёна кыпыд лов сетысьöс – галя изъясөн ворсысь юöс. Вöрыс да ваыс и лоасны тэныд нэм чöжыд олан гажөн.

Дзолядырйиыд ордымъясыд дженъыдöсь. Аскод-дöбмыдкöд зэв нин котöртлан матысса раскö ли ягö вотны чöд да тшак, лэччылан вала туй весьтысь лэптавын гуринаясöс. Изъя под вылас найö унаöсь: чöвтан и лэптан, чöвтан и лэптан. Латкаын йöv сорөн пачö скойласны да артмö зэв чöскыд сёянтор, кывтö нылыштан.

Быдмыштан да кор синъясыд кутасны нин донъявны нывкаяслысь мыгöръяссö, сэк и кокъясыдлы уджыс лоö унджык, найö нуласны сэтшöм ягъясö да расъясö, кодъяслысь водзтi кивлiн сöмын нимъяссö. Тöдмасын да найö нэм кежлö лоöны матыс ёртъясөн асланыс ёльясөн да чалльöгъясөн, вөр керкаясөн да чомъясөн.



Вочасөн велалан лыддыны вөрса книга, кытчө гижөма да серпасалөма войвыв вөр-ва да сәні олысьяс йылысь дзик ставсө. Сійөс колө төдны бура. Оз кө юрад пыр, весиг бипурыд оз öзйы, ноппыд лоө куш, и чукуль-мукульыс мөдарө нуас.

Ёна бур, эм кө тэнад бать да нөшта кыйсьысь либө көть нин вөр-васө радейтысь. Сійө тэнө велөдас быд-торйө, мыйө велөдліс батгыс, да мый слөймис төдмавны ачыс. Мыйкө да артмас дзик аслад. И тэ коркө да велөдан ассьыд челядтьө. И тадзи лоө век, кытчөдз кутчысьяс му вылын олөм.

Вөр-ва – мортлөн медбур ёрт. Вермас лоны сідз, мый коркө да медматыс мортыд кисө оз мыччы, а вөр-ваыд дзик век отсалас, дзик век шогтө юкас. Бипур дорын пукуштан, сьөлөм дорад пөсь чайсө юыштан, и то лов вылад лоө кокниджык. А лун-мөд кө көть нин чомйын олан да кытсюрө кытшлалыштан, дзикөдз бурдан.

Вөр-ва кыпөдө борд вылө оз сөмын пөткаөс, но и мортөс. Буретш да сьлөн сямьсь да этшысь, гажысь да мичысь петөны поэтъяс да композиторъяс, серпасасьысьяс да киподтуя вөчасьысьяс. Быдөн шуас, мый сійө – чужан мулөн быдтас.

Овлө, мый морт янсавлө аслас берегысь. Йөзын олігөн сійө и мөвп, медым өдйөджык эськө бөр воны гортө, сывйыштны муса мамөс да Есенин моз еджыд платтьөа кыддзөс. Медыджыд шуд – аддзыны ассьыд өшиньяс, сувтны аслад рөдвуж паса чөс туй вылө, тэчны ассьыд сыланкывъяс.



---

*Тани олө шоньд руйн  
Нэмсө бордъя коми йоз*

---



\* \* \*

*Лымсьыс еджыд чужан муёй,  
Енэж рөмсьыс сійö лөз.  
Тані олö шоныд руөн  
Нэмсö бордгя коми йөз.*

*Пожөмгясысь ывла биа,  
Турунгясысь сійö веж.  
Чужан мусö ныла-пия  
Некор мөд ывлö оз веж.*

*Гудөкгясысь ывла мыла,  
Мича нюмысь сійö пөсь.  
Чужанінын олам-вылам,  
Сы вöсна и шудайсь.*

## ЁГОР ЧӨС ТУЙ ПОМ

Гажа ягыс тані помасьö джуджыдсьыс-джуджыд нöрысөн. Воч ю друг чегö дзык ки кусынь моз, сетчö лунвылö. Вабергача кургья артмөма. Горув лэччөм пыдди муткырасьысь ваыс талапöлөдыс мөдарö визула. Кокни кулөмтö оз и позь вöйтны – лэптö, чериыд оз пысась, улітыс мунö. Содтöд груз лоö кöртавлыны. Ме свинечысь вöчавла.



Деревнясянь верст куим бура татчөдз лоо. Мыйла буретш тани Ёнтип Ёгорлөн лэч туйыс помасьлөма, а абу водзө деревнялань мунөма? Юавлі сійөс ыджыд батын шуысь Ёльөксан Ёльөксеялысь, аслам дядьлысь, но стөчасө висьтавны эз куж. Гашкө пө, ю пөлөнтіыс кодлөнкө вөлі нин лэч туйыс да, быть лоис гортсянь ылынкодьсө помавны. Ёндрей Павел да Ёльөксан вокъяслөн тай таысь на ылынджыкөсь.

Тадз ли абу, но ёна гажа местаыс. Көнкө, петас вөлі Ёнтип Ёгорыс тайө кыр йылас да быть пуксьыштлас, шойччыштас да нимкодясьыштас гөгөрнас. Ме тай, тать-ясті өні тапъяла да, век кокөс веськөдышта-а. Зэв лөсьыд шойччанін вөр бөрся видзөдысьяс вөчлөмаөсь, да кутшөмкө омөль тай первой лэбулыслысь вевтсө чашйис, а сэся и ставнас бипурийөн сотіс. Кутшөм лөсьыда эськө олім, эз кө татшөмъяссө кут муыс. Найө өд и гусясьөны, тышкасьөны, мырдөналөны, виөны...

Но шыбитлам юрысь гажтөмсө. Вөрыс сьылө? Сьылө. Ваыс сьылө? Сьылө. Нопйөй абу куш. Абу. Мый нө ещө меным колө?! Часлы, сэся ю кузяыс кылөдча да курьяясысь кулөмъясөс видлала. Енмыс, көнкө, черисө сетыштас жө.

Гашкө, ме моз и Ёнтип Ёгорыс вөчліс: чөс туй вывсьыс петліс да чери кыйигмоз жө кылөдчыліс?



*Кык өшинь костын сімөм пельсь,  
А вөлі коркө биа гөрд.  
Ме век на эськө вөрөд кельсь,  
Но сэся пельсьсө ог йөрт.*

*Өд вөля ставлы медся дона,  
И мича пельсьыслы тиөтш.*



*Мед олө вөсни чальяс помас  
Да синмө усьө гажа көдж.*

*И таво пельсь молля сикөтши  
Ме тэд ог козьнав, вид көть эн.  
Вай коркө весьөпөрт нин дзикөдз  
Да шудсө ачыл козьнав мен.*

## БИА ТӨВ

**Н**о и вермис жө таво арыс шөтны пельсьөн. Вө-рыс вөлі эз вөрөн, а советскөй кадысь Первомай дырся демонстрацияөн – кумач вылө кумач.

И өні на, төв шөрнас, гөгөр сярвидзөны биторъяс, мед шонтысисны пармаын олысьяс да сэтчө волысьяс. А гашкө, найөс вөрса тун өзталіс сы могысь, мед казяліс Ен, чөвтліс видзөдлассө Коми мулөн эрдъяс вылө да отсаліс дзикөдз гөльмөм йөзлы?

Шулөны, мый пелься төв – пөтөса төв. И съөладозмөрлы эм мыйөн пөткөдчыны, и кунича коддьом радейтө чөсмасьны пельсьнад. Весиг көч. Со тай лымсө юждымөн тапъялөма, съөкыдысла нюгыльтчөм да лымийөдзыс судзөм гөрд розъяссө пасьвартөма, быттьө кодлыськө вир перйөма. А съөлаяс вывсянныс судзөдчөны-кокалөны, некутшөм кок туй абу. Пуясулын чирсөмыс – быттьө бипурйысь разөдөм посни өгыръяс.

И ме чөсмася. Көдзөдө вомтө кын моллыс, но надзөникөн сылө жө. Вом курдө, но колө жө өд витаминьс! Ме и пожөм лыс коддьөмсө чукчи моз курччавла. Колө жө быттьө вом көр вылө.

Гашкө, поводнөя муткыртөм нин веж саридзын ме чукчи и эм да? Вежөртышта мыйсюрө да, эз на лыйны койт вылысь ни джуджыд пожөм сайөдысь. А гашкө,



медбөръя нин аслыспөлөс сьылөмнам, да сы вöсна видзöны. Йöзыд тай сьөлөмнас кылө жö. Налы тай ок на и ёна лöсялө сьылөмыс, медтö сöмын лöсьыда сьылісны-босьталісны, а эз лөкгоршөн горзыны парма пасьталаыс.

\* \* \*

*Абу öшинь улас дзоридз,  
Абу öшинь улас пу.  
Керка сьлөн, быттьö корысь,  
Эм ли абу олан ру.*

*Кыдз нö эськö мортыс олö,  
Оз кö аддзы синлы мич?  
Меным этша вылө колö  
Кöть нин катшасинма видз.*

*Но а медым сьөлөм сьыліс,  
Колö нöшта муса морт.  
Сэки юсь кодь вөр пу йылас,  
Сэки пельпом сайын борд.*

## ЛÖСЬЫД ГОЗЬЯ

**П**еті вöрысь да сувті паськыд мир туй вылө. Муні-муні да чукыль сайысь аддзи таръясöс. Вöліны кыкөн – сьод да руд. Гозья, тыдалö, либö му-сукасысьяс. Грейдерьясөн йоткалөм чорас вылын, воча сулалөмөн, нюжйөдлісны öта-мөдныслы голянысö. Лэптыласны, копыртчыласны да бара. Бура дыр видзöді бадь пөлөнті.



Сэссия көнтарыс чорас вылысь вөрзёдчис вөрлань.  
Айыс вөтчис сы бөрся жё, но муртсаён бергөдчис да  
лэччис мир туй вылө.

Пельпом вылысь лэдзи ружьеос (көингяс ветлөны  
да босьтлі) да и лыйи. Комын метра вөлі ли эз, но тарыд  
менама жбыргис. Бөрыннас гөгөрвои, мыйла эг веськав.  
Ствол помас, топыда гартлөмөн, суйлі вата, мед вөрті  
ветлөдлігөн лым эз пыр, да сійө дробсө разөдіс.

Мамлы висьталі да шуис: Енмыс пө видзис лөсьыд  
гозгясө, мед челядьөн олісны. Көнтарыд эськө съөдсө  
аддзис на, но мед мам ног лоө.



*Бытьё еджыд шалля пөчгяс  
Сулалөны лымгя козгяс.  
Ёна ветлөмаёсь көчгяс,  
Чирсөмаёсь пелысь розгяс.*

*Котралөма ёна тулан,  
Ёна ворсөмаёсь ургяс.  
Луннас тиөкыд лапгяс улө  
Дзебөмаёсь дона юргяс.*

*Гижасьөма збодер чукчи,  
Медым дозмөр талань волас.  
Бівла шоналас кор лючки,  
Сійө съөлөмыслы колас.*

*Эм на вөрын уна олысь,  
Сідзкө, сійө водзө кылас.  
Татчө водзө жө ме волысь,  
Кытчөдз ачым ола-выла.*



## УКОЛТӨМ САНАТОРИЙ

**К**өч абу шедөма, пөтка лэбалаң колис. «Ветлі  
вөрас здоровьела», – сета аслым сьөлөм.

Сідзи өд и эм: пармаын чукульяс-мукульяс вөчалө-  
мөн ачымөс кыла бура. Төндзи төдсакөд паныдаси да,  
ен сукөд кодь на пө, шуис.

Вөр-васө ме лыддя уколтөм санаторийөн. Ветлөмыс,  
асьтө вермана мында песөмыс ёна отсалө кутчысьны  
збодера, но, кызд ме чайта, ыджыдджыка ышөдө коли-  
палан ловтө пармалөн чөвлуныс, сөстөмлуныс, мичлу-  
ныс. Сэтшөма оз тырмы ставыс тайө өнйя олөмын, кор  
мырдөналөны быдсяма лөкнас, торйөн нин телевизор  
пыр. Сійөс кө дырджык видзөдан да кывзан – торкяс  
вежөрыд, кок увсьыд вошас муыс.

Йөз вөр-ваын өдвакө асьтө тыр-бурөн кылан. Сөмын  
чужанінын мортыд борд вылын. Көть рака моз потшөс  
вылын и эм, а сьылан.



*Эмөсь вель на ыджыд йиргяс,  
Көні нитшялөм нин сиргяс.  
Ыджыд кражгяс кодьөсь найө,  
Аддзан – синмыд плешкад кайө.  
Висьталөны, татшөм сирыс  
Весиг пельыс лоптө йирө.  
Кулөмө кө быттьө шедө,  
Черань везйысь моз и петө.  
Йирас купайтчыны полан:  
Друг да кыскас – эштас олөм.  
Сялькөдчыны сэтчө пыран,  
Көні мусө гөран нырөн.*



## ВЫЛЫС И ВАЖЫС

Рочьяс шулөмаоьс: «Век ов да век велөдчы». Сідзи и лоө. Бур төдса нәмөвөйся чөстө вөчөма ас ногыс. Таляныс абу водзас, а бөрас. Непөштө дозмөрлөн сувтөмысь, а весиг сьөлалөн инмөдчөмысь кражъясыс гыпкыясны, лэбачысь шаньга вөчасны. Зато кырнышлөн пажнайтсьөма.

Ме книгаяс серти и уръяслы налькъяс босьтчи вөчавны. Но зэв маньлив уджыс. Дыр вөчан, этша артмө.

А унатор важыс на лөсялө, пөляслөн мөвпыштлөмыс. Куничаяслы капканъястө, мед лым эз веськав, пуктала пьдөстөм туис кодь тубрасьясө. Лэчьяс гарта вөв бөжысь. Ыргөн сутугатө сьөлаыд куснөдлө, а вөв сьыд бөр брунгө.

Лэч сөйын вугычыс лемень сутугаысь и понөлысь. Лөсялө выльыс и важыс. Кодыс аслыд сьөлөм серти, сийөс и вөчалан.

Водзті көчьясөс кыйлөмаоьс гуяс кодйөмөн. Оні тадзтө некод оз мудзтысь, и ме ог. Сэки өд петлятө нинөмысь вөлі вөчны, да быть. Сімтөм еджыд трос көч петля вылө бур, ме вөчавла и бензопилалөн стартөр троскысь.

Гашкө, нөшта мыйөкө велөдасны удал кыйсьысьяс да книгаяс. Коланатө ог бөрынт, сы вылө лун пукта и войсө босьта, но вөча. Ме өд Габө рөдысь. Сы нима деревняным.

\* \* \*

*Веськодь мен Австралия,  
Африка оз ков.  
Эжва весьтса каляяс  
Кыпөдөны лов.*



*Кыддза раскө пырала,  
Кывбуртөг ог пет.  
Сьөлөм весътөс зырала,  
Олышта на мед.*

*Отпуск кезлө мунёны,  
Көні тай Дубай.  
Менам Габов дум вылын,  
Сэні медся рай.*

## КОДЫС БУРДЖЫК?

**Ш**уръяла ас вөчөм лямпаөн. Кокньыдик, оз мудзты. Гылыд лым вывтійд лэбөдө ачыс. Ки вылысь босьтлі да ог төд, коді вөчысьыс. Ыджыд жө и аттё сылы.

Водзө вылө мөвпала вөчны ачым. Кутшөм артмас, сэтшөмөн и котрала. Но видла вөчны бура.

А лызь вөчны сямөй өдвакө тырмас. Лямпасө эськө лөсала-стружита, но өд эжны на кысөн колө. Сэтчө ме и дуда. Та вөсна и сеті вөчны мастер мортлы. Орчча сиктын эм сэтшөмыс. Өдйө вөчны эз көсйысь. Мися, кор артмас, сэки и ладнө. Мед оз и тэрмась, вөчас бура.

Мыйла меным, эм лямпа да, колө лызьыс? Сійө бур тулысын, кор вөрын лымйыс вермас ульдыны төдлытөг. Пырнытө көдзыд вылад лямпанад пыран, а петны он вермы, лымйыс лямпа пыдөсад өшйө да. А лызь пыдөсад оз өшйы, исковтө гөн кузяыс.

Сёрнитлөны: кодыс пө бур – лямпаыс али лызьыс? Ме думысь, кыкнанныс ас местаас бурось.



*Сюра лешак тайö кöчыс,  
Тöлысь кыя, а оз шед.  
Кутшöм лёк нö сылы вöчи,  
Мый оз синзяс улö пет?*

*Дзик жö морт кодь сийö наян,  
Весиг петляö оз пыр.  
Сийöс ордйöдöмөн кайö,  
Кöни пипу вожйыс тыр.*

*Мудер кöч йывсьыс ме лöвта,  
Тöдö висътöс дзоньнас сикт.  
Тöрыт Öльöш дядьö чöвтис  
Меным дöзмöмөн нин дзик:*

*«Абу кöчын, пиö, делö,  
Вель на унатор он тöд.  
Эн на вöрас овны велав,  
Шежлан сэни, быттьö чöрт».*

*Ковмас велöдчыны, сидзкö,  
Нинöм кужтöгыд он вöч.  
Коркö да и, гашкö, вичмас  
Меным табзья кока кöч.*

## ПУКТЫЛÖМА КИ

**К**ызвын тыыс, кодзяс эмöсь Воч ю пöлөн йыв-  
сянныс вомöдзыс – мортөн вöчöмторзяс. Быд-  
лаö сийö пуктылöма кисö, кодзьяссö веськыдалöма  
зырийөн кодйöмөн. Тайö уджыс ёнджыкасö пöльяслөн да  
ыджыд батзяслөн, наысь на водзынджык олысьяслөн.



Мед сёйны чери, посьсө кисьтлөмаось найө. Быдөн вөч-  
лөма аслыс ты. Кыйсянінъясыс сідзи и шусьоны: Семө  
кырөм, Ёльөш ты, Пуд виям, Прокө вис, Варламув.

Ёльөш ты да Сёркни му ты кындзи, пөшти ставныс  
нин нитшсялісны да эжөрсялісны. Выль тыяс вөчөм  
могысь матігөгөрын көджъяс абуось. Дранесник вев-  
дорті эськө видлөма писькөдны Петыр Гриша, катөдлө-  
ма ныръявны весиг трактор, но изъя сюн сёй пө, да  
тракторыслөн гыжйыс вольскөма.

Босьтчылөма писькөдны Ёндреевка гортлапөв  
Ёльөксея дядь да эновтчөма: кузя пө колө кодйысьнысө.  
Сэсся некодлысь эг кывлы, мый юсө веськөдө, ты вөчө.

Ты кө абу – и чери абу. Ю пөлөнас куръяяс кодьө  
кулөмъястө и вөйтавлам. Сэтчө жө, зэв ёна ляпкаліс ю.  
Ляпкыдінын ыджыд чери оз ов. Весьт кузясө и сёям.  
Челядьдырйи на эськө быгыльтан кодь комъясөс да  
пач пөдан кодь ёкышъясөс вугырнад мачавлім да.



*Вөрын пө эм Вөрса,  
Ваын пө эм Васа.  
Но ме эг на аддзыв  
Найөс рыт ни асыв.*

*Мөвныштла жө эськө:  
Петас пуяс сайысь,  
Либө коркө пыжө  
Мунігкості каяс.*

*Оз өд, көнкө, йөзыс  
Лөсьөдлыны тайөс.  
Кодъяскө да збыльысь  
Аддзылісны найөс.*



*Гашкө-й, некод абу,  
Ставыс – мойд ли сөрөм...  
Шегсянь пестер новлі,  
Аски бара вөрө.*

## ЧАЧАЯСА КОЗ

Өсип Өльөшлөн му борйын, керка лунладорас,  
сулалө коз. Ичөтдырйи, помнитсьө, эз на вөв  
татшөм пашкыр да джуджыд, нэм джынйөн ёнакодь  
луйыштис вывлань.

Кор сиктө жбыргёны уркайяс, пуксьёны век сэтчө.  
Посни сильёясыс быдсяма рёмаёсь, ёна жө и мичаёсь.  
Видзөдан коз пу вылас, да быттьө кодкө өшлөма выль-  
вося коз вылө чачаяс.



*Гортад овлө жө шогалан луныс,  
Но оз коньөрөн вежонгъяс видз.  
Сійө лунас жө лябсьөмыд вунас,  
Кор тэд нюмдас выль туруна видз;*

*Кор тэд чипөстас пинькай ли пыста,  
Кор тэд кынөмсө петкөдлас чөж,  
Кор тэд джыджгъясөс енэжыс ыстас,  
Кор тэд сюриштас зэрыслөн бөж;*

*Кор тэд шоньид и васянь, и мусянь,  
Кор тэд кывбурад вөзйысыс косьт,  
Кор тэд эзысьыс өктымөн усяс,  
Но тэ озыр да, ньоти он босьт.*



## БАДЬ – КУКАНЬ ГАДЬ

**К**ыпөда лолөс деревняын. Локті кыйыштны чери ктувсов ванас. Ыджыд на сійө. Каруш ыджыд видз куръя пөлөнті бергалө, а оз гожөмын моз сулав.

Кулөмөс вөйта ва турун вылас моз, коді джуджыд ванад оз тыдав. Сө лешакыд, кытчөкө пысасис. Зэв сьөкыда, но локтө. Бадь тай, некымын вожъя. Кыськө керыштөмасө татчө вайөма. Берегөдз ылын, часлы, лэпта пыжө.

Лэпти, кулөмөс вөйта водзө. И бара сэтшөм жө история: пыжам ковмис лэптыны мөд бадь. А пыжөй дзоляник, вермас и ганөвтны.

Сідзи и лоис кулөмөс вөйтігөн. Пом бөдь сатшкигөн өтарвыв лоис, да пыжөй васө гумовтіс. Ме ваас надзөникөн и пыри. Кокысь ботіясөс пыр жө чужъялі, мед ва пыдөсас оз кыскыны. Бур йөзлысь кывзөмөн ола. Найө велөдлісны: пыжө кө пуксян, көмкотыд мед век прөстөн вөлі.

Видзөда: пыжам набойөдзыс ва. Часлы, мися, сьө кутчысьөмөн берегөдзыс уя. Но муртса на өшөдчышти – өдөбөн ванас тырис да вөйис ю пыдөсас. Вөлі да эз ло. Мый кута дядьлы висьтавны, сылөн дзоляник көрт пыжыс да?

А ва нырыс менө мырдөн көсйө петкөдны ю шөрас. Йирыс – саридз. Сэні меным и пом. Став эбөсөс чукөртөмөн курася бадьялань. Аслам шуала: «Эн пов, Васьө, ставыс лоө бур». Паськөмнад пур кодь. Бадь дорас на кокъясөй эз судзны. Кутчысьөмөн шойччи да вөлисти петі берөгө. Көтөрөн деревняө. Ёнмыслы да шойनावывса ыджыд мамлы кымынысь аттьөсө шуи, төдөны асьныс.


Бур, мый кулөмам эг гартчы, дзик өд орччөн дзум-гыси. Мыйтаөн нин тадзсө пөдлісны чери кыйысьыд.

Жаль, кулөм тыра ноппөс визулыс йирас кыскис да бергөдлігмоз апыштіс. И пелысөй кылаліс.

Кыз шулөны мужикъяс, вот меным и бадь – ку-кань гадь!

Өні дзоля пыжө васьыд ыджыдтортө нинөм ог лэп-ты. Аслад юрөн ворсны оз позь.


А пыжсө мөд лунас и лэптөма дядь ю пыдөссьыс. Гез помө көрталөм причалка пуысь вөлі да, тыдалө вөлөм ва вылас. Мөд пыжөн сы помысь и кыскөма.



---

*Овны велөдö и вөр,  
Тшöтш и визув юыс*

---





*Велөдөнү бать да мам,  
Кыдзи колө овны.  
Со и содө мортлөн сям,  
Со и сөстөм ловнас.*

*Овны велөдө и вөр,  
Тшөтш и визув юыс.  
Кывзы бура, сьөлөмишөр,  
Кодыс мыйяс шуас.*

*Бурөс көсйө чужан му,  
Лөсьыда мед олін.  
Шань кө лоас олан ру,  
Сылы нэмсө колан.*

## АНЧА – СИНМЫС КЛЯНИЧА

**Ю**гьд, сюсь синма да, сійөн шуа клянича синманас. Ылісянь аддзө да сайөдчө. Колө ёна сюсьөн лоны аслыд. Уяліс Каруш ыджыд видз курьяын да чайті ва шырөн. Колантор, мися. А вөлөма сійө – анча. Утка кыйөдігмоз пукалі лөня, да матыстчыліс. Гөгөрвои да, киөс ружьелань, а сійө – тюльс ва пиө и абу.



Бура уялө да суналө и шелөдө му вывті. Кайө и пу  
вылө. Өтнас, гашкө, татшөмыс вөрын-ваын. Кутшөм  
нин дошлөй тулан да ваад оз сунышт. Ковмас кө, ютө  
вуджө. А тайө быдтор вылө мастер.

Сө морөйдлөн яйыс кутшөмкө дука да оз сөй весиг  
пон. А куыс бур, ваыд оз йидж. Сизимысь артмө пеля  
шапка.



*Ассьыс чужанінсө  
Ошкө пө быд кай.  
Китыр морта грездөй  
Меным медся рай.*

*Сэни мамлөн керка,  
Ыджыд мамлөн гу.  
Кытчө аслым водны,  
Бөйи жө нин му.*

*Но ме дыр на сьыла,  
Ог на йики сөй.  
Шонді вель на вылын,  
Оз на пуксьы вой.*

## РУД ВЫВҚЫШАЯС

**Н**о и кывзысьтөмөсь жө тайө ракаясыс. Он  
тшөкты да мырдөн пуксьөны телеантенна вы-  
лө, коді менам деревняын медся джуджыд. Кымынысь  
нин горөдлі лёкгоршөн, мед матігөгөрысь ушимкайтчис-  
ны, а налы – мый стенмыслы, дзик өткодь.



Кута матыстчыны вöрысь, аддза нин шойна весьт-сянь: бара сötанаясыд пукалöны, нюгльöдлöны лемень тасьяссö, öти дзикöдз нин пöлöстчöма. Медтö пукалö öти ли кык, а öд став шайканас. Медся смелыс асьсö петкöдлö мукöд водзын, лэбзьö сöмын дзиръя восьтiгөн. Эм тай и налөн ышö-пашöйд, асьсö сюсьö пуктысьыд.

Руд вывкышаясысь мынла сöмын тöвнас. Кодарöкö кызвыныс лэбзьылöны, катшаяс моз оз кынтысьны. Но öд бара на локтасны да кутасны карзыны мустöм гора гөлöснаныс кузь лунтыр. Кодос сэсся и кывзан, деревняса оз вуджörtлы да: то паччөр сэрöганысöсь, то вöрынöсь.



*Сöмын тиöтшиöдöм нин вөр,  
Сöмын эжöрасьöм тыяс.  
Сöмын петшиöрасьöм йөр,  
Сöмын ракаяслөн шыяс.*

*Но öд тайö – чужанiн,  
Кодi öтнас менлы вылö.  
Танi ме ог ва моз чин,  
А век кыпта сöмын вылö.*

*Öшинь улöй медся гöрд,  
Сэни дзуйөн öкмыс пельсь.  
Танi сьöлөмöй оз бöрд,  
Татчö нэмсö лoa кельсь.*

## ЛОВ КЕРКА

**М**ый пö и тайö? Кыдз тi он гөгөрвоой? Тайö – вөр керка. Пармаөд уялөм-келалөм бöрын воан да «дыш»-сö шуны весиг дыш, а нар вылө нюждчылан да бара нин гыбалö лолыд. Войсö узян да йöра кодь ён.

Аслам нэмөн ме веськавлi быдсяма вөр керкаö. Торйөн нин Воч ю пöлөн сувтөдөминъясö. Кытчөдз кывтiгад ли катiгад воан, сэтчö и узьмөдчан. Кодкö горъя, кодкö пача, но быдөн шоныд лов сетысь, пöсь сёянөн вердысь, мудз кылөдысь.

Аслыспөлөс сынөдыс, пачлөн мургөмыс, керка саяын дзуртысь пулөн садьмылөмыс – ставыс мыськовтö сёлөмтö небыд пöсь корөсьөн. Нинөм сэсся оз ков, мед сөмын сулалiс вөр керкаыс.

Менам лэч туйöй гортсянь матын, бергөдча лунөн. А сэтшөм окота, мед эськö кутшөмкö ёль бокрын вöли жö. Сёйи эськö ме визув ловъя васö да, гашкö, нюжалыштіс нэмöй.

Немортъяс найö, кодъяс вөр керкаятö – мортлысь лов кутөдъяссö – жуглөны да сотöны. Ен мед сетас налы дон.

## АНЬТУЙ

*Дзоляөн на уна көсъян,  
Медым шензис весиг мир.  
Тэныд сөмын шондi өзйö,  
Тэныд сөмын енэж йир.*

*Сөмын аньтуй медым вöли,  
Сытөг нинөмыс оз чуж.*



*Сылөн гортын сөмын гөлөс,  
Сылөн гортын сөмын вуж.*

## КӨИНЪЯС

Көч кыян кытшолөс кыкысь нин вуджисны көинъяс. Первойысьсө Паськыд оль пөлөн уйисны лунвылө, а мөдысьсө Тыла вевдорті вуджисны войвылө. Лым усьліс бура уна да гөрисны джуджыдакодь. Видзөдөм серти, бура ыджыд котыр. Өти кок туйө тувччалөны да он и төд, кымынөн мунөмаось, сөмын ылөсалан.

Ылөсавны жө позьө, мыйла лунсянь войө да мөдарө вуджласьөны: тадзсө кузь туйө лыйыштлө йөра. Кузь кока бөрсяыс и вөтлысьөны, сөйны өд мыйкө колө.

Кодкө шуө, мый миян деревняысь арнас вөрө морт вошліс да, сійөс йирөны, но өдвакө та дыранад сыысь мыйкө кольліс нин: пармаын өд абу сөмын көинъяс, таскайтіс и мукөд зверыс, кыз шуласны, дук ни пак эз коль.

Көчөс капканөн да петляөн кыйигөн ветла ружьетөг, содтөд сьөктасө ог кыскав, но көинъяслысь кок туйсө аддзөм бөрын сьөлөм оз дрөгнитлы. Уналысь ме кывлі, мый көин морт вылө оз уськөдчы, ылісянь на кылө дуксө да пышйө. Матігөгөрысь некодөс на эз косявлыны. Понъястө, дерт, кыскалөны. Пырөны и омөлик өдзөса гидө. Газетын неважөн на гижлісны, мый өти нывбаба көинсө слөймөма сатшкыны вилаөн.

Лыддылі книгаясысь да висьтавліс төдса, кызди көин чукөр катөдлөма сійөс пу вылө, но тайө висьталөмыс муніс сөмын пель пырым.



*Косьмис весиг сьөрт,  
Сибдiс юлөн сюв.  
Вөрын абу чөд,  
Вөрын абу пув.*

*Абу жө и тшак,  
Некытысь оз сюр.  
Йөзтөм таво яг,  
Йөзтөм таво нюр.*

*Быттьө ыджыд пач,  
Шондi пөжис дыр.  
Унаысь нин тадз  
Менам оландыр.*

*Сийө көть нин бур,  
Воас кор выль ар,  
Оз нин висьмөд юр,  
Ставыс лоё сяр.*

## ЛУПА СИНМА КӨЧ

**К**өчөс шуоны йөйөн. Но збыльвылас абу тадзи, Көкоть кодөс бөбйөдлас ачыс. Сиалөм петля доград матыстчылас люкасьмөныс, но юрсө оз суй. Бергөдчас бөр либө жө төрөдчас петля бокөдыс. «Лупа синма, тыдалө, – шмонитлөны вөралысьяс, – либө бинокль новлөдлө».

Көчылдлөн синмыс югыд и эм: котралө войнас да оз коль бугыльсө некутшөм увйө ни роскө.



Көчүд зэв на и прөсуж. Ме мөмъяли дыр: код, мися, и орьөдлө сьолалы лэч сёрийө көрталан суниссө? «Көч, код нө сэсса», – висьталісны парма гежмалысьяс.

Вөлөмкө, кор судзас лым вывьянь дзоньон кольөм пелысь розйөдзыс, нетшыштө пөв пиньнас сунис ормөныс. Со и став гусяторйыс.

Көч йылысь висьталөны унатор. Мыйсө сөмын оз гижны сы йылысь мойдъясын: көинтө ылөдө, ручтө чужьялө, мортлысь синсө пөртө.

А кутшөм сюсь табья кокыд «Ну, погоди!» мультсериалын. Челядлөн медрадейтана вөрса олысь.

Дзик лөсьөдлыны, кыз шуласны, чуньсьыд нёнявны он вермы. Эз кө вөв сэтшөмөн, кутшөмөн петкөдлөны, некод эськө эз эскы. Абу, абу йөй көчүд. Коді оз төд, сөмын сійө шуө тадзи.

\* \* \*

*Компас көть оз новлы,  
Вөрын звер оз вош.  
Пармапытиса ловлы  
Төдса дзик быд вож.*

*Веськыда көть лыяс,  
Гөгралас көть дыр,  
Сійө мыйяс кыяс,  
«Гортас» ваяс пыр.*

*Компасөн көть ветлө,  
Вөрө вошлө морт.  
Овлө, оз и петлы,  
Сисьмө гу ни горт.*

*Вөрсьыс төдны колө  
Звер моз дзик быд вож.  
Сэки ловйөн олан,  
Некытчө он вош.*

## КОДИ КУСНЬӨДЛӨ?

**В**аж йөз сьөла лэчлысь вугычсө вөчлісны по-  
нөльысь, кылісны воча кык ув. Öні кызвынсө  
вөчалöны лемень сутугаысь. Артмө öдйö да нэм кеж-  
лө. Сісьмас сёрйыс да позьö гартыштны выль пөв.

Ме öти лэч туйö öдйö вылө вугычьяссө сідзжө вө-  
чалі лемень сутугаысь. Но тайö леменьсьыд мөд онас  
и дөзми. Уль понөльысь вөчалөм сёръяс косьмисны да  
лемень кытшьяс-кольчаяс увланыюрасисны. Мед сув-  
тісны бөр местаас, колө коластас суйыштны лөсыш-  
төм увтор. Нюгыльтö и кольчаö öшйөм лым, дөзмөдö  
содтөд удж вөчөмысь, кад воштөмысь.

Сэтчө жö кодкө кутіс леменьсö куснявны сёр бер-  
дас. Эг вермы гөгөрвоны – коді? Дошлөй кыйсьысьяс  
висьталісны: куснялөны вийөр ли чукчи. Найö корскюрö  
сёр вылө пуксьылөны жö да воськовтіганыс леменьтö  
морöснаныс лямөдөны. Вель ыджыд пөткаяс öд, абу  
кикар ыджда сьөлаясыд. Велөдісны: гартышт пö сьөла  
лэч вевдорас бедь помö ыджыдджык петля дай коркө-  
некоркө шедас.

Сідзи-й вөчи. Таво ар тадзсö шедіс кык вийөр.  
Көть лемень сутуганас уна нокыс, öти чөс туйсьым ог и  
вежлав. Мед водзö гырысь пөткаыс менлы вылө лөö.

## АСЫВВОДЗ

*Асывводзнас петі,  
Узьёмойла люс.  
Бөжнас турөб летіс,  
Кыпөдіс лым бус.*

*Кити-китшаліс катша,  
Рака горзіс: «Кар-р!»  
Найөс дзоля Катшыс  
Повзьөдіс шур-шар.*

*И ме налань лыйи  
Чабралөм лым мач.  
Сійөс кыдз пу кыйис,  
Эз и лякөсьт гач.*

## ЧӨСКЫДТӨ ТӨДӨНЫ

Дранесник арайысь воддза гожөмын пуктылөм турунсө Педөр Анна Володь абу и лэччөдлөма, сытөг мукөдлаысь вайөмыс тырмөма. Таво орччөн мөдөс лэштөма, важсө абу сотөма: друг да ковмас. Матигөгөрсә видзьяс вылысь, гортлапөлысь и мөдлапөлысь, потшөсьяс жуглөмөн, арнас зорөдъяссө мыльөсалөмаөсь вөвъяс, а Володьлысь абу вөрзьөдөмаөсь. Сім туруныс воманыс абу пырөма, чөскыдтө төдөны жө.



*Небыд кинас асывводз  
Сингяс водзысь вештö русö.  
Сялькакылö визув Воч,  
Векньыдик, но зев öд муса.*

*Лымйыс лэбаліс на кор,  
Джуджыд нöрыс йылас чужи.  
Кывза сылысь сылан гор  
Да и ачым съывны кужа.*

*Пета ва вылö быд лун,  
Ола аслам пыжөн-поскөн.  
Тайö берегсьыс ог мун,  
Тайö сылёмсьыс ог костав.*

## СИНПÖЛА

**К**ытшовті лэч туйöс да дзик öти сьöла тоньгöд-чöма. Таво этша и дзоля, и гырысь пöткаыс. Ни чукчи, ни вийöр, ни дозмöр эз на шедлыны. Шулöны: вöрын кө пелысь абу – и пöтка абу. Сідз тай и эм. Сиасьны пелысь да жов вайлі орчча посёлокысь, сикт вылас вöлі.

Öти сьöланад – синпöла, кызкö весиг абу лöсьыд вöрсьыс петны да гортö мунны. Кызди и öти чериön либö öти тшакөн. Надзöникөн осьлалігмоз, кевма, мед эськö кыськö кодкö жбырнитас. Тыла юрйылын сьöла семья эм. Гашкö, лöсяла сы вылö?

Öти öд збыльысь жбырнитіс да тыдалан выя пуксис. Тэрмасьыштны колö: дыр öти местаын оз ов. Лöсьыда

веськалі: шмак моз усис кыдз улас. Но, бара на тай,  
кыдз шулёны, көсөй понлы моз мойвиис.

\* \* \*

*Дзолюкөй дай юй,  
Тэ на-й синмө пыран.  
Олөм оз ло олөм,  
Тэ кө быттьө быран.*

*Дзолюкөй дай юй,  
Тэ на-й менө вердан,  
Тэ на-й менө видзан  
Югыд сьолөм бердад.*

*Дзолюкөй дай юй,  
Тэ на-й менө мыськан.  
Сөстөмнас Ен дорө  
Мунны весиг лысьта.*

*Дзолюкөй дай юй,  
Тэ на-й меным сьылан.  
Сійөн на и гөгөр  
Сьыланкывйыс кылө.*

*Дзолюкөй дай юй,  
Тэ на-й водзө нуан,  
Медым став бур йөзлы  
Мыйкө да ме шуа.*

## ВАСЬӨ, ЛЫЙ!

Уткаясөс видзөдалігмоз, Өндревка ёльвомса куръяысь кыйны кулом руа асывнас мөдөдчи ю пөлөн. Кык уткаөс казялі Каруш ыджыд видз йирысь. Матыстчыны сьөкыд: берег пөлоныс сьөрт, ёнакодь пөрёма. Оз аддзыны менө, но кылісны, кутісны ылыстчыны йир мөдарланыс, бура дыр дзөрнясьом бөрын вөлисти бөр чегисны яг нөрыса береглянь. Видзөдлі сэтчө: кодкө сулалө бадьяс сайын видз дорышас моз. Ставнас сьөд, чужөмыс сөмын еджыд тасьтён тыдыштө. Водзті татысь пырей сора джуджыд турунсө пуктыліс Варполом семья, а өні ытшкытөг лым улө сюрө. Торокъясысь оз өктысьны, өтувъя овмөс бырис да виддзыс этшаник овмөса деревнялы сідз тырмө. Бадьяс сайсянныс зөв лөсьыд кыйөдчыны да сэтчө и келөма кодкө.

Дзик ныр уласөсь уткаясыс да мый оз лый? Менам тьөзө өд, көнкө, сулалысьыс – Өльөксан Вась, коді аръяснас ме моз жө чужанінас волывлө? Мый нө сыкөд лоөма? Ёнджыка петкөдчи коластас да кинам петкөдлі ва вылас: лый, мися, ныр улад уткаясыс. А сійө водзө мыр моз сулаліс.

Ме полі уткаясө повзьөдөмысь да эг жө вөрзы места вылысь. Гашкө, мися, коркө да лыяс. Но сідзи эз и лый. Мелань уткаясыс эз жө локны. Дышөдіс, тыдалө, өти местаын овны да швыргисны водзө ю катыдө. Вөрзьөдчи Васьөс янөдыштны, а сійө и збыльысь джуджыд мыр вөлөма. Выліладортіыс кырсыс кулыштчөма да сійө вөлөм чужөмнас и петкөдчө.



*Пелыся бипурйён керасыс сотчө,  
Шоныдыс съёлөмө сөмын оз пыр.  
Кодкө тай ёна нин сёрмөмөн вотчө,  
Көдзалөм расъясын келалө дыр.*

*Көтасьём енэжыс абу нин гора,  
Шондйөн малыштөм гөлөс оз кыв.  
Сиктаным гудөкъяс ворсёны нора,  
Өшиньё ляскөма чужөмсө ныв.*

*Регыд и лымгялас, кыдзи век овлө,  
Сылас кө – сылас, а оз кө и – оз.  
Вөрыс и, ваыс и еджыдсө новлас,  
Югыдөн пасьтасьём невеста моз.*

*Коркө да шоргясөн сяльөбтас тулыс,  
Мортлөн и нуыслөн шоналас сыв.  
Петасны гудөкъяс өшиньяс улө,  
Сййөс и аддзө нин өшиньөд ныв.*

## БИЧ ПАКЕТ

Сёрни мунас дзюляник пачкаясын вузавлан кос сёян йылысь. Донтөм, эм быд лавкаын. Чабралан, меститан кутшөмкө дозйө, кисьтан пуан ва, видзыштан вевттьөмөн вит кымын минут – и паняв. Көр вөчан сорас да вый весиг эм зэв дзюляник пакетьясын. Гудралан да чөскыдджык быттьө. Гортад, дерт, татшөм сёян кежысь лун кежлө он кольччы, а лэч туй вылын да көн да зэв лөсялө. Чай юан кружкай бура ыджыд да сэтчө и дасьтыла. Первой роксө пось вывсьыс

өдөбала, а сәсся, пожйышта да, чай ырска. Дерт, куш кизьөр сёян кежысь ог кольччы. Пажун вылө быть эм гос ли калбас, лук да пуём картофель, помидор ли огурцы. Сөвта ставсө тайөс кытчө колө, упкышта-шойчышта и бара водзө, сыылигырйи ягсө-рассө гежмала.

\* \* \*

*Видз шөрө гатшөн воді –  
И синмын енэж шөр.  
А озсө бөрти вота,  
Ог кушөн лэччы бөр.*

*О, лышкыда жө сетө,  
Оз жалит нинөм Ен:  
Мый ыджа вольной светыс,  
И ставнас сійө мен.*

*А меным ю кө эм и  
Да берегъясас вөр.  
Ме тэкөд лоа нэмыс,  
Воч йылөй – сьөлөмшөр!*

## УТКАЯС ДА ВӨВЪЯС

Уна во сайын нин казялі: уткаяс век эмөсь сәні, көні йирсёны вөвъяс ли мөсьяс. Сөмын колө мичаа гөгөр видзөдлыны: абу кө тыдалан ва вылын, то көнкө вутшъяс да эжөръяс пөвстын. Виччысь, и коркө да петасны. Тайөс төд вылын кутөмөн и пукси Ольош тыбокса яг дорышө да видзөдлі Ыджыд виддзын йирсёсь вөвъяс вылө, кодъяс син улө усьлісны ылісянь

на. Мый нө тайө? Найө тай зэв абу шаньөс: потшөс-сө кисьтөмаөсь да зорөдсө пачесайтөны. Кынмыліснин, өтава ветьөкасис му бердас, лоис чөскыдтөм, со и жугөдөны зорөдъястө, абу кө бур киподтуйөн потшөма. Көтөрті вөтлыны. Уткаяс пыр и кылісны, жбыргисны курьябокса эжөрысь.



*Тан абу сөмын лымйыс юсь кодь еджыд,  
Тан дзык жө еджыд вөр-пуыслөн чаль.  
Тан весьтын еджыд енэжыслөн эжыс,  
Тан нывлөн юрас еджыд-еджыд шаль.*

*Тан еджыд весиг весьөпөрөм тулыс,  
Кор льөмлөн дзоридз, быттьө польдөм быг.  
Тан еджыд гортйө водан, мыйөн кулан,  
Да некор мөдаръягыдас он тшык.*

## ЕДЖЫД ГОЗЪЯ

Сьөртъясө тувсов ваыслөн пыртөдз, уткаяс видзө-далігмоз, видзяс вылысь бура уналаысь аддзылі көчөс. Семө кыромгорувса мөдлапөлысь весиг кыкөс. Гозъя, тыдалө, вөліны. Зорөд йөрө пырөмаөсь да кольөм турунсө бөйышталөны. Лым абу нин, а найө дзык еджыдөсь. Шутьялялышти да пельнысө сөмын ёсьтылісны, места вылысь эз вөрзөдчыны.

– Дыр на тані кутанныд вежөс петкөдлыны? – гораа сэсса юалі. Но быттьө менө эз и кывлыны. Төдөны, мый ме ю сайын да налысь кусө розьөдны ог кут: көть и лыя да веськала, судзөдны ог вермы, пыж ни пелыс.



Тыдөдчи рос сайысь да вöлисти сявкнитисны сьöртö.  
Мед олöны, арнас унджыкөн лоöны. Ас вылö на, гашкö,  
кодкö да котöртас.

## БАБА ГОЖÖМ

*Тайö абу баба гожöм,  
Тайö – менам олан гаж.  
Локтис бара мян вожö,  
Кыткö выль да кыткö важ.*

*Банйöм пельсь öшинь улын –  
Быттö сикöтшасьöм ныв.  
Мед кö абу югыд тулыс,  
Рытнас юргö сыланкыв.*

*Көнкö лэбалöны зэргяс,  
Көнкö бобуласьö лым.  
Тані шондi. Мича сергяс  
Дыр нин öктам аслыным.*

*Мыйöн турдас мян вожыс,  
Зэв на-й шонтас пельсь би.  
Волыв, волыв, баба гожöм,  
Медым ловзьялам на ми.*

## КÖРТ ПОС

Öндревка ёльö кузьтаногыс пуктылöмаöсь тракторлысь рамасö. Кöрт пос вöчлöмаöсь тракторьяслы жö ветлыны, мед ёль воргаас эз сибдыны. Джу-

джыд ваён эськө оз тыдав, а кос ванад сiмөм көртыс  
бура вылө мыччысьö. Ме весиг сы вывтi вуджавла, Ёгор  
чöс туй помлань кө восьлала. Чеччыштöмөн да бокъяс-  
öдыс төрöдчöмөн кывтö да катö ком. Эм сийö тайö ёляс.  
Вомöдзыс лэччöмөн куръяö петас да шедлывлö кулөмö.  
Кыйöны ёльса мичаджык йиръясысь и вугырөн. Сёян  
кадö эшты лэптавны. Öнi татi тракторъяс оз ветлыны.  
Перйыны эськө рамасö, мед чöскыд черилысь лэбөмсö  
эз падмөд, но миянладорын мый лёк, сийö и бур.

## МЕНАМ ПОТШÖС

*Менам потшöсöй öдвакö пöрас:  
Сийö – нэмъясөн сулалысь вöрыс.  
Помся мортыс и, көртыс и йирö,  
А öд сулалö сира и вира.*

*Сийö тöлöс и вөрөгöс кутö,  
Дорйö сьöлөмсянь ас чужан мутö,  
Кöнi олöны шудыс и шогыс,  
Кöнi ловзяöсь бурыс и лёкыс.*

*Кытысь ветлöны матö и ылö  
Да бөр локтöны кильчöяс вылö.  
Кодлы висьталан, сьöлөмад мыйыс,  
Кöнi овлö и нянь вылö выйыс.*

*Менам потшöсöй öдвакö пöрас:  
Сийö – некорсö бырлытöм вöрыс.  
Абу кок улö лöсьöдчысь идзас,  
Сийö-й ме бöрын локтысьöс видзас.*

## ПОЖӨМ ВИР

Пөрөдөм водзвылын водзті пожомъяслысь вирсө босьтлісны – сир вийөдлісны. Ыджыд пуртөн гижйөдласны пусө, жосьтысь чибльөг өшөдасны – и тєпкө пөсь вирыс. Абу мянлөн кодь гөрд, а зарни – шондіөн мавтөм. Пожом ягъяс абуөсь, а чибльөгъяс – быдлаын. Томъяс оз төдны да юасьоны, мыйла пө көрт чибльөгъясыс танөсь. Висьталан да налы пөсь ни көдзыд, а ме шензъыла: «Дзик вежөртөм небыд улөс вылын пукалысьыс да тадзи уджавны тшөктысьыс вөлі, либө жө төдөмөн ыджыд пакөсьтсө государстволы вөчис: сирсө пычкөм да лөзөдөм пожомсьыд зэв дженьыд нэма вөчөмтор артмө, пес вылө сөмын шогмө татшөм пуыд. Öні тай оз вийөдны».

Ыджыд страна пасьтаыд миллиард кубометръяс тшыкөдісны. А мыйта лөк ловъя лолыслы вөчисны. Химия сорасөн өд кырлалөм пусө мавтлісны, мед өдйөджык сирыс петас. Звер-пөткаыд сійөн «чөсмасис» да ёна куліс.

Меным чайтсьө, мый эз пуяслысь, а мянлысь вирнымөс пычкисны. Лөзөдөмөн сулалам, регыд бок выланым гыпкысям.

\* \* \*

*Гортын век ола да выла,  
Сійөс ме некор ог коль.  
Коркө да мыйяскө сьыла,  
Велөдіс Гусика ёль.*

*Соддзөн да чибльөгөн юа  
Енэжөн вежөдөм ва.*



*Мамöлы аттьöсö шуа,  
Тани мый чужтылöма.*

## ПУЯС, КЫДЗИ И ЙÖЗ

**Т**аво пес вöчигөн öти коз пу муртса лолöс эз босьт – сы мында эбöс сийöс поткöдлiгөн мунiс. Таöдз, чайта да, некор эг думыштлы, мыйла öти пу веськыд, а мöд – шогмытöмöдз дзуг, а сэки, краж вылын лолыштігмоз, ассыым жö и юалi. Но лючки вочавидзны эг куж, ылöсали: пуяс, кызди и йöз, быдсяма пöлöс овлöны. Вывтасiнын быдмöм пожöмъяс да козъяс веськыдöсь да кузьöсь, лöсьыда потласьöны, а лёкинö пырöмаяс – нюрвывсаяс да егырсаяс – дзугöсь-гартчöмаöсь, сизим пöсь петкöдöны, поткöдтöг весиг кольлöны.

Кывлі ме татшöм висьт. Асланым деревняын тайö вöлöма. Пöрöдасны-мырсясны Микипер Иван гозъя пожöм – сывйөн он судз. Мый жö öти чурка пилитны да видлыны, потласьö-оз, а найö кушöдз орьöдласны да вöлисти поткöдлыны босьтчасны. Дзик некыз оз потлась – колунөн, тувйөн ни нöшкөн. Сидзи и ковмас эновтны. Тадз жö шенышtlöны киён йöз вылö, кодъяс некыз кывйö оз сетчыны. Шулöмаöсь тай рочьяс: горбатого пö могила исправит.

Дзик öткодявны йöзыскöд быттö оз жö лöсяв дай. Пуыз кö мусин серти сöвмö, то мортыдлөн этшыс да лолыс абу сöмын сёян сайын: сы вылö велöдöм да воспитайтöм тöдчö. А мыйөн тöдан, гашкö, пуясыс вежöраöсь жö да? Öтияс кылöны бурö велöдöмсö, а мöдъяс – оз, нарoшнö пырöны лёкинас да мукöдöс на ас бöрсяныс кыскöны. Гашкö, кодкö да и гөгөрвоё бурсö? Со эсийö гартола козыйс коймöд лун нин дзуртö. Гашкö, егырсьыс окота косiнö кайны да отсавны корö?

---

*Пармаыс – менам и батыӧй,  
Пармаыс – менам и мам*

---





*Усьöны коргъясыс, усьöны...  
Бвлаыс ыркыд и чöv.  
Корсюрö шöпнитлö гусьöник  
Лэбулысь лэччысьöm төв.*

*Шондiыс öдвакö мыччыяс:  
Пемдöма енэжлөн сер.  
Асывсянь кежавны виччысьö  
Ю сайысь дышник зэр.*

*Важөн нин видзöдны дышöдiс  
Йöжгыльтчöм вөр-васö мем.  
Гожöмыс гижны кө ышöдiс,  
Арыс тай ар на и эм.*

## НАТÖГ ГАЖА

**Р**айонса администрацияысь морт вöзйылис: вай пö босьтчы да котырт чужанiнса парма-ягад суйöрсайса войтырлысь кыйсьöm. Лышкыда пö мын-тысясны.

Шуи, мый кывбур-висьт гижны кадыс оз тырмы, а кысь нин татшöм делö котыртны. Веськыда кө шуны,



кадыс збыльысь абу. Но эг та вöсна ме пыксы. Ме ог кöсйы, мед кытыськö локтöм йöз миян пармаын кыйсьöмөн-луйсьöмөн ловнысö кокньöдiсны. Натөг гажа.

Верма содтыны: ме синмөн ог аддзы найöс, кодъяс тöдöмөн кисьтöны Рöдинаöс став лёксö вайöмөн да вужйöдöмөн.



*Катöдöй менö кöть райö,  
Корсьöй кöть медмича му, –  
Пармаöс мевысь он сайöд,  
Пармаöс менсьым он гу.*

*Пармаыс – менам и батьöй,  
Пармаыс – менам и мам.  
Пармасынь менам и статъöй,  
Пармасынь менам и сям.*

*Сы моз жö элясьтöг ола,  
Кöдзыдыс сотö кöть вем.  
Сы моз жö кодлыкö кола,  
Сы моз жö помасьтöм нэм.*

## ГУСЯ ЯГ

**П**увйыс таво эм быдлаын. Абу пöрöдöминъясын, на мича тiлля нин ягъясын. Кöнкö гырысь да кöнкö посни. Гырысьыс, кыдзи и ыджыд чери да тура-са пöтка, этша. Посниыс эськö зэв мичаа сьöдöдöма, да дыш вотны: шарсьян-шарсьян, да оз и сод.



Өльөксей дядь шуө:

– Менам гуся яг эм, сэтчө тэнө нуөдла.

Пуксим мотора кёбылаяс выланым да ризнитим. Кытчө – ог висьтав, мед асьным сөмын төдам. Дзоляник ягыс да уналы сәні вөчны нинөм.

Ягсө нюр кытшалөма. Лунладорсянь верст джын кымын болским. Оз, көнкө, и чайтны, мый сийө эм. Дядь турипув вотигөн казялөма. Кодкөд и өткодявны? Футболөн ворсан эрд ыджада кымын. Өтарсянныс кө чужьян мачсө – мөдарөдзыс воас.

Микайлө волөма нин да өти пөлөнысь прамөя вотчөма, но миянлы кольөма на. Дас литраа нель ведра лунся шондинас на мешөкьясаным гузьгим. Атьбө, талун кежлө тырмас. Мөдысь кежлө мед коляс.

Жар гожөмнас нюрсянныс ыркыдджык вөлөма да сийөн и пувйыс гырысь. Код оз төд вөрсө-васө, поснисө и шарсийө. Сдайтнытө өд – посни коть гырысь. Шуөны: рочьяс пө сөясны. Гашкө и, негрьяс – Африкаө нуасны да.

## ВӨРСА Ю

*Ёна жө и лөпта тати юыс,  
Көни ваыс гөгралө да гартчө.  
Гашкө, коркө йөра чукөр юис  
Да и сюрсө пыркөдалис татчө?*

## ГЫЧА ТЫ

Эм сэтшөмыс. Юыс веськыдалөма да көджсыс артмөма. Петыр Гриша вис лөсьөдлөма да сы



нимөн төдөны. Кольём воын Володь, коді сы гөгөрын пуктысьө, ошйысьліс: гожөмбыд пө красуйтчи, зэв мичаник гычьяс шедісны. И миян Борис, Өльөксей дядьлөн зятъыс, вөйтасьлөма, камбала кодь комын душ шедөма.

Таво Володя, дядьөн шуысьыс пуртөн вөлтөшитчөма да, юрсиктса да карса больничаясын куйліс, ты вевдорса видзьяссө эз пукты, ю кыр йылө пөвьясысь вөчөм чомйө юрсө эз суйлы. Мися, час, ме вөйтасьла, и вөйтасьлі, резина пыж босьтлі да. Вежон чөж кык кулөм видзи да жаритмөныд быд видлігөн шедліс. Дерт, эз камбала кодь, но и эз дзоля. Кулөмъясыслөн өд синъясыс гырысьсөсь вөліны. Тыдалө, эз ветлы чериыс да сійөн омөля шедіс. Коркө да мөдысь нөшта вөйтла, көть эськө абу ёна окота резина пыжсө пөльтөмнас да бөр турбылялөмнас ноксьыны.

Ю катыдын Пуд виям гөгөрын ещө гыча ты эм. Сэтчө нэмсө нин эз вөйтасьлыны, ылын да. Позяс жө видлыны. А ю горулө ог лэччы. Сэні Павел Өндрей кыйсьө. Миянладорын закон: йөз местаө ныр оз суйлыны.

## МЫР

*Көні помасьө вөр туйыс,  
Көні ёльлөн кыр,  
Визув ваө тошсө суйөм  
Пөрысиник мыр.*

*Тошкас – югыд-югыд мольяс,  
Сэні – шонді би.  
Пуксьы, видзөд визув ёляс  
Да и шонты ки.*



## МАМЛЫ ПУВ

Өкмысдаслань матыстчысь мортлы омөля нин сёяныс вомас пырө. Мамө йылысь ме тадзсө шуа. Йөлөн и ловъя. Пув пуктыштас да паньышталө. Выль пувсө этшаника, еджыд сора на вөлі да, видлыны Ёгор чөс туйпомса ягысь вайи. Туй пөлөнъясас аттө уна вөлі. Мичаджык тусьяссө бөрйышталі.

– Шома, – шуис видлөм бөрын.

Сэся воті Ёсип керкадінса ягысь. Сьөдөдтөм на, мичаа воём пелысь кодь пувйыс вөлі гырысь. Ведраой тырис муртсаөн.

– Нолтө, тайөс, мамө, видлы.

– Вот тайө чөскыд. Кытысь нө вотін?

– Ёсип керка дінысь.

– Сэні век чөскыд пувйыд вөлі, Гриша Митрейын да.

– Гриша Митреяд мотора пыжөн колө ветлыны, а ваыс кос да он лыб. Ме тэныд төв кежлө Ёсип керка дінсьыс и вотышта, эз на кушөдз сдайтөм вылад чашйыны да. Сьөд пувла лым усьөм водзвылын Яга бокө котөртла.

– Ме вөсна эн бара-й. Кутшөмөс ваян, сэтшөмөс и сёя, – шуө пызан помө лөсьөдчыштөм мамөй, менам дай меддона мортөй.

Ме өд, мамө, шомасө да юмовсө төда жө. Эн шогсы: медся чөскыдсө тэныд корся да вота. Сөй сөмын да дыр на ов.

\* \* \*

*Гожся зэрыс регыд оліс,  
Көтөдыштіс мулысь эж,*



*А өд кыдзи радлө лолыд –  
Ывла вылыс вежсьыс-веж.*

*Гөгөр югдiс, гөгөр мича,  
Мунiс гыма-чарда грөз.  
Енэжыслөн рудов ситеч  
Весиг лоис лөзсьыс-лөз.*

*Ошкамөшка енэж шөрын –  
Мөдлапөлө вуджан пос,  
Быттьө мичаник джодждөра  
Кодкө лэптiс дуригмоз.*

*Сьылө пыста, сьылө колип,  
Содтiс сьылан горсө шор.  
Уна жө и радлун колис  
Талун гөсьтөн шуантор.*

## ТІЛЬ

**П**ланъяс тыртөмөн да вевтыртөмөн миянладорын пожома ягъястө кушөдз чирсiсны. На местаө рос чепөсйис – бадь, кыдз да пипу. Зу кодь тшөкыд, мунны весиг он вермы. Кокъяс улын яла пыдди нитш. Но местаясөн веськавлан быттьө паркө. Ар квайтымына-сизимдаса тiль мича серпасөн сулалө, сьөлөм гажөдө.

Водзынджыктө увъяссө сотөмөн на уджавлөмаөсь, сийөн и гөгөр дзим-дзурк. Дугөдчисны да пасьтала зэръяслы нильзьөдны кутiсны кольны. Весиг мича лунъясө сәтi оз косьмыв, век нильөг. Со и шварөдө роскыс. Татшөминсьыд нинөм оз сюр: пөтка ни звер, пув ни тшак.

Мича дiясас кыскöмөн кыскö: Öсип керка дiнö, Гриша Митрей ягö, Евсей керка мыш вылö, Ыджыд сотчöмö, Ёгор чöс туй помö. Сэтысь сюрö оз сöмын вöлöга да прöмыс, но и кывбур – менам олöмын медыджыд гажыс.

Мича ягъяссö сиктсаяс кызвыннас асьныс и пасьвартисны. Кымын унджык куб – сымын унджык руб. Некод эз озырмы. Кыдз шулöны, потöм вор дорö колисны.

Вöвлöм колхозлөн муяс вылö пожöм сярмунис – зэв мича тiль. Тшак нин петö, весиг тар тулыснас койтö. Мирын дивö: öшинь увсянь ветымын воськов сайын. Öнi сийö ме судта на и эм, а быдмас да зэв гажа ягөн лоас, збыльысь сиктсалөн паркөн. Оз кө урöстны потш да пес кералöмөн.



*Муыс-ваыс лөнис тати,  
Шы ни төв.  
Кыла сöмын, кыдзи матын  
Йирсö вöв;*

*Кыдзи легöдчыштö пулөн  
Косьмöм кор;  
Кыдзи буждöм кыркöти улын  
Жборгö шор.*

*Лөньюм юлысь васö юа  
Содз да мöд.  
Тайö васьыс чужан муам  
Код и пöт.*



*Войыс югыд – гожом шөр өд...  
Шы ни төв.  
Татшөм лөсьыд чөвтөм бөрын  
Эз на вөв.*

## ПАЖУН

**К**ыйсыны ли вотчыны вөрө мунап, быть пажун-тор босьтан: нянь, порсь гос, пуом картупель, лук, литра джын сулеяын йөв ли юмов чай. Позьо и мукөдтор, мый эм керка помын.

Арнас пув вотигөн мукөдыс зептаныс сөмын нянь шөрөм суйоны. Пувыйс пө ныма сөян, няньнас суктыштан дай. Но ме куш нянь кежсьыд вөрад ог мун. Быдторыйс өд вермас лоны. Лун кежлө мунап, а вежон мысти воан. Ен видзис – мекөд татшөмторыйс эз овлы, а кодсюрө вель ена гөгралөм бөрын пармасьыд петлөны.

Өтчид, пув вотны Ольөксея дядькөд мөдөдчим да, быдторсө жө ноппө тэчи. Чипан кольк весиг вөли. Вотчим-вотчим, нурьясьыштны пуксим, а пажуныд менам абу. Ноплөн шердын вома зептас пуктыли, да мотоциклнад таркөдигөн усьөма пакетө пуктылөмыс и чай тыра сулеяыс. Ковмис дядьлысь пажунсө пайкны.

Лэччигөн видзөдалім туй бокьясысь, но нинөм эг казялөй.

– Кодлы сюрис, сийө и сакис, – кывкөрталі ме.

Шензим, кор чай тыра бутылкасө казялім туй бокысь сувтөдөмөн воддза местаас жө мунигөн мөд лунас. А пинь улө пуктаныс эз вөв. Сийөс, көнкө, збыльысь нямыштісны. Видзөдөм серти, тубрасыс да дозыйс разной местаө усисны да, гашкө, разной жө йөзлы и веськалісны. Öтияс аслыныс босьтісны, а мөдьяс

меным бур вöчисны. Эмось на шань йöзыс. Сійөн и олöмыс ловъя.

\* \* \*

*Эжва бара арся ваяс нуö,  
Пырöма нин гатша пыжъяс бöжö.  
Лы ласта исковтöма юö,  
Тыдалыштö сöмын баябöжыс.*

*Вöйысь морт моз вермасьöны юкöд  
Берегланьö сынышталысь керъяс.  
Мöдлапöлö подөн вуджан здукöдз  
Топыда на швачöдасны зэръяс.*

## НАЖÖТКА

**П**ув шарсйöны вотöм вылö. Нажöтка тайö сиктса шайт позьö зептад пуктыны.

Деньганас и сетöны. Сöмын колö орчча Дзоль сиктö катöдны. Ыджыд-ö сикт, а рытъяснас, пувсö сдайтiгөн, öчередь артмылö. Примитчысьыс öти, сылы унатор лоö вевъявны: вайöмасö веситны, ящикъясö меститны, артасьны, сьöм сетны.

Кодъяс көм-пась да челядьнысö каръясын велöдöм вылö нажöвитöны, найö оз няргыны, öта-мöдныслы кыв-мöд шуёмөн лöня виччысьöны, а кодъяс вина вылö вотчисны, налөн гөлöсныс гора: окота öдйöджык горшö кисьтны. Зильöны öчередь виччысьтöг суйсыны, но найöс оз лэдзны. Дöзмöмаöсь, сійөн и гораöсь.

– Сдайтан да, миянө ветлам. Ме тэнсыд гижөдъястө ок ёна лыддя, – мырдөн пырө пельө юыштөм томиник морт, кодос ме водзти аддзыли нисьө эг.

– Гортын шыд чугунөй пачын – пакталас, – мын-төдча сыысь.

Нель лун кос веськөдлытөг вотчөмөй сюрс шайт сувтис. Унджык вылө лача вөли. Аттө сьөкыд вөрсьыс петкөдигас пувыйс, а сэтшөм этша лэптө. Дас литраа ведраыд квайт кило сөмын. Донтөмысь жө босьтөны дай – килоыс дас шайта.

Аслым шуа: «Дыш кө, эн вот дай. Код нө тэнө тшөктө?» Мөдар боксянь кө, көн пө сюрс шайтыс туп-лясьө?

## АР ПОМ

*Абу нин, буракө, челядь:  
Сьөлөмөй дөбельки нор,  
Лэбө кор турилөн кельөб,  
Пельысьыс өзйөма кор.*

*Пукыштны важөн нин корө  
Егыра яг костын ёль.  
Шойччө сэн пинькоста зорөд –  
Пуктөма кодикө оль.*

*Лымгясысь енэжыс пөдас,  
Ваясө поньталас йи...  
Тулысөдз шонтыны мөдас  
Пельысьлөн ыпгялысь би.*

## ГӨСЬТИНЕЧ

Карса внучок, куим арös регыд лоö, миянын  
Кгожйö-арйö. Кор юрсиктысь деревняö ветла, век  
сылы кутшöмкö да гөсьтинеч зiля вайны. Шойна весь-  
тöд туйыс вöрас-ваас нуö да, век ыджыд мамöлы кайта:

– Ыджыд мам, внучок миянын да, вай кевмышт,  
мед мыйкö шедыштас.

И мыйкö да век пысасыштö: то чери, то сьöла. Теш-  
кодь, но черилысь медся чöскыдсö, пöксö, оз сей. Пöчыс  
блюд вылö чигсö пыллас да сйöс öктö.

Тöндзи сьöлаясöс вайи. Шуа:

– Видзöдлы, кутшöм сильöясöс ме кыйи.

Видзöдлiс да юалö:

– Тэ виин найöс?

– Да, – мися.

– Сiдзкö, тэ – бандит.

– Абу жö ме бандит.

– Кодi виö, сйö бандит.

Но мый тэ татчö шуан? Телевизортö видзöдö да сэ-  
тысь вежöрас пырöма. Помся тай лыйсьöны-вийсьöны  
да террористъясөн, бандитъясөн шуалöны.

Внуккöд сёрнисö та йылысь эг пан: весьшөрö лоö –  
оз гөгөрво. Сылөн вунöма нин воддзаыс, шуö:

– Дедö, вай мультфильм видзöдам.

## ИЮЛЬ

*Сё визьөн чездiс енэж сер,  
И кутiс кисьтны кöшысь.  
Сё югыд кокөн йöктö зэр,  
И гурйыс восьса öшинь.*



*Сё кӱрӱн пӱлялӱ июль –  
Кунь синтӱ, нӱылышт кывтӱ...  
Кыдз парус зэвтчис ӱшинь тӱюль,  
И саридзӱд ме кывта.*

## ПАВЕЛ ВИС КОСЬТ

Эм татшӱмыс ю катыдын веськыдасӱ верст нӱль сайын. Иван Павел вискас гымгаӱн кыйсылӱма да, и сэтчӱс косьтлы сылӱн нимыс кольӱма. Но делӱыс абу таын. Делӱыс сыын, мый косьт йывсьыс кывбур менам артмис. И кыла: сыланкыв вермас письтны. Вомгорулын мургыштала и важиник баян вылын, кодӱс деревняӱ вайлӱ, кыдз шуласны, пельяс сьӱдмӱда.

– Он тай нӱ лӱсьыда ворс, нязӱдчан сӱмын, – посӱлокысь локтис олыштны мамӱ да шуӱ меным.

– Павел вис косьт йылысь сыланкыв лӱсьӱда, да оз тай мыйкӱ артмы.

Лыдди мамӱлы кывбурсӱ. Сийӱ кывзис да намгыны жӱ босьтчис. Но миян нинӱмыс эз артмы.

– Сьӱкыд тай тайӱ делаыд вӱлӱма. Мыйыськӱ ӱд юрыд куш, – кывкӱртис мам.



*Коми муным уна вӱня –  
Тырыс ю да тырыс ёль.  
Кодкӱ збоя, кодкӱ лӱня  
Вайӱ пармалысь зиль-зӱль.*

*Югыд эрдгяс, вӱргяс пӱлӱн  
Чӱжсьӱ ва да содӱ от.*



*Тайö маон, тайö йөлөн  
Тыртö сьөлөм кудсö морт.*

*Коми йөзлөн сингяс водзын  
Тырыс ю да тырыс ёль.  
Кылö өні, кылас водзö  
Гортын асланым зиль-зель.*

## ТЬӨЗӨ

**В**олывлө ме моз жö гортас орчча посёлокысь (көні чужлін, сійö и горт) менам тьөзö да бур ёрт Василий Лютоев. Кыйсьыштö да, вотчыштö да. А главнöйыс – мамсö видзöдлö, кодi танi лым сьлөм-сянь кöдзыдгяс шашаритчытöдз. Бура гудöкасьö. Помавліс культпросветучилище. Тöндзи туй вылын паныдасим, да ме висьталі, мый баян эм, юрсиктысь вайлі. Важиник нин, но позьö на ворсны. Кадыс кö сюрö, кори пыравлыны. И со Василий торкөдчис öдзöсö.

– Пывсян ломтi да костас, мяся, пырала, – вежавидзис сійö, быттö эз и вöв сёрнитлöма. Чуньяснас котортіс баян кизгяс вывтi öтчид дай мöдысь да вöлисти шылад вылö вуджис.

Ме тай шуи, мый бура ворсö. Торйөн нин мичаа артмöны нотаяс серти велöдöм вальсгяс да полонезгяс. Быттö концерт вылын пукала да кывза маэстроöс.

Василий гижö и ассыс сьыланкывгяс, петкөдчыліс нин «Василей» гаж вылын. Зэв пöся сылысь «Мамöлы» сьыланкывсö видзöдысьяс примитісны, и жюри вылö донгьяліс. Юалі: – Мыйкö вьльсö гижин-эн?

– Эз на юрö нинöм пыр, – вочавидзис сійö. – Яга йылын олышта да, гашкö, мыйкö лолö и коляс.

Яга йылыс – сылөн медся гажайныс. Сэни батыскөд на лэптылөм вөр керка, чөс туй.

Ми, кык Вась, коркө сёрнитчылім нин, мый кутшөмкө өти луно асланым бур баянъясөн ас сиктсалы концерт петкөдлам. Эг вунөдчөй, кадыс, буракө, эз на во.

## АДДЗЫСЬӨМ

*«Со и вои, радейтан көть он,  
Менам сывйөй век на важ кодъ ён.  
Көть эг аддзы мусукасян луд,  
Вайи тэныд чукйөн петысь шуд.  
Гашкө, метөг мөдкөд окасин,  
Мый он шонты менсьым сёлөм дін?  
Сет жө китө, вом доръястө сет,  
Медым йөзыс вежалісны, мед», –  
Тадзи шуис мулы еджыд төв,  
Талун сыысь шудаыс эз вөв.*

## ПӨЛ ПИНЯ АД

— Пөл пиня адыд став лэч көлйөс орьөдлөма, – шуис төдса кыйсьысь.

Вот, вот, тадзи и сёрнитөны миянладорын – «л» вылө. Көл, вөл да пөл. Гөлбөчын пөл вылын малтөм көлдум пө тай, мукөдыс, «в» вылө сёрнитысьыс, сералө, а миян сиктсалы веськодъ – важ ногыс школөдоны. Ме челядьдырйи тадз жө сёрнитлі. Велөдчөм бөрад тай «правильнөй» лои-а.



Но бергөдчылам «пөл пиня ад» дорас. Вөлөмкө, сёрниыс көч йылысь мунө, коді төвнас, лым вывсяньыс судзө да, арнас лэчьясө пысавлөм пелысьсө нетшкө. Көвнас и сорөн. Кытысь ордас, мөд вонас быть лоө суниссө выльысь көртавны.

Ён вылө ме капрон сунис көртавлі, но и капроньд сылөн пиньяслы сетчис. Весиг вöсньыдик ыргөн сутуга орьөдліс. Но ыргөн сутугасө, дыр олөм вылө кө быттё, ог жө сөветуйт көртавлыны: омөля сетчө кыпөднысө сёр вылас да съолаыс энөвтө. Сэтчө жө и кайяс, оз вөрзы да, ёна гылөдөны.

Мый и пөл пиньыслы думыштны?

## ТӨВЛАНЬ

*Лым чир нин кыськө чуктіс,  
Дзик төвся кодь нин рөмыс.  
Мөд пөвста өшинь пункті  
Да гын сапөгөс дөми.*

*Плюш пинжак пыдди пөчө  
Фуфайка кыськө пыртіс,  
Кок мыськан кымынь вөчис  
Да ывла гусө тыртіс.*

*И кымыняөсь пыжгяс  
Ут вылын Эжва пөлөн.  
Куш мусө пиньөн-гыжйөн –  
Лун-мөд – и тшапкас төлыс.*

## СЁРМИС

— Эм-абу таво пувйыс Ыджыд сотчөмас? – юалис  
Епим Толя. – Тэ өд сәті ветлөдлан да төдан.  
Аски көсья кайлыны быттьө.

– Эг на ветлы да ог, бара-й, төд, – вочавидзи.

Сәті, гажа яг дорышөдыс, ләч туйөй мунө да сійөн  
Толяыс юасьө. Во куим сайын ме сійөс сәтысь вотчи-  
гас аддзылі нин, а кольөм воын Юрий семья вотчис.  
Өтчыд аслым и удайтчыліс вотны. Сиктсаянь матын,  
да төдысьыд өдийө сәтчө котөртө, а меным юрсиктсаянь  
на колө локны.

Толякөд сёрнитөм бөрын мөд лунас кайи, а ягыс –  
куш. Кодкө ли кодъяскө колода бокө ыджыд бипур  
пестылөмөн вотчөмаось. Төрытнас кузь лунтыр шливгис  
да, өдвакө. Сідзкө, водзынджык нин. Толя локтас да  
серамыс петас.



*Зэра төлыс морөсөдзым пырө,  
Тадз кө лоө, камнитас нин аски.  
Мичлун вылын тешитчыны дыр-ө? –  
Улыс дөрөм кежсьыс менам раскөй.*

*Мыйла, төлөй, тадзсө эськө вөчин? –  
Абу өмөй некодысь тэд яндзим?  
Эз өд раслы, меным шогыс мөрччис,  
Эз өд зэрсьыс чужөм менам вазыы.*



## ТУЛАН, МЕД ТЭ КУЛАН

Көтө тэ бөрд: лэч туйос кытшовті да, сизим съо-  
лаос нятшкөмаось. Юръяссө сөмын небыд суту-  
га помө кольөмаось. Медтө өтиос ли кыкөс. Татшөмыс  
тшөкыда овлө: то ачыс съөлаыс шпоркөдчигас ордчас,  
то кырныш сёр вывсяныс ли мусяныс судзодас, то пон  
нетшыштас. А өд сизимөс!

Витсө эськө тулан нуис – сылөн киподтуйыс: юрсө  
сөмын кольө, ни өти гөн он аддзы. А кыксө нө коді  
помалис? Юръяссө жө колис, но съөлаяссө нетшыштіс да  
сёрсянь неылын и куштіс. Тадзтө туланьд оз вөчлы.

– Вөчлө, – висьтасьөм бөрам эскөдіс менө быдторйө  
на велөдысь Öльөксей дядь. – Оз ставсө сөй да мөдыс  
кежлө колода улө дзебө. Гөгөрвоин кө эськө понтө кес-  
йөдны, колөкө, и аддзис.

– А ме енот вылө грекуйті, висьталан тай вөлі. Сійө  
пө миян пармаө матыстчис.

– Енотыд сінас сорөн съөласө нетшыштө да ставнас  
мачкылялө, – содтіс дядь. Водзө вылө төдны кута.

Тулан, мед тэ кулан. Та мында кыйдөс менсьым  
пайкин.

## ПЕТЫР ЯГ

*Видза олан, Петыр яг,  
Гажтөм меным лоис.  
Өні абу пув ни тшак,  
Прөстө сідзи вои.*

*Со тай бипур пестанін,  
Пузьөдлам жө чайсө,*



*Шонтам бура сьөлөм дін,  
Вөчлам сылы райсө.*

*Меным көч ни руч оз ков,  
Кок туйныс кө эм и.  
Пожём дзуас бурдас лов,  
Нюжалыштас нэм и.*

*Кольёма тай кыдзкө ді  
Дзикөдз чирсөм вөрас,  
Кыдзи колим китыр ми  
Джуджыд парма шөрас.*

*Эм тай эськө подув вөр,  
Тіллъыс вель жө мича.  
Чужанінөй, сьөлөмишөр,  
Енмыс тэнө видзас.*

## КАМЫШ

Дзолядырйи ме тайё быдмөгсө асланым Воч вож-са муясысь-ваясысь эг аддзывлы. Во сизим-көкъямыс сайын, кор деревняё бөр мөвпышти локны да Габовам арьи, Ёгор чөс туй помысь син улө усис. И өні сәні быдмө. Ыджыдсьыс-ыджыд да мичасьыс-мича пожөма ягысь вөрсө кыскыны бур туй вөчлөмаөсь да өтилаын бокас бура ыджыд гуран артмөма. Сэтчө бура джуджыд рос моз и петөма.


Кытысь воөма, төлыс ли, утка-пөткаяс вайисны – мун пө да и төдмав. Ме сәсся ас бергөдасысь некытысь эг аддзыв, бура ёна көть косөдыс тувччала, нитш вылын лайкъяла да ва визьясөд болска. Висьталөны, кор пө Зимстан посёлоксянь, бура джуджыда лыа да кө-

жа лэптөмөн, деревнялань вөр кыскан туйён локтисны, отар-модар бокас камышыс кёнсюрө петавліс жө, но өні оз быдмы. Ветліг-мунігөн ме нөшта аддзылі асланым районусть Пожөгө пыран туй бокысь, коді войвывлань-ынджык. Мыйла оз быдлаын быдмы, эг төдмавлы. Уна кө пө төдны кутан, водз пөрысьман.

Зато меным интереснө вөлі төдны, кызди комиодісны «камышсө», дзык быдтор өні комиодөны да. Видзөдлі комиа-роча словарө, кодөс кывчукөрөн шуоны, быттө сәні дас ли кызь кыв и эм. Юсьпөлян пө. Ботанической ичөт словарын сетөмаөсь сідзи, көні кызди шуоны: Эжва горулын – буглес турун, Сыктыв вожын – камыш, уткасись, Эжва горулын жө да Изьва вожын – юсьпөлян, юсьтурун, Эжва йылын – юсьтурин. Ме Эжва йылын ола да эг на кывлы, мед камышсө «юсьтуринөн» шуисны.

Мыйла юсьпөлян? Кыдз мен помнитсө, юсьпөляныс өд пөлян кодь и эм, сыысь чипсанъяс вөчалөны, а камышсьыд джодж чышкан рос, гашкө, позяс вөчны.

Олөмыс гудыр да ёна жө нин гудралісны и коми кывсө да ставнас коми олөмсө. Коркө ырмунасны, мый гажтөм сытөг, да сёр лоө.



---

*Пипу пыжөн ката чужанінöd,  
Кыркөти йылö петіс гажа яг*

---



\* \* \*

Чужанінысь кывза йöласö,  
Чужанінысь аддза вöласö.  
Чужанінысь көвта лысвасö,  
Чужанінысь кыла пытасö.

Чужанінысь öкта дзоридзсö,  
Чужанінысь вунда корöсьсö.  
Чужанінысь вота кольяссö,  
Чужанінысь посгя ёльяссö.

Чужанінысь кела юяссö,  
Чужанінысь гöра муяссö.  
Чужанінысь берта мыргяссö,  
Чужанінысь вена кыргяссö.

Чужанінысь корся сьылансö,  
Чужанінысь бöргя нылансö.  
Чужанінысь ошка олöмсö,  
Чужанінысь аддзи ме шудсö.

## КИПОДТУЙ

**М**иянладорын вöрад-ваад век на важ ногыс,  
кыдзи пöльяслөн на пöльясыс овлісны: быд



рөдлөн-вужлөн аслас чөс туй – бура кузь кытшов. Йөз-лы сэтчө нырсө дзик нинөмла суюны, көть эськө некутшөм тас абу. Тадзи шуөма гижтөм закон серти. Торкан сийөс – бур эн виччысь. Вөлі – олөм босьтлісны. Өні, дерт, небзьыштісны, но өта-мөдөс оз жө майшөдлыны. Бур йөзыс. А вежөртөмгьяслы и гижөм законыс – тшаква. Асьныс аслыныс помсө вөчөны.

Йөз угоддьөд он ветлы, но пув вотіггьясөн веськавлан. И со мый казялан: өтияс кыпыд лолөн, чукгья сямөн чөсгьяссө да лэчгьяссө вөчөмаөсь, а мөдгьяс, кыз шуласны, сөмын сөзлясьөмаөсь, син оз видзөд аддзанасө. Ме кө эськө сьөла ли чукчи местаын, лючки увйытөм да лыснас сорөн кольчаалөм сөр вылас эг кай ни пуртік вылө лөсьөдөм вужинь-вежынь чөслань эг матыстчы. А калинатө ли пелысьтө өшөдасны да, ылалөны бордаясыс. Дерт, оз сэтшөма, кызди бур вөралысьгьяслы, но векжө. Төндзи омөлика чер кутысь өти айлов опшйысис, мый дас өти чукчиөс нин пуртік вылысь вайис, но ог эскы, сы вөсна мый нэмөвөйся кыйсьысьгьяс шуисны: гырысь пөткаыс таво омөля пырө. Дай аддзылі ме опшйысьысьлысь вөчөмасө: вит арөса кага быттө дзоля черөн керасьөма.

Со мый сийө киподтуйыд: өтияс арся кыйөмнас, көзөд вылө пуктасны да, мөд арөдз яя шыдаөсь, а мөдгьяслөн Пөкрөв водзвывса лым моз бура көдздыгьясөдз на сылө.



*Пипу пыжөн ката чужанінөд,  
Кыркөти йылө петіс гажя яг.  
Тані, тані, чукыль вөчанінас,  
Коркө важөн вотлі пув да тшак.*



*Пипу пыжён ката чужанінөд,  
Визув юё усьё визув ёль.  
Тані, тані, өтлаасянінас,  
Коркө важён гылөдлі сус коль.*

*Пипу пыжён ката чужанінөд,  
Берег дорө лэччис кыддза рас.  
Тані, тані, мусукасянінас,  
Коркө важён вөчлі кырымпас.*

*Пипу пыжён ката чужанінөд,  
Чукъя шудыс сёлөмө оз төр.  
Татчө, татчө, медся гажайнас,  
Аслам кокөн котөрти ме бөр.*

## КУШТӨМ СЬӨЛА

**А**р пом. Бадь подулө корйыс гугнас гылалөма да, быттьө кодкө сьөла куштөма. Руд нисьё еджговат рөмыс му бердө лясмунөм турун вылын бура синмад чеччыштө, оз кө вөр йылөн сынасысь кымөръясө видзөдласыд крукась.

Збылысь өд сьөла гөн кодь. Лэч туй вылад кырныш коддьөмыд унаысь пуркөшитчылө да, синъясөй өткодьялісны. Вежөрам бөрынджык воис.

## КӨДЗДӨДІС

*Шонтысьё кымөрын төлысь,  
Быттьөкө шаллясьөм пөч.*



*Домтөг нин гулайтө вёлыс,  
Зорөдө төрөдчис көч.*

*Керкаяс – кыалань банөн,  
Лэбулын сералө пес.  
Кодикө өшиньын паніс  
Сө пөлөс чукыля вез.*

## ДОЗМӨР ВАРЫШ

**Р**евин косьт весьтын, утка видзөдалігмоз бура унаысь сәті муні да, кос коз пу йылын век дозмөр варыш пукалө. Ылын на ме, а йөткыштчө нин коз йывсьыс. Ружьей, көнкө, югнитлө да, аддзытөг оз ов. Но весьшөрө видзчысьө: ме сөйны позьтөмторьяслысь ловсө ог босьт. Вот эськө лэч туй вывсьым кө дөсадитчысь кырнышөс мойвиис лыйны – сійө мөд делө.

Мый и век тансө пукалө? Гашкө, таті визулыс ляпкыд да, чери кыйө? Эм на тай комыс этшаника. Чимиыд и. Сійө өд ещө на чөскыд.

Ме тай тадз чайта-а. Мукөддырйиис и тупйыв варышьяс танөсь. Тадзи сөмын вуграсысьяс өти йирө чукөрмылөны, кор чери сэтысь шедө.



*Тайө абу еджыд лым,  
Тайө – менам дөрөм.  
Сійөс вурис асланым  
Югыд парма шөрыс.*



*Тайö абу еджыд рас,  
Тайö – менам вöтöй.  
Сэни абу поти ни тас,  
Лолыштан и пöтан.*

*Тайö абу еджыд юсь,  
Тайö – менам сьöлöм.  
Лыясны кө – оз öд усь,  
Лэбзяс юяс пöлөн.*

*Тайö абу еджыд ныв,  
Тайö – менам бордйöй.  
Көн ог ветлы, көн ог сьыв –  
Бытьысь вайö гортö.*

*Тайö абу еджыд му,  
Тайö – менам ставыс.  
Видзас водзö коми ру  
Миян вöрыс-ваыс.*

## ЛЭЧ-ЧЕМПИОН

**К**ытшолоад лэчтö ветымын-квайтымын метра костөн вöчалöма. Коз пу улöджык, мед шедöм сьöла кырнышлы да зверлы синъяс улас эзджык усь да мед лымйыс водза-водз эз тырт.

Быдөнö киподтуй пуктöма, сьöлöмсянь вöчöма, но öтияс бура кыйöны, а мөдъясö ни öти сьöла оз тоньгöд-чыв. Таво чемпионөн лоис Кузь нюр пöлöнысь ягдо-рышса лэч: арбыдөн сэтчö шедис вит сьöла. Та мындаыс некутшöм лэчкö на эз шедлы. Ачым быдсөн шензи.

Кыйтөм лэчкыс абу мыжа. Шедө сэтшөм лэчкө, кодарынджык быдтысьö да олö сьöлаыс. Быд котырлөн тай аслас öктысянин.

Кодсюрö лэчка пуас, шедас да, пасйö. Ме – ог. Пуыс жаль. Пасъялöмаось да, быттö пистиён коньör висьöма. Окота кө тöдны, а паметъыд оз кут, сы вылö бумага эм. Со тай ме ручкаөн букваыссö гылöда.

Ог тöд, кодкө артавліс-ö, олөм чöжыс медся шуда лэчкас уна-ö шедліс. Павел Öньö висьтавліс, мый багыс пасъявлöма, уна-ö арбыдөн ставсö кыйлöма. Көкъямыссё да унджык сьöла пысасьлöма. Öні, парматö жуглісны да, та мындаыд абу. Но абу жö дзик кыйдöс-тöмось. Аттьö, вердыштö на Воч ковтысыс.



*«Кытысь нö тiянлы пев пом гыря пувйыс?»  
«Вотім тай, вотім тай Бiджыд сотчöм ягысь».*

*«Кытысь нö тiянлы пелыс кузьта сирыс?»  
«Кыйим тай, кыйим тай Кöйна дай йирысь».*

*«Кытысь нö тiянлы татшöм мича нылыс?»  
«Сюрис тай, сюрис тай öти пач вом дорысь».*

*«Кытысь нö тiянлы татшöм удал зонмыс?»  
«Аддзим тай, аддзим тай öти чöс туй помысь».*

*«Кытысь нö тiянлы татшöм сыланкывйыс?»  
«Качис тай, качис тай югыд эрдгяс вылысь».*

*«Кытысь нö лоанныд асьныд татшöм йöзыс?»  
«Олам да, вылам да гажа Коми муын!»*



## МЫРПОМ КӨР

**О**, кутшөм апалана, морөсө йиджана мырпом көрыс ар помнас Ёгор чөс туйпомса нюрын. Ачыс абу нин, а көрыс, көрыс! Нитшкас йиджөма да сэтись му шониднас кайө. Пывсян бөрын сэтөра чөскыд чай моз пырө и пырө. Нөгыль. Коддзөдө и пөткөдө. Во кежлө, мөд во та кадөдз.

Пушкинлы, Александр Сергеевичлы, лов петигас нин буретш да мырпом дум вылас усьөма, вомас сюйны корөма. Чөскыд жө вөлөма ыджыд поэтлы аслыспөлөс көра парма тусьыс.

Менам тайө зарниыс быд во эм. Кор этша, ачым ог и убөлитлы сөйны, меддона гөсьтлы сөмын пызан вылө лэпта.



*Аттьө, пармай – вердысь-удысьөй,  
Сьөкыд пөраө ловйөн кутысьөй.  
Эськө важөн нин тэтөг кулалім,  
А со водзө на олам-сулалам.*

*Мыйкө вотыштам, мыйкө кыйыштам,  
Мыйкө өктыштам, мыйкө лыйыштам,  
Мыйкө косьтыштам, мыйкө сольыштам –  
Өттор-мөдтор тай ставыс колыштө.*

*Дозмөр бордъя на стеныс керкалөн,  
Яя шыдөн на тасьті бергалө.  
Ог на вижөдөй, ог на пыкталөй,  
Ог на вошласьөй, ог на мыкталөй.*



*Водза-водз на век чеччам-кыпалам,  
Коркө нёрпалам, коркө гыбалам,  
Коркө бёрдыштам, коркө сылыштам,  
Нити под увсьыс моз көть да кылыштам.*

*Аттё, пармай – вердысь-удысьёй,  
Сьёкыд пёраё ловйён кутысьёй.  
Эськө важён нин тэтөг кулалім,  
А со водзё на олам-сулалам.*

## ПЫТШ

**М**ыйла, мися, сыліөс и сотыштіс, а өд чукчиөс кучшта да гөгөрвоны колө: сылөн пытшыс чеччыштіс да курччис. Сійөн өд и пуртікасьоны, мед дө-сидитчысьяссьыс мынтөдчыны. Дерт, и песни изьяссө кокалөны, мед чорыд сёян, лыс коддьөмыс, посняліс.

Морт вылад пө пөтка пытшыд дыр оз ов. Сідзи и эм. Öтчыд курччис да и эновтіс. Гөн пиө, көнкө, суныштіс. Сэні, дерт, шоньд, но некодөс курччыны – пом воас.

Урлөн пытшыд эм жө. Кулигас чеччыштлөны да чөсөдчылөны жө. И понлөн эм. Миян моз өд быд вежон да костас на оз пывсьыны.



*Лым усьліс, сыліс, бара усис,  
И бара сылө – кылөдас.  
Лым чиггяс гылалөны пусьыс,  
И төдчө менам чөс туй пас.*



*Дзик сирөд чагйысь бипур гора,  
Көть сөникасьом луныс сись.  
Пөсь чайсө ыркышта ёль дорас  
Да водзө кута пас да визь.*

*Ог төд, мый шудыс вольной светас,  
Но шоньд лолө, нимкодь дай,  
Кор мамө öшинь улө петас  
Да шуас: «Шедыштөма тай».*

## ПОНЛЫ ШЫД

Отпускалаг-кыйсигам мамө деревняө воліс. Видлыны, кызди ме тані жыкруйта. Аддзис, понйөө нянь сора перловка рокөн верда да, шуис:

– Тэ тай понтө морт туйө он пукты. Мыйла татшөм чөскыдтөма вердан?

И велөдіс Другойлы шыд пуны: куштөм сьолауткалысь юр-кокъяссө весалөм картофель да шыдөс сорөн пуны. А ме вөлі ульнас сета да өтчыдысьөн карчкөдас.

Збыльысь и шыд артмис, көть ачылд сөй. Ур кыйны куті да сылысь яйсө кульөм бөрас сідзжө пөртйө. Ещө на ыджыдджык аттьө, көнкө, нель кока өртөй висьталіс: уртө өд и йөзыс, кыз шуласны, за милую душу нямөны.

Кос куреньга кодь увтысьөй вөлі да төлысьнад быдсөн гөгрөсмис. Водзө чөскыд сөян корө, а менам отпуской помасис – вөравсис. Абу век Йөввыв, ковмас на и перловкасө нятшкыны.

## ӨНДРЕЁВКА

Өндрейёвка – тайё ёль  
Сиктсаянь верст кык сайын.  
Козъяс костод югыд воль  
Паськыдинё вайё.

Кыткё визлач, кыткё джум,  
Комыд ёна оло.  
Чёскыд черисъыс он ум,  
Сёян – нёшта колё.

Чудь тан овліс уна нэм  
Аслас шыён-горён.  
Налён моз жё чибльёг эм  
Вуджанінгъяс дорын.

Дивгя жё дай: койтысь тар  
Кутшём бура кылё.  
Өндрейёвка бокса ар  
Съылёмён на съылё.

Кыза лювгё шонді вый  
Вөр-пу йылё-бокё.  
Водзё олам, олам мый,  
Гортын, чойё-вокё.

## ЭСКАДРИЛЬЯ

Лэч туйын вөлі. Нитш подъяинті муні. Вөвлөм  
Лягыс, пөрөдомаось да, ерёмакань, нюрсялөма.  
Вель ыджыд восьсаин, сөмын бура джуджыд роска  
нин.

Муна, лөнь – и друг пельын шувгыны кутіс. Мый нө, мися, лоис? Син лапниті ли, эг ли – таръяс эскадрильяөн визънитісны да метра сизимдас сайө кос конда вылө пуксисны. Дас сизимөн! Та мындасө важөн нин эг аддзыв, көть эськө челядьдырйи мөдлапөвса кызд вылө комын-нелямынөдз пуксьывлісны.

Татчө эськө карабин. Увсяньыс йылөдзыс позьө гылөдны, горшыд кө паськыд. Но менам сөмын ружье, көть и дас кыкөд калибра. Контейнера, ылөдз лыяна ни өти патрон абу. Матыстчыны колө.

Ляпкөдчөмөн да видзчысьөмөн сөмын некымын воськов өчи, понйөй кыськө локтіс да буретш таръясланьыд рөдтыны кутіс. Сійө водзвылам муніс да, буракө, таръяссө и кыпөдіс. А тайө съөд бордаясыс понтө чукчи моз оз лэптыны – здукөн и лэбөны. Эшті чиршөдлыны понйөс: мися, мунан кө да повзьөдан, сьылідзиртө бергөда, но весьшөрө. И кызди и колө вөлі лоны – тарьясыд утөвтисны.

Пон вылам дыр на скөралі, но медбөрти лөньөді жө ачимөс. Мися, өдвакө верми матыстчыны, бур сайөдчанінъяс эз вөвны да. Зэв өд синма да пеля тайө пөткаыс – вөрын, пөжалуй, медся сюсьыс. Матыстчөмөн ружьеыс лыйөмнад гежөдлы сюрлө. Карабиннад, дерт, гылөдөны. Машинасянь туй бокыс лыйлөмөн да.

## ПАРМАСА ШУД

*Пукалам тэкөд, пармаса мортөй,  
Ог быттьө вөрын, быттьө дзик гортын.  
Трачкөдчө бипур. Кутшөм тан лөсьыд!  
Юыштім чай да, лэччө со пөсьыд.  
Та бөрын тэкөд сөрнияс панім,  
Шуин тэ меным: гортөй пө тані.*



*Лэчча пö сиктö – кыскö бөр татчö,  
Зэрыс көть шөтö, турөб көть гартчö.  
Эска ме тэныд, пармаса мортöй:  
Меным öд вöрыс – меддона ёртöй.  
Сийөн и помся сы йылысь сыла,  
Пармаса шуднас ола да выла.*

## ВАСА ВУРУН

**М**иянладорын ыджыд тыяс абуюсь, и посниыс лыда. Кулөмтö юывьса куръяясö да весиг лөнъ вомынъяс вылö вöйтавлам. Этшаникатö шедö чериыс, но и нюйтес пудйөн көвьясьö. Торйөн нин гожся нюйт. Быд син лоö чуњьяснад ниртыштны. Кулөмтö весалөм – чери кыйысьлөн медся ыджыд юр висьөм. Сöнысь кыём кулөмыд эськö öдйö да бура косьмö көть төв йылын, көть посводзын, но сөн бердас сирасьөм нюйтсö лун джын шарйылан.

Кыз нюйтсьыс мынтөдчигөн, кулөмсö кинад чабралан да, бус кыптö, ныр розьясад пырö, öтарö несйöдлö. Видзöдан да, кок улад турунвиж нисьö рудов вурун быглясьö. Тайö – нюйтес и эм. Шамыртан да – лөканьö, туруннас и корнас, ёгнас и лыанас.

И бара шарсьян-гылöдан. Дышöдмөн лолö. Эновтчылан да бара. Быть весав кулөм мичаммытöдз. Он кө – весиг йөрш оз пыр.

Позьö кө быттö вöлі васа вурунсьыс носки ли кепысь кыны, ок и уна гоз нин эськö петис – сы мында нюйт нин ме Воч ю пыдөссьыс лэпти. И лэптыны на ковмас, чери кыйöмыс бурдöдны позьтөм висьөм кодь да.



*Катөддөй менө көть райө,  
Корсьөй көть медмича му, –  
Пармаөс меысь он сайөд,  
Пармаөс менсьым он гу.*

*Пармаыс менам и батьöй,  
Пармаыс менам и мам.  
Пармасынь менам и статьяй,  
Пармасынь менам и сям.*

*Сы кодь ме варов и мелі,  
Сы кодь ме веськыд и ён.  
Сы моз жө сөнъяснам зэлыд,  
Сы моз жө сёлөмнам дон.*

*Сы моз жө элясьтөг ола,  
Көдзыдыс сотө көть вем.  
Сы моз жө кодлыкө кола,  
Сы моз жө помасьтөм нэм.*

## БОРДТӨМ «СЬӨЛАЯС»

**К**оскөй жугавны кутіс да веськөдчи пожөмъясыс моз. Пувнас и сорөн, терпитмөн лоис да. Абу нин өд кызя ли комына, мед юр лэптывтөг шарсыйсыны.

Видзөдлі, көнөсь-ө мекөд локтысьяс. Бура ылынөсь. Бытьё бордтөм сьөлаяс кокасьоны гажа ягас. Налысь тай зобсө восьтан да, тырыс пув. Быдсөн пөльтчөма кучикыс, тайкө потас. Лым усьөм водзвылын сөмын гар вылө вуджөны, гылалө вотөсыс да.



Пувйыс уна да, майбыр, вотнытө. Посниджык тай-а.  
Гожомнас косьтис да, пакталөма. Вөраинас эськө гырысь-  
джык, да дволяник дясөн сөмын кольөмаось, став ягсө  
пасьвартөмаось вөр лэдзысьясыд.

\* \* \*

*Вөрзью нин пөткаыс, нюрсаыс,  
Колясны дозмөр да тар.  
Дасаөс, сёаөс, сюрсаөс  
Лунтыр мен чилйөдлө ар.*

*Вөлисти озырма, тыдалө,  
Ёна и завидьтас сикт.  
Та мында сьөмыд өд лыдалөн,  
Гашкө, и өтнамлөн дзик.*

*Сөмын өд, веськыда висьтала,  
Нинөмыс меным оз ков.  
Тадзи кор вөрөдзыс письтыла,  
Сийө на-й кыпөдө лов.*

## ДАРӨВӨЙ-ВӨРӨВӨЙ

**Ч**өс туй вылө вотөдз Ёльөш ты пөлөн муна да  
Воч юыввса Каруш видз да Ёндревка курьяясө  
лэччыла. Уткаясөс видзөдала, удайтчылө лыйны.

Өтчюд удайтчис жө. Сөмын лөнь вөлі да уткаыс  
Ёльөш ты шөрын еджыд кынөм увнас гатшөн куйлыны  
и колис. Нинөмөн вөлі судзөднысө. Колис гортө резина  
пыжла ветлыны, а кадсө эз окота вөв воштыны, мед

пемдытөдз кытшолысь бергөдчыны. Рытнас, локта да, мися, судзөда.

Но рытнас, кызди и колө вөлі чайтны, уткаыд некусь эз тыдав. Эштылі жө эськө эжөр пөлөнсьыс корсьны да. Сөмын вөлі ты мөдар помысь вайөм ютшмөм колода кодь пыж, коді дзикөдз нин вөлі тырөма ваон, да ме чайті шогмытөмөн. Мися, Варполом Өльөксан дзикөдз шыбитөма сирпи кодь векныдик да дзибрөс пыжсө, а со кодкө, васө койөма да, уткатө судзөдома.

Судзөдіс кө – и сөйис. Горшас лы тасасьөмыс тай некодлөн эз кывсьыв-а. Йөзыдлысь босьтөмтортө ми-янладлорын дарөвөй-вөрөвөйөн шуөны. Некод на водзө сійөн абу мунлөма, сөмын «вөр» кыв нэм кэжлас көвь-явлөма. Ме ылөсала, коді менсьым уткаөс кажгис, но мед ачым и төда.



*Бура дыр өд кольсө лыддис  
Рытъя көкыс козъя вөрын.  
Нопйөс волысалөм пыдди  
Кывзі сійөс ордым шөрын.*

*Али вөрын кымын мырйыс,  
Лыддис меным позтөм көкыс?  
Сөмын важөн, челядьдырйи,  
Тані вөрыс вөлі тишөкыд.*

*Али, дырджык медым олі,  
Унджык восө меным долис?..  
Кытчө ветлі, кытчө волі,  
Ставыс сьөлөм пытшкө колис.*



## ЫТШҚЫСЬ

**Ы**влаыс төдчымөн ыркнитіс да кодкө менам вөйтасянінысь, Өндреевка курьяысь, эжөрсө ытшкис. Лёктор меным вөчис. Лэптигөн-вөитигөн эжөрыс куломө пырө да зэв деливө. Йөткылан, да бөр локтө, ваыс бергөдчыштө да.

– Ва шыр төв кежлө заптысьө, – висьталөмөс кывзөм бөрын шуис Өльөксея дядь. – Каруш видз курьяын «ытшкис» жө нин, куломөс лэптыны ог вермы.

Вөлөмкө, ва шырыд йирө эжөрсө да, ва турунсө да, төвъянінас пырлө. Сійө өд ош моз оз узь, сөйны мыйкө колө. Бура дыр дөсадитчис ытшкөм колясыс, кытчөдз ва нырыс эз кылөд ю пидөсас.

## КУРЫД ЖОВ ПУ

*Курыд жов пу тэ – калина,  
Курыд жов пу – биа роз.  
Дзыкөдз сотін сьөлөм дінөс,  
Ог төд, бурдас али оз.*

*Ме өд чайті: вомын сылас  
Гожөмбыдөн небзьөм тусь.  
Ме өд чайті: енэж йылас  
Оз на бөрддзы еджыд юсь.*

*Өмидз эськө юмов вөлі,  
Да эг вотышт вежны вом.  
Бипурнымөс кынтіс төлыс,  
Колис сөмын сэрапом.*

*Курыд жов пу тэ – калина,  
Курыд жов пу – биа роз.  
Дзикөдз сотін сьөлөм дінөс,  
Ог төд, бурдас али оз.*

## КЫК КӨЧӨС ОЗ КЫЙЛЫНЫ

Утка кыйигмоз ю пөлөн муні. Өксава тыла весьтын берегыс россялөма. Ковмис яг дорышланьыс кайны. Сьөлаяс жбыргисны. Видзөда: сыв дас сайын кыкөн дзик орччөн рос йылын пукалөны. Радла: кыкнанныс менам – татшөм матіниксьыд веськала, небось. Метиті шөракогтас, мед өтпырйө кыкнанныс усясны. Уткаяс тай кор чукөрөн ва вылын пукавлөны, витөдз-квайтөдз усьлөны.

Лыйи, косялі енэжсө, но некоднанныс эз усьны. Пукаланінөдзис ветлі да гөнторъяс сөмын муас. Ёна чуймалі, мыйла эз усьны, да бөрынджык гөгөрвои: дрөб зарадыд өд матіас пуля моз на мунө, со и кык сьөла костөдыс швачнитіс, а эз разав. Код дортіыс кө матітіджык шутөвтөма да гөнсө сөмын нетшыштөма. Бура важ йөзыс шулөмаөсь, мый кык көчтө оз кыйлыны.

\* \* \*

*Байдөггясыс бадьяс сайті  
Лойөмаөсь – визьыс тыр.  
Өтиөс ме шедны чайті,  
Да эз лэчкам некод пыр.*

*Тэрыб кӧчьяс кыдзьяс сайті  
Юждӧмаӧсь – морт оз вӧй.  
Ӧтиӧс ме шедны чайті,  
Да ӧд абу, вӧлӧм, йӧй.*

*Наян ручьяс козьяс сайті  
Уйӧмаӧсь – быдса туй.  
Ӧтиӧс ме шедны чайті,  
Да эз дона юрсӧ суй.*

*Мича нывгьяс керка сайті  
Шодлӧмаӧсь – лымйыс лы.  
Ӧтиӧс ме шедны чайті,  
Да тай колис шодлыны.*

## ХОРЬ ВӖЛӖМА

**К**уничалы капкангьяс пуктавлі да кутшӧмкӧ тӧдтӧм звер шедӧма. Дзик жӧ кунича кодь, но виж нисӧ еджыд гӧна, юрланьыс да бӧжланьыс сӧмын сьӧд, сэтчӧ жӧ куничаысь дзоля. Деревняын эз тӧдны, мыйсяма олысь тайӧ. Кулӧмдінын бур кыйсьысь Ӧльӧксан Попов книга лэптылӧмӧн тӧдмӧдіс: миянланьын гежӧда паныдасьлысь хорь тайӧ – тулан сикас. Дзоля да, пиыс на. Бура ыджыдӧдз быдмӧ, кузь да кыз калбас кодь лоӧ. Ӧти котырас сизимӧдз овлӧны. Ягвылынджык олӧны, но зэв бура и ваын уялӧны. Кунича моз оз шодлыны, ӧти местаынджык олӧны. Сідзкӧ, сам вылӧ и мукӧдгьяс вермасны ыштыны. Мича шапка эськӧ Дзолльысь Виктор Лебедев вурис.



*Оз төлыс лымсө важ моз гарт,  
Оз сійө гудырт выв ни улыс.  
Өд воис войвыланым март,  
Өд воис войвыланым тулыс.*

*Мед джуджыдкодъ на гөгөр лым,  
Мед кыз йи улын узьö юыс.  
Но коркө весьöпөртас гым,  
Өд кылам нин, кыз садьмө муыс.*

## ЖЕНЯЛЫ КОЗИН

Лэч туй вылысь локтигөн, деревнялань матыстчигөн нин ю дорө кежи да Иван видз горулысь уткаос лыйи. Ранитчис, лэбнысö оз вермы, суналигмоз горув кутис лэччыны. Лыйны эськө, да патронöй сибдис. Пуртөн и черөн видли шедтыны – весьшөрö. Ош вылө кө вöли быттьö петöма, важөн эськө косявлис. Тильсигкостым кодкө кылö ружьеысь шковгис, менсьым уткатö гатшöдис. Сидзи и эм: Женя дзоляджык Öльöксан вокыскöд воча. Уткатö тасма бердас көртыштöма нин.

– Меным сетан али аслыд кольöдан? – юала Женялысь.

– Мыйсö? – оз гөгөрво сійö.

– Уткасö нö, – шуа ме да висьтала, кызди-мый вöли делöыс.

Женя шуö:

– Ме нö мыйөн төда, мый тэнад тайö уткаыс?

– Лыйöмсö нö эн кывлы?

Женя оз куж, мый шуны, да шыася ачим:

– Месянь козин. Шыдсö панявны чукöстлы.

Нюмъялөмөн водзö туй кутам.

---

*Менам потшӧсӧй ӧдвакӧ пӧрас,  
Сӧйӧ – нэмзясӧн сулалысь вӧрыс*

---



## ОҚТАБР ПОМ

*Став корйыс кыдзлөн гылаліс,  
Дзик пасьтөм, сьөлөмиөр.  
Йи кутліс и бөр кылаліс,  
И лымйыс сыліс бөр.*

*И бара няйтсө куралам,  
И бара шлячкө слөт.  
И турипув на сюралө,  
И видз вылын на скөт.*

*Но регыд ывла ыркалас,  
Но регыд кутас йи.  
И енэж лымйөн пыркалас,  
И радөсь лоам ми.*

*Ми тадз жө радлам тулыслы,  
Кор воас төвлы пом:  
Өд томось ми, кыз шуласны,  
Кор кадыс выль да том.*

## КЫЙТӨМ СЬӨЛАТӨ ЭН КУШТЫ

**Л**эч туйөд муна, шедөм сьөлаяссө өкта. Ылісянь  
ааддза: өти лэчкө шедөма да борднас сорөн гарт-

чөма, быдсөн кольча вылас лэптысьөма. Думысь ноппё нин сюя. Воськов-мөд вөчи, «шедөм» сьөлайд – жбыр. Кольча вылас, вөлөм, пукалө. Эг кө на слөймы локны, гашкө-й, лэччис сёр вылас да шедіс. Сёр вылас пукалөмсө унаысь нин аддзылі, а кольча вылас – медводдзаясь на. Сы вөсна и ылалі, кыйтөм сьөлаөс «кушти».

## ШУД

*О, кутшөм ыджыд сыын шуд,  
Кор асъя зэрыс унтө босьтас,  
Да аддзан өшинювса луд,  
Кор өшиньястө гурйыв осьтан.*

*О, кутшөм ыджыд сыын шуд,  
Мый аслад чужан муын олан,  
Көн сёян совсө уна пуд,  
Но некөр та вөсна он солась.*

*О, кутшөм ыджыд сыын шуд,  
Мый чужан мутө шаня кылан,  
Көть енэж овлө сьөд и руд,  
Тэ сьылан, сьылан, сьылан, сьылан.*

## ЛЫМКАЙЯС

Сьөда-еджыда арпомся бобувьяс син водзө петисны, важөн нин пөрөдөм яг местаө чепөсйөм рос вылысь жбыркнитисны. Лымкай гозъя вөліны, вөр петкөдан вөвлөм туй весьтөдыс суналөмөн бура дыр лэбзисны, сьөда-еджыднас син водзын пөртмасисны. Понйөй быдсөн вөтчыны босьтчыліс.



– Йөймин али мый? – шуа сылы. – Мун да дозмөрөс корсь, мый тайояс бөрся вөтлысян.

– Мичаоьс да, видзөдлыны окота вөлі, – Другөй видзөдласнас шуис.

Ме сійөс гөгөрвои.

## Ю ДОРЫН

*Дрөж босьтис шонди петигөн ю дорас,  
Но муна өмөй сиктө? – Он-ө босьт...  
Өд менө татчө важөнкодь нин корис  
Ва турун бөжа, гульчунь изгя косьт.*

*Тан сөмын бурдө пикө воөм лолөй,  
Кор меным весиг луныс – пемыд вой:  
Өд, овлө, ачым шогмытөма ола,  
Өд, овлө, йөзыс вөчалөны дой.*

*Кор тани өтнам бипур дорас узя  
Да пытикө кыска чужан мулысь көр,  
Ме көсгя овны мичаа да кузя  
Да эска, ставыс ладмас на мый бөр.*

## ЛОКАТОР ПЕЛЬ

Уткаяс пөвстын гордаысь пеляджык өдвакө код-кө эм. Ты ли ю пөлөнті сайөдчөмөн часнас өти воськов вөчан, ва турун пөвстөдыс кынөм ыркавтөдзыд кыссиян, а өд кылас матыстчөмтө, оз сибөд лыйны.

– Пельыс локатор кодь да, дерт, – шуө Öльөксей дядь. – Интересуйтчы да видзөдлы мөдысь: збыльысь өд ыджыд пельыс.

Таво эз и удайтчы лыйны, рамджык турунчөжъясөс  
гылөдышти. Коркө кө сюрас лыйны, бытгысь видзөдла,  
мыйсяма пель сылөн.

## ВЫЛЫСЬ АДДЗЫСЬӨМ

*Чужан сиктөй, Эжва юйй,  
Менө вошөмөн эн шуйй:  
Дыркодь бокин олөм лои,  
Өнi дзикөдз гортө вои.*

*Кыддза раскөй, кыддза раскөй,  
Абуөсь тай кок туйясөй,  
Быдмөмыд тэ выветi ёна,  
Эн вай төдтөмт: век тэ дона.*

*Заравадй, заравадй,  
Челядъдырся менам мадй,  
Важ мозыд на чөскыд, юмов,  
Чибльөгөн көть эськө гумовт.*

*Чужан муөй, чужан муөй,  
Сьөлөм пышкам радлун тую.  
Тэ көть вермин овны метөг,  
Но а мен – дзик некыдз тэтөг.*

## ВЕК ВЕЛӨДЧЫ

**Ч**айтан, быдторсө нин төдан, а збыльвылас зэв  
этшаника. Öндрей Öльөксан Вась, меысь том-  
джык, висьталіс, мый лымъялөм бөрын дозмөр пуртікь-

яссө роскөн чышкылө. Лымъялөм бөрас пө ёнджыка шедлө, весалөм купайтчанінас локтө да. Васьлөн зэв бура кыйсьысь бать вөлі да, дерт, тодас: вит арөссиянь чөс туй вылын. И менам мөд бур төдса Толя Ёльөксан вөралөм йывсьыд зэв жө унатор төдө. Сійөс батьыс чөс туй вылө куим арөссиянь босьтлөма. Мудзас, вөлөм, дзоляникыд да, нопъяс пуксьөдө.

Ќитор ачым гөгөрвои важ йөзлысь видзөдлыны. Ас ног тулан капканъяс пуктавлі, да өти вөлі сутуганас орөдчөма, капканнас пышйөма. Капканас көрталөм сутуга помсө колө вөлөм сёр вылас көртыштны, а ме пуас көрт тувйөн швачөді. Туланыд шедөма да коз пу резювьяссө ставсө чегьялөма, пессигад сутугатө унаысь нюгыльтлөма, да сійө орөма. А сёр вылас кө көрталі, кызди важ йөз вөчлөмаөсь, эськө пуөдзыс эз судз да тоньгөдчис сөмын.

## ПОЖӨМ

*Пожөм, пожөм, Эжва йывса пожөм,  
Тэөн, пожөм, нимкодяся пыр.  
Мича тэ, кор туган йылад гожөм,  
Статя тэ, кор төлыс сүйө ныр.*

*Кувлытөм тэ, позьө шуны, пуйй.  
Пөрөдасны – олөмыд оз ор.  
Со тай кымын керка чужан муйй  
Садьмөдөма шонді петандор.*

*Аттё тэныд, олөм сетысь пуйй,  
Нэм помөдзыс быдөнлы тэ ёрт.  
Весиг со өд, морт кө пырө гуй,  
Тэысь вөчам сылы крест да горт.*



## ПАЙКЫСЬЯС

**Б**ыдөнлөн кынөмыд сюмалө – мортыслөн и ловъя лолыслөн. Кыдзи кужоны, сідзи и пөткөдчоны, весиг гусясьомөн. Мортыд шышнитас да унаысь он и төд, коді кузькиасьома. А зверыд да пөткаыд пөшти век «киподтуйсө» кольоны. Лэчкө кө куш юрыс сьөлалөн кольома, сідзкө, тулан матыстчылөма. Дозмөрөс кө куштөмаөсь да корпа югзытөдзис вильөдөмаөсь – тайө кырнышъяс. Көчлы кө кынөмас пыралөмаөсь, сідзкө, шыръяс. Этшаникатө пайкөмсьыд ёнасө он дөзмы, а кор яндзим төдтөг горшасясны, грөзитлан: «Часлы, сюрлан!» Но кырныш коддьөмыд оз сюр, көть кызди сюсяв. И енот сяма понтө кыймөн. Туланыд жө капканад шедлас-а.

## ЛӨСАС

*И вөчөм ордым тырө вөрөн.  
И медым пармаын эз вош,  
Пыр мортыс лөсас кольө бөрас,  
Кызд кольө сийөс төлка ош.*

*Ме ветла аслам жө нин туйөд,  
Мен важөн воис сэтшөм кад,  
Кор черөс лаз бөрвылө сюи  
Да муні сәті либө тат.*

## АБУ ВА ШЫР, А ВУРД

**Ө**льөксей дядь элясис: Вуграсян йирө пө йи улас кулөмгъяс вөйтлывла да кодкө непөштө черисө



сөйө, но и кулөмыслысь сюрөссө весиг орьөдлө. Ва шыр  
 вылө грекуйтис. Лэпталім кулөмъяссө, мед дзик нинөм  
 абуө эз вөч.

Ме нинөм эг шу, но думышти, мый өдвакө ва шыр  
 пакөститчө. Öти-кө, сынөдтөг ва пиын сийө дыр оз ов.  
 Мөд-кө, черитө оз сөй. Став сертиыс, вурд пакөститчө.  
 Буретш йир горулас рыысь йи вылас петалөма, визув  
 вывсыс кыйсьөм бөрын пөт кынөмөн шойччөма.



*Тэ мыйла, мортөй, татшөм скөр –  
 Став бурсө вины кыптө лолыд?  
 Со тані сулаліс том вөр.  
 Но сийөс керавны мөй коліс?*

*Со тані вөлі дозмөр койт,  
 А өні – няйтө пөрөм керас.  
 Кыдз тэнсьыд сьөлөмтө оз дойд,  
 Мый кутчысин тэ тані черас?*

*Тэ аддзан: ляпкалө век ю.  
 А мыйла? – Абу матын вөрыс,  
 Көть вөлі коркө быттьө зу,  
 Да вошны позис парма шөрас.*

*А йөрасө эз мөд жө кый,  
 Öд тэ жө вөрас медкузь киа.  
 Мый шуан челядьыдлы, мый,  
 Кор ставсө өтитөг дзик виан?..*

## «БАБ, БАБА»

Тайё нюма серпассө Кулөмдинса Өльөксан вись-талис. Гөрд юра косысь утка эм. Лэбө айыс да «Баб-баба!» горзө. Дон ты бокысь нималана хирург Пётр Иванович Игнатовөс коркө аддзөма, да сийө серамсорөн ас ногыс гөгөрвоөдөма: өти бабникөс пö лыи – яндзим төдтөг лун шөра лунө пöлыслы водны тшөктө, «Баб, баба!» шуө.

## ВЫЛЬ МОЙД

*Выль мойдыс заводитчө сэн,  
Көн бипур мичаника öзйө,  
Көн төдтөм ёлыыс тэд и мен  
Сөдз васө сьөлөм дорө вөзйө.*

*Выль мойдыс заводитчө сэн,  
Көн вөчан чомгяс либө вонгяс,  
Көн чөскыд унтө видзас Ен,  
А лунсө юртасны понгяс.*

## ЧУКЧИЯС – ШОЙНА ВЫЛЫН

Өльөксея дядь Борис зятъыскөд турун ваялигөн чукчиясөс аддзылөмаөсь. Дзик деревня дорын, сө метра лоө ли оз, шойनावывса пожөмгяс вылын вөлөм пукалөны. Вөлөн мунөмаөсь сингяс водзаныс да абу весиг вөрзьялөмаөсь. Борис ырсмунлөма ружьела котөртлыны, но дядь өлөдөма: шойна вывсьыд пö оз позь лыйны.



А ме коркө лыйлі урөс. Лун вөлі да эг, көнкө, садьмөд мөдарьюгдө мунөм войтырөс, олісны нин, төдөмысь.

Сідз кө нин шуны, и мукөд звер-пөтка, вөрыд матын да, деревняөдз пыралөны. Көчьяс өшинь улын йөктөны, урьяс керка пельөсөд кайөны, тарьяс мир туйбокса эндөм му вылын койтөны.



*Эм сус и кыз, эм пипу, ныв и пожөм,  
Ас туйас ставыс колана да бур.  
Көть лоны эськө өти пулөн вожөн  
Да пармалысь жө босьтны аслым нур.*

## МУСТАНГЪЯС

Деревнясалөн да орчча Дзоль сиктсалөн вөвьяс-ыс, быттьө кидмөм вөвьяс-мустангьяс, тулыс-нас гөрөм бөрын лым усьтөдз вөля вылынөсь. Турун да пес ваявтөдз некыз сэсся оз уджөдны, весиг турун пуктигөн. Лөддзыс да өвадыс пө виас – жалитөны. Откымынгьяс вөрө-ваө мунасны да корсьысьмөн лолө. Көзьяиныслы весиг өдва шедөны.

Сөр арнас, өтаваыс чорзяс-вижөдас да, дась турун вылө уськөдчөны. Зорөд потшөсьястө кисьтөмөн-кисьтөны, оз тай ков велөдөм. Быдсөн пиньнаныс курччөмөн потштө вештөны. Мукөд зорөдсьыс нинөм оз кольлы, оз кө көзьяиныс казав вөрө-ваө петалигөн.

## ЛОВЗЯН КАД

*Ю вылын йшыс дзык нин сись,  
Син лапнитан – и вөрзяс.  
Тіль пожом дын котшкө сизь,  
И катша сэн жө гөрсьө.*

*Сус вылын долыдмис и перк,  
Көть важөн бырис коллыс.  
И көчиль радлө өни, дерт,  
Мый көдзыд төлыс колис.*

*Сё пөлөс звөна рас и яг –  
Өд ловзян кадыс воис.  
...И лэбзьö чергяс улысь чаг –  
Выль керка сиктын лоас.*

## ЭЗ ВОЛЫНЫ

**Д**озмөр койт вылө апрель помнас пыри рытсаянь-ыс. Сёр нин вөлі. Эз кут тыдавын да быдсөн бедь йылын сямөда биён бөръяпомыс восьлавны ковмис.

Лөнь да шоньд вөлі, а вой шөр бөрын төвзъысис да йирмөг босьтис. Көть бипур песты, но койт шөрө өд он биась. Ыджыд коз улө йөжгыльтчи да нырөс весиг вичик улам пөтка моз суйи. Кокөй көдзалис. Одва югдөмсө виччыси. Но чукчи ни вийөр некөн эз вөрзьөдчы. Вешйөма, тыдалө, койтыс мөдлаө (овлө татшөмыс) либө лыйөмаось көзяинсө да некодлы ыджыд семьясө чукөртны.

Ыджыд бипур песті да медводз шонтыси. Бөрын-джык пөсь чай ырски. Сьөлөмөй бурмис. Оз век лизгы, кыз миянладорын шулөны. Ме та дорө велалі нин да ог няргы.

## НЮР

*Нюрсө косьтыны ми шум  
Да и косьтім,  
Вирсө кушодз сылысь юим –  
Сөнсө восьтім.*

*Чайтім: петас мича турун –  
Воййыв петіс.  
Артмис нөшта өти дурөм  
Вөльнөй светас.*

*Нюрыс абу, турун абу,  
Пув он чукөрт.  
Синва сорөн видө бабө:  
– Гундыр чукөр.*

*Тури кельөб лэбис ылө  
Гажөн-пирөн.  
Лягушалөн броткөм кылө:  
– И-и-рөд, и-и-рөд!*

## БИПУРА ВАРЫШ

Уткаыс мортислөн гортөдзыс абу воөма. Ю кыр йылас варыш моз и куштөма, тырыс гөн. Кольөм вося турунас сибдөма да төлыс весиг лэбөдны оз вермы. Бипур пестылөма да, видзөдөм серти, жаритөма. Куш «Троя» доз туплясьө да, көнкө, закуситіс. Чөскыда, дерт, кылаліс.

Тырыс өні вөр-ваад татшөм варышыс. Наысь и пө-гибө воөма олөмыс.

## ДОНА СЕРПАС

*Катшасингъяс йөктөны видз вылын,  
Ворсө налы тэрмасьөмөн чирк.  
Ачым весиг йөктышта и сыла,  
Кокньыдика ветлө сөнын вир.*

*Кымөрыслөн паськыд еджыд дөрөм  
Пожгъясө лөнъ юын вель нин дыр...  
Кыдз нө таысь, гортысь ветлөм бөрын,  
Кыдз нө таысь менам гаж оз быр?..*

## ВИТАМИН

**В**өрысь электролиния вылө петі. Во-мөд сайын бульдозерөн ныръялөминас вель ёна рака куз петөма. Кынөм сямалис да вомө сюялышті. Зэв на и лөсяліс. Челядьдырйи ныма сөян вөлі. Ноп тыр вотан да гортө вааян. Мам кузъя пирөг пөжалас, выйөн мавтыштас да синмыд кылалө. Сөйлім сідзжө коляоз, ли, гөнян, бобөнянь, пикан, шомакор да уна мукөд петас. И некор эг висьлөй, сы вөсна мый быдсяма витаминис вөр-валөн чөскыдторгъясас.

## ТУЛЫСЫН

*Олөмсө олөма-вылөма...  
Паметьын – ичөт на кор:  
Лымйыс и сөнікыс сылөма,  
Солькзясө юнымлөн дор.*

*Пыдөстөм енэжыс лөсталө  
Мамөлөн чышгъяныс моз.*



*Вундала, стружита, лөсала –  
Вөча скворечьяслы поз.*

*Лапасө син вылас тэчалө –  
Шондйысь мынтөдчө кань.  
Абутөм поти вомөн чеччалө  
Вөлясьыс коддзыштөм чань.*

*Кодлөнкө гудөкыс чөлалө  
«Русскöй», и шызьöма рас.  
Лунвывсянь войвылас төлалө,  
Шоналам регыд нин, час.*

## ГУЛЮЯС

**И**ван видз потшөс дорө матыстчигөн казялі:  
видзшөрса гөп пөлөныс абу-ө уткаяс? Мөв-  
пыштигкості кыпөдчисны. Вөрса гулюяс. Ок и сьусь  
синмаөсь да пеляөсь, ньөти оз сибөдны. Абу карса  
гулюясыд, кодьяс кок улын бергалөны. Мый эськө и  
повны? Миянладорын оз на найөс сөйны. Сьөла-доз-  
мөрыс на тырмө.

\* \* \*

*Бара тулыс йылысь висьтөй,  
Көні шонді, көні шор,  
Көні енэж лунтыр кисьтө  
Вөр-ва весьтысь лэптөм гор.*

*Дзолядырсянь сійөс төда,  
А век дивгя, а век выль.*



*Быттьö чöскыд унмысь пöта  
Да и томмыла на збыль.*

*Сьöлöм эскö сöмын бурö,  
Синмöй аддзö сöмын нюм.  
Меным кывбур бара сюрö,  
Сыысь некор тай ог ум.*

## ПЫШЙÖМА

**П**өрөдөм могысь берег дорысь мой сэтшөм пипу бөрйö, кодi валаныс нөрöма. Кокньöдчö, мед оз ков ылісянь кыскавны. А тайö пипуыс видз вылö швачкысьöма. Кöчьяс төвнас еджыдöдз гогналöмаöсь. Артмöма тадзсö сы вöсна, мый пуыслөн дiныс коса пу кодь да мöдарö катовтöма-пышйöма. Татшöмторьястö, буракö, оз вежöрт зверыс. Мортлы оз дöвгы-а. А гашкö, төв пöльыштiс.

\* \* \*

*Рака кодöскö да ёрö,  
Сійö öнi ёна гора.  
Сiдзкö, кöдзыд тöлыс колис,  
Лöзöдасны юыс-ёльыс.*

*Катша вель жö гора кылö,  
Локтö весиг кильчö вылö.  
Менö ышöдны кö волö, –  
Менам сытöг югыд лолöй.*

*Майбыр, гажа шонди улын –  
Тулыс горөдчис өд, тулыс!  
Регыд сәсся гудөк кылас,  
«Шондибан» да мый да сылас.*

## БӨРДЫСЬ ЗОРӨДЪЯС

**У**тка кыйигмоз бура вылісянь ләччи Воч да Кулөм юясөд. Кодсюрө төвбыдөн абу слөймө-ма вайны турунсө, да увтасінъясын зорөдъяс ва пыннин вөліны. Ме кылі, мый найө бөрдисны. Али тадзи ывлаыс кыліс?

\* \* \*

*Коркө и жөлөбысь войтваыс орөдчас,  
Лымйыс оз нөбав ни усь.  
Коркө и енэжын шоныда горөдчас  
Гортөдзыс воөдчөм юсь.*

*Коркө и войясыс лун кодьөсь лоасны,  
Кытчө көть, майбырөй, мун.  
Коркө и асывнас гортаныс воасны,  
Кодгяслөн паляліс ун.*

*Коркө и енэжыс челядьөс кисьталас,  
Өдийөджык быдмасны мед.  
Коркө и кытөнкө тэныд ме висьтала,  
Мыйкө ме висьтала тэд.*

## КЫК КОКА КӨЧ

Кайи Керөсө медводдза тувсов веждо вылысь кочьясөс кыйодны. Сайодчи вөвлөм чумали майөг видзан чом местаө сяркнитөм кызьяс да бадьяс костө. Пув ва рөма шонди надзөникөн лэччис вөр-пу сайө да өкмыс час бөрын рөмдіс.

Часлы, мися, эсийө пөрөдөм пипуяс дорас кузь пельыд и петас. Но петис эз сэтчө, а горулөджык. Вөлі кык кока да ёна ыджыд. Варполом Ольөксан ме моз жө кочла локтөма. Воча петі, мед плешкам оз колскөбты. Сёрнитыштім да отарө-мөдарө нин мунам вөлі – кочыд петис буретш пипуяс дорад. Ольөксан матынджык вөлі да, мися, лыяс, а сийө матыстчыны коч дорад кутіс. Көсөйыд йөй али мый? Бөр утөвтіс вөрас.

Нелямын метра сайысь кө нө он лый, мый ылнаысь сэсся лыян? Но ме Ольөксанлы нинөм эг шу. Колөкө, дрөб пыддиыс анькытш вөлі да?

Некодөс сэсся эг аддзылөй. Öдийө и пемдіс. Геждөда аддзысьлам да варовитігмоз бөр лэччим сиктө. Варгөмсөыс и пуам шыднымөс, оз кө асывнас юква вылө, кулөмгьяс вөйтлім да, чери шед.



*Шонди улысь места сюрис,  
Көні кыпыд менам лов.  
Сөмын тані ыджыд бурыс,  
Сэсся нинөмыс оз ков.*

*Тані ола, тані кыла,  
Кодлы – лёк да кодлы – бур.  
Тані шогся, тані съыла  
Да ог янөд ассөым юр.*



*Тані кола, тані шуда,  
Тані менам мойд и вѳт.  
Тані кувтѳдз овны кута  
Пыдди пуктан йѳзыскѳд.*

## СЯМТѳМЪЯС

**В**аж электролинияыс россиялѳма да кодкѳ сы пѳлѳн лѳч туй лѳсьѳдѳма. Тѳрмасьѳмѳн, челядь моз. Вѳснъыдик лемень сутугаысь кольчаяс кызд веськалѳ гартыштѳмѳн. Татшѳмад омѳля пѳткаыд сетчѳ.

Во-мѳд абу нин матыстчылѳма да ѳдвакѳ водзѳ вѳдитас, а сямтѳмлун йивсьыс паметьсѳ кольѳма. Тырыс ѳнѳ татшѳм сямтѳм войтырыс вѳр-ваын. Уджыз абу да, кужѳны и оз, кынѳмпѳт перйѳны, лѳксѳ зѳв уна вѳчѳны.

\* \* \*

*Сьылѳ морт, мый шонтѳ сылысь лов,  
Мыйысь лѳсьыд сѳлѳм вылас сылы.  
Коми муын горзыны оз ков,  
Коми муын горзытѳгыс кылѳ.*

*Миян вѳрын-ваын векджык лѳнь.  
Гашкѳ, сѳмын буавлѳны тѳвзяс,  
Да лѳз гудырсайса вира вѳнь  
Жвиньйѳдлывлѳ сѳѳдас биа вѳньяс.*

*Коми мулѳн лолѳ пыран гор,  
Сѳтысь шѳпкѳм турунзяслѳн кылѳ,*

*Сэтысь кылö, кыдзи дзольгö шор,  
Кыдзи шондi вартчö вөр-пу йылö.*

*Яга ёлын абу маргямоль,  
Сэтчö чукчи галя изла волö.  
Некор съёлöм съылантöг оз коль,  
Чужанiнад сöмын овны колö.*

## СЮЗЬПИ

Өндрёвка вомбокса турун зорöд вылын пукалiс сюзьи. Казялi пыж лэптöм бöрын юладорсянь локтигөн.

– О-тё-тё, кутшöм дзояник! Бать-мамыдлөн син улысь, көнкö, пышйин? – дзик нин матыстчи лэбачпилааныс. – Лок мекöд сиктö лэччам. Игорьь внучоккöд кутанныд ворсны. Сийö тэ кодь жö дзояник на. Дерт, бордтö корсюрö нямравны вермас, визулиник зонкаыс да.

Сюзьиыд, тыдалö, повзис татшöм другсьыд да исквтис зорöд вылысь орчча вөрö, дзояник бордъяснас катласигмоз. Мед сэнi аслас чой-воккöд ворсö. А ме Игорььлы ворсны выль чача ньöба. Сийö машинаяс радейтö.

\* \* \*

*Эжва вöли бура джуджыд –  
Эз на лöньлы арся зэр.  
Но öд йöра сийöс вуджис,  
Повтöм вöли ыджыд звер.*



*Горулынджык чери кыйи  
Да и аддзи татшөмтор.  
Юсьыс йөра петіс мыйон,  
Эз өд мудзөмысла нёр.*

*Пыркнитчис да вөрө пырис,  
Водзө ылыстчыны мед.  
Сьөлөм кыпыд рудн тырис,  
Көть и чериыс эз шед.*

## КУЛӨМЫН – ШЫРЪЯС

**П**рамөйджык черилы ён вылө гырысь синма  
Капрон кулөм вөйтi, а эг «нямөдсө» – Китай-  
ын ли көн вөчөмасө. Өкмысдас метра кузътасө эг и  
чинтав, ставнас ты кузяланогыс нюжнитi. Сиръяс кө  
эмөсь – менам лооны. «Сороковкаад» чаль кузя ёкышь-  
яс да кельчияс оз өшйыны – сэтшөмъяс нин өд и ко-  
лисны.


Сутки мысти муні кыйны. Ни өти чери! Сы пыдди –  
нель ва шыр. Ки пыдөс пасьтаось и эмөсь, абу на гөр-  
дөдөмаось, му выв вурдысь кодь рудөсь нисьө сьөдөсь.  
Пөдтөдзныс ёнакодь кулөмөс пачесайтөмаось, весиг  
сюрөссө ёсь пиньнаныс орьөдлөмаось. Өльөксей дядь  
висьталіс: менсьым пө уна кулөм жө нин тшыкө-  
дісны.

Черинас и сорөн. Мөдысь сэсся татчө ог вөйт. Мед и  
йывмөны. Налы өд овны жө колө. Быдмасны да позьө  
кыйны – век нин кодлыкө шапка. Яйсө ог на сөйөй.  
Сьөла эм да, мый сыысь.

---

*Миянлы медся өд дона  
Эжва йыв – ас чужан му*

---



## АС ЧУЖАН МУ

*Миянлы медся өд дона  
Эжва йыв – ас чужан му.  
Радейтам сійөс зэв ёна,  
Кыдзи бур шондiсö ю.*

*Миянлы медся өд муса  
Эжва йыв – ас чужан му.  
Кытыськö кодлыськö мусö  
Бурджыкөн некод оз шу.*

*Миянлы медся өд колö  
Эжва йыв – ас чужан му.  
Танi и водзö ми олам,  
Видзам шань сьöлöма ру.*

*Төвгяснас кöдздöдлö кöть и,  
Миян век шондiа лов.  
Эжва йыв му вылас öти,  
Мöдыс оз сюр и оз ков.*

## ВОЫС БУР – ЭМ УР

**К**ыськö кок увланьысь гөрд би чепöсйис да тиль  
пожöмö вирдыштiс. Чардби дай сöмын. Увгьяс



кузя отаро котортлас, модаро лыйыштас. Сэсея пуалис да тадзи жө йойтавны кутис.

Меысь кө полө – весьшөрө. Пельпом сайын ружье абу сылы, уткала мододчи. А пашкыр бөжла, пужъялас куыс да, ноябрас пета.

Воыс пө бур, эм кө ур. Дерт, бур. Дошлой вөралысьяс лунон кызысь унджыкөс уськөдоны. Машина, гашкө, оз шед, а комодас и пасьтодас. Сөян да юан вылө сьом нинөмла видзны. Сэтысь жө – пармаысь – кызвыныс сюрө.



*Пелысьыс кор быгъялө,  
Еджыд бион ыпъялө.  
Но од видас сийөс гым,  
Но од тыртас сийөс лым.*

*Визулыс кор сьялөдө,  
Сыланкывийон пальөдө.  
Но од тыртас сийөс ди,  
Но од тупкас сийөс йи.*

*Шондыс кор вералө,  
Муыс-ваыс сералө.  
Но од дзебас сийөс вой,  
Но од пемдас – ой-ой-ой!*

## СЮЛКА

**Т**улысыс водз воліс да, арся кыйсьөмсө водз жө и восьтисны. Бара чужанінө шутөвті. Вомөс паськөді, а горт гөгөрын быдтысьөм уткаяссө ставсө нин



шковйөдлөмаөсь, лунвылө лэбысьыс войвывладорысь абу на вөрзьөма. Но өти лунө, Ен сетис, Ёльош тыгыс казялі куим сюлкаөс. Кынөм вылын өтаваа видз вувті весиг ковмис кыссьыны. Пемыд асывнас на зэрис да люсьтик котаси. Зато сюрис лыйны. Куимсьыд со мый лоис: өти гатшасис, еджыд морөссө енэжлы восьтіс, мөд суныштис да, буракө, эжөр сайө дзевсис, коймөдыс лэбзис.

Гатшасьөм утка берегсянь бура ылын. Абу на дзык-өдз кулөма, тирөдчө. Патрон ог жө кут видзны – сідз көдзалас. Легөдчөмнас, колөкө, береглань матыстчас. Овлө тадзисө.

Збыльысь өд матыстчыштис дай бөр «мортногса» лоис – бергөдчис мыш вивсьыс. Береглань жө кутис легөдчыштны. Суныштны видлө да оз вермы. Кузиник рос аддзи да вадорө лэччи. Но эг судз уткаөдзыс, көть эськө көмкотнам и сорөн ваас пыравлі. Ляпкыд кө вөлі, эськө водзө келі, но джумъяыс өлөдіс.

Эновтчи да – мөд росла, а утка водзө видлө суныштны, ылыстчө нин берегысь. Видласис-видласис да менам рос корсигкості тюльс ваө. Сы мында и аддзылі. Сайөдчис кытчөкө эжөръясас да корссьөма. Кыдз көть повзьөдлы, оз пет, он кө дзык вылас веськав.

Со кытчөдз вайөдіс скупитчөмыд. Лыйи кө – и став делөыс вөлі. Көдлыкө, дерт, сюрас. Оз меным – удж вылө юрсиктө лэччыны колө.



*Кага чабыр ыжда сьөла,  
А өд кыям, позьө кор.  
Сыысь пельнянь вөрса йөла,  
Төдө чөскыдтө вом дор.*



*Йөршыд – зэв өд дзоля чери,  
А өд кыям сэн и тан.  
Лөсьыда кө мыськан-керан,  
Юква – кывтө ньылыштан.*

*Дзоля тусь өд сөмын озыйс,  
А өд вотам сэсь и тась.  
Этша сьөн йөла дозыйс,  
Панявны и дасөс дась.*

*Кымын дзоля – сымын чөскыд,  
Тадзи артмылөма тай.  
Водзө на ми кутам чөс туй,  
Вөрысь-ягысь вотчам на-й.*

## ЛЫМ ВЫВТІ – УТКАЛА

**А**рыс бура ёна нин дурис: то кынтылас, то лэдз-лас да баба гожом кодь лолас. То бритва-төв чужомъяс вундалас, то, яндзим, тыдалө, босьтас ыши-пашиясьөмсьыс, да сьөртө люсмунас.

Өти асылө чеччи – лым усьөма, төрыт на гожом вөлі-а. Ки вомлөс судта кымын. И водзө на чирйысьө вылісянь. Татшөм гудырнад уткаяслы лэбсьөма, найө пукалөны тыясын да тыколаясын, куръяясын да берег дорышъясын, мичаммөм виччысьөны.

Но кызд нө сюсь пельяс дорө матыстчан, лымйыс кок улын дзуртө да? Весьшөрө эськө аслым удж вөча, но модөдчи Ольош тылань, сәні, яг дорыша куръяын, тэрыб бордаясыс пукавлөны.

Матынджык весиг вөлөмаөсь, Матвей вис горулын берегдорса джуджыдінас. Жбыргисны да, лөсьыда весиг

эг аддзыв. Кыдз нө оз, кор гымалө быттё? Дзирли-дзурли, рутшки-ратшки.

Өльöш тысысь кык уткаөс ылісянь аддзи. Таладо-рын, сиктладор помын, вөліны. Наөдз – восьса видз, веськыда он матыстчы. Вөр ді вөлі да сы пыр петі, лажыньтчөмөн зорөд дорөдз чевликаси. Сэссия, резина сапөгөс пөрччи да, дзик көмтөг тыпөлөнса росъяс пөлөн уткаясланьыс вөрзёдчи. Кокъясөй өдйө и тшөк-тісны дугдыны тайө уджсыс, но ме өд – ме: мыйө босьтча, садь быртөдз ог энотчы.

И көмтөм кокъяс улын лымйыс дзуртыштіс, көть эськө зэв ньөжйөнникөн вөри: өти кокөс тури моз лэпта, зэв видзчысьөмөн пукта, кыйкнитла уткаяс вылө да вөлисти мөдсө вөрзёда. Лунвылө мунысыяс кывтөг, буракө, эз овны. Вөрзисны да тюрны кутісны сулаланін-сыс, а лыйны ылын на.

Эг сьöлышт, а «Но и ладнө» шуи да бөр көмаси. Абу на бөръя лун. И код шуис, мый быд ветлөмын яй и гөн сюрас?

\* \* \*

*Ёна тай – эрдъяс да мылькъяс,  
Ёна тай – видзъяс да вөр...  
Өдөбөн радлунөй ылькйө,  
Морөсам весиг оз төр.*

*Ёна тай – турун да зорөд,  
Ёна тай – Эжвалөн бан...  
Быдөнлы ошйыся гора:  
Шудыс кө овлө, то тан.*

*Ёна тай – потшӧс да дзиргя,  
 Ёна тай – керка да стын...  
 Пӧжӧ ли, лымсӧ ли чирӧ,  
 Татӧгыс сьӧлӧмӧй кын.*

*Кодкӧ кӧ бокиӧ нуӧ,  
 Гортысь эн вӧрзьӧдчӧй, эн...  
 Донаӧй, чужан дай муӧй,  
 Ёна жӧ муса тэ мен.*

## МОЙ-ГЕРОЙ

Ӧндреевка ёль вомӧн грыпкысьсӧма вӧляник кызд. Сы вывтӧ вуджӧны мӧдар яггясӧ да расьясӧ тшак-вотӧсла, звер-пӧткала, видзьяс вылӧ пуктыны турун. Эм киӧн кутчысьны вӧсньыдик потш. Ӧтар помсӧ пуктӧма муас сатшкӧм вожка, а мӧдарсӧ – ёль бокас быдмысь кызӧник бадь вож вылӧ. Китӧ вешталӧгмоз, потш вылас мыджсьыштӧмӧн, зэв лӧсьыд вуджнысӧ, торӧн нин сьӧкыд нопӧн. А парма миянӧс, Ен сетӧ, вель на лышкыда козьналӧ.

Кутшӧма жӧ ме чуйми, кор ӧти луно аддзи, мый бадьыс пӧрӧма да потшкыс усьӧма. Ён бадь вӧли да тӧлысь эз пӧр, кутшӧмкӧ омӧль морт керыштӧс, став бур йӧзыслы лӧк вӧчис. Эмӧсь ӧд немортгьясыс.

Синмӧс лэдзи горулӧ. Сӧ дивӧ дай сӧмын: бадьсӧ мой карандашӧс моз ӧсьтӧма. Пипу медсясӧ пӧрӧдӧ, да кызд он шензьы? Помны татӧ кӧсӧй али мый? А, гашкӧ, тӧв кежлӧ йирнысӧ запас вӧчӧ, чинталас да новлас?

Буретш колӧ вӧли тайӧ пусӧ пӧрӧдны, мӧдыс сӧсся эз нин сюр ерӧмаканьлы? Ковмас вожка керыштны, мед потш помсӧ лӧптыны да Ёгор чӧс туй помлань веськӧдчывны.

## ПОЖӨМА ЯГ

*Мыськөма Ен вежа вана  
Пожөма ягыслысь бан.  
Кокниа лолавсьө тані,  
Лөсьыда мөвпавсьө тан.*

*Подулас томиник пуяс,  
Быдмас и наысь ён вөр.  
Лөсялас батъяслөн муыс  
Да некод муө оз пөр.*

*Гашкө нө, пуясыс тайө –  
Кусыньтны вермытөм йөз?  
Кужöны водзасьны найө,  
Сійөн и енэжыс лөз.*

*Сійөн и быдмöны водзө  
Пармаын мича ныв-пи,  
Корсьöны ассьыныс кодзув,  
Югыдлань нуөдысь би.*

## БЕДДЯ ВИЙӨР

**В**ажөн нин пөрөм да нитшсялөм вужля бокө  
вөчышті сьолалы пуртік. Небыдик лыаыс руд  
ёкмлыыслы зэв воө сьолөм вылас. Сатшйөдлышті  
резувьяс да көрталі лэч. Ылөдөм могысь өтарас да мө-  
дарас рос йылын өшөдышті пелысь розьяс.

Лэч туй кытшовтігөн аддзи: пелысь розьясысь өти  
тусь абу кольөма, весьт кык кузя кымын бедьторйөс,  
кытчө лэчсө көртавлі, кодкө мусьыс кыскөма да нуөма,  
ачыс ыргөн сіысь лэчкыс абу жө.

Коді? Юр дыр жуглыны эз ков. Син улө усис пөт-калөн гөн. Сійө вөлі эз сьөлалөн, а дозмөрлөн, стөчджыка кө, вийөрлөн – том чукчилөн. Сійө арнад ён, тыр-мөма эбөсыс перйыны сатшкөм бедьторсө. Но кызд нө перйис, сійө өд өдвакө лажыньтчыліс сьөла лэчкөдзыс да и өдвакө төрис сэтчө кыз голяыс?

Мөвпалігкостыым дзик орччөн пуяс костын лоис ызі-базі, шпура-шпура. Видзөдлі сылань да аддзи, кызди вийөрыс крукасьліс понөльө, но мыніс да кыпөдчыны кутіс вывлань. Лэчкө шедөма кокнас, бедьтор вөтчис бөрсяньыс пөлөсөнмоз.

Оз кө сюр лыйны матысса кадө, весьшөрө вошө пөткаыс, кытчөкө гантайтчас.

## ЧИБЛЬӨГ

*Вурда ёльө, Вурда ёльө,  
Куим чибльөг менам кольө.  
Өти көнкө медся йылас,  
Визув вомөн пос кодъ вылас.  
Мөддөс кольлі туйкост шөрас,  
Сэтөр вужйөн дзугсьөм вөрас.  
Коймөд дзик нин ёльлөн вомас,  
Валань нөрөм вожка помас.  
Вурда ёльө, Вурда ёльө,  
Менам олан гажөй кольө.*

## СЬЫЛАНКЫВ

**А**р помыс вөлі зэв мича, баба гожөм лышкыда-сис эз сентябрын, а октябрын. Дөрөм кежысь



петі өшинь улө лөсавны пөвйысь пелыс. Кык лоптаөс. Куръяын кулом кыйны өти лоптаыс тырмымөн, а кытчөкө ылөджык кө катны ли кывтны, кык лоптаыс медбур. Эм сійө, да абу нин дыр олысь: буретш лоптөдыс туйччис, талун-аски потас. Кольөм ар куломъясөй йи улө сюрлисны да куръяысь югыд болоньсө бурпөт сійөн зупйөдлі. Со и овсьөма.

Черөн лөсалөм бөрын стружита нин вөлі пелыссө, бөрдөм шы кыліс. Тайө бөрдіс эз морт, а енэж. Керөсладорөд выліті-выліті лэбисны турияс, юөртісны мулывалы, мый эновтөны ас чужан мунысө. Оз ас окоата серти, төв вөтлө.

Меным, отпускөй помасясда, мунны жө чужанінысь, аслам дзоляник Габовысь, ковмас. Юсьясыслы моз бөрдмөн жаль жө лоас торйөдчыны. Шогалөмсьыс сьөлөмөс коркө топөдліс да өдва ловйөн коли.

Видзыштны эськө ачымөс, да сьөлөмөн босьттөгыс нинөм оз артмы. Пукси да кывбур гижи. Шыладыс гижигмозыс локтіс. «Туриясыс бөрддзөмаөсь гортын» сьыланкыв артмис. Йөзө петіс. Аттьө, кузь туй төдысьяс!



*Вөрөдыс кытшов ме вөчи,  
Аддзылі видзөдантор:  
Лым вылын ворсісны көчьяс,  
Чарөмыс кутіс на кор.*

*Вөліны көчьясыс кыкөн,  
Буракө, иньыскөд ай.  
Ворсөмсө налысь эг тшыкөд,  
Аддзи ме видзөдны сай.*

*Лэбыштліс төв нырөн айыс,  
Чеччыштліс енэжөдз инь.  
Томлунсө аддзи ме тайос --  
Сьөлөмын öзйис жö кинь.*

*Тадзи жö натурлик вöчи,  
Комыныс кытчөдз эз тыр.  
Лым вылын ворсісны көчьяс,  
Видзөди найос ме дыр.*

## «ГÖСЬТИНЕЧ»

Сідз нин этша таво сьöлаыс вöлі, а кодкө и нетшкыны велаліс найос ёльбокса сёръя лэчьясыс. Кунича кө матыстчылас – пышйодас, юрсө сөмын коляс, кырныш кө – куштас да места вылын вильодас, а тайö шышыс лэчсө оройдлөмөн нетшкис.

Морт вылө грекалі, енот вылө грекалі, пон вылө грекалі, а ош вöлөма. Муртса на мунөм бөрас кок туйсө няйт вылысь и жувадысь казялі, а сэсся и «гөсьтинеч» меным козьналіс: лэч туй шөрам брадзөдіс. Арпомса сьөд пувнас чөсмасьöма да сьөд нисьö гөрд варенньö лоöма.

Бур, мый лэч лэдзалөм водзвылын нин ошкыс менам чөс туй вылө велаліс, эськө нинөм эз сюрлы. Локтан ар матыстчас-ö? Кывлі, мый и мукөдъяслөн чөс туй вылын пакөститчө. Дерт, оз öти ош. Рөдмисны найö миянладорын. Кыйöны и асьнысö. Сьöла дорсьыд сылөн яйысь шыдыд госаджык.

## ЧУКЧА

*Пуксяс чукча дадюв вылө,  
Мунигмозыс помся сьылө.  
Мыйыс сингъяс улас усьө,  
Сийö-й сьывсьө, сийö-й шусьө.*

*Чукча кодъыс ачым важөн,  
Ола-выла ывла гажөн.  
Мыйяс аддза, мыйяс кыла,  
Сийös вочасөн и сьыла.*

*Йöзыс шердын вома лолө,  
Буракö, ме налы кола.*

## КАНИКУЛЪЯС

**В**оч ю бырöда. Бур кодзыдгъяс эз вöвны, сöдз-тысьысь ва джуджыд лым улын эз кынмы, шлюпгялө кок улын. Йи улө вöйталөм кулөмгъяс лун кост мысгт видлала да сийөн ю вылын, шлапгяла пидзöсöдз вöйласьöмөн. Сьöкыд, но шулөмаöсь тай: мый корсян, сийö и сюрö.

Йордан омöля кынмөма да муртсаөн и воссис. Бур менам ва черöй – Кулөмдинса Попов Öльöксанлөн киподтуйыс. Йиö азыма пырö, оз и ныжмы.

Вотгья кулөм. Нинөм абу дорысь шедöма: мезді кызь кымын чери. Жаритмөн лоас, мöдысь унджык Енмыс сетас.

Январса луныс шоньд да лөнъ. Кыліс росгьяслөн шарöдчөм, а сөсся кыр йывсянь ю вылө исковтісны «партизангъяс». Орчча посёлоксаяс, комын верст сайысь локтöмаöсь. Пельпом саяныс ноп, ружье пыдди йи

писькөдлан. Йи улысь чери кыян висьом найос мено моз жө вөдитө, оз бурдны нэм помөдзныс.

– Шедө-оз? – юалис вит пиысь өти.

– Омөля, – вочавидзи да петкөдлі целлофан пакетө пуктөмасө.

– Позьө на миритчыны. Часлы, ми видлам жө.

Гуджгисны йисө, гөгрөс розьясө лэдзисны тыдавтөм сі помын мормышкаяс. Ме, нинөм вөчигмоз, видзөдышти. Бадь кор ыджда черипиян сөмын дэльөдчисны, и то гежөдика. Но эз скөрмыны, мөд йирө мунисны. Татшөмъясыдлы Америкаын моз төв шөрын лөсьөдөм каникулъясыс кивыв. Меным тшөтш: деревняө верма волыны да ас кежысь олыштны.



*Мортлы колө зэв бур ёрт,  
Сійө менам – пон.  
Сөмын пон, но мортсьыс морт,  
Сылы абу дон.*

*Кывзө сюся дзик быд кыв,  
Вөчө, тшөктан мый.  
Сытөг эськө лов эз сьыв,  
Нинөмсө эг кый.*

*Водзөс нинөмсө оз кор,  
Кампетъяс оз төд.  
Но эм аслас кильчө дор,  
Кынөмыс век пөт.*

## ЛОВЪЯ ЛОВЪЯС

**К**öч висьмылö да бырлö. Буретш сэтшöм во. Чери кыян йирöдз матö кык верст, а лым вылын ни öти кок туй. Войдöрлун, тöрыт ни талун. Век жö ловъя лолыс эм. Вöла туй кузя Ивук ты мыш вывсынь пöшти деревняöдз шлапиктöма дозмөр. Арнастайö туй вывсьыс адзылі, тиллö шыбитчис. Лэчкö абу пырöма ни лыйны абу сюрöдчöма. Мед и олö. Ур котралöма да, и то руой небыдджык. Деревняö пыригөн катшаяс китшнитасны Öндрей Öльöксанлөн керкадорса паськалöм льöм пу вылын, да шешмунла. Лöсьыд ас чужанінын.



*Сьöлöмöй – енэжын, вужгясöй – муын,  
Сулала дыр нин, ог пөр.  
Кытчöдз мен Енмыс тадз овнысö шуис,  
Сэтчöдз и ола, ог дзөр.*

*Енэжыс пыдöстöм, мөвпавны тиöктö,  
Мыйяскö вежöртö юр.  
Муыс – бур подув, сэн сыла и йöкта,  
Корся и кынöмлы нур.*

*Тонö и пожöмлөн енэжын юрыс,  
Му пытишкö лэдзöма вуж.  
Вöчан кө йöзыслы бур вылö бурöс,  
Мöд ногыс овны он куж.*

## ВЕСАЛӢМ ПУРТІК

Локтіс бур тӢдса Анатолий Александрович Попов да нуӢдіс:

– Вай катӢдлы машинанад Вуктыл поскӢдз. ӢльӢксан (сылӢн пиыс – *авт.*) бура важӢн нин мунліс да мыйкӢ эз кут локны. Эз-Ӣ мыйкӢ ло?

ӢльӢксаныс кыйсьӢ, пармаысь прамӢя оз и петавлы, вӢр керкаысын войнас музсӢ веськӢдӢ.

Улыс керкаысь Вуктыл ёльбоксаас локтӢма, шоньд юр сюяніныс, но кытчӢкӢ мунӢма. Лымвывса кок туй-Ӣдыс босьтчылім вӢтчыны, но регьд энотчим. ВетлӢма то ӢтилаӢ, то мӢдлаӢ да кытчӢ пӢ и муніс? Горзім да – эз шыась. ЫлӢ нин, сідзкӢ, шавксьӢдіс. Батыс колис кутшӢмсьурӢ сӢян да гижӢд, пукалыштім шоньдінас да бӢр лӢччим. Но ог тайӢс висьталӢм ради гиж вӢвлӢмторсӢ. Ме сэки аддзылі: ӢльӢксан весалӢма ки вомлӢс судта лымйысь дозмӢр пуртікъяс да октӢмӢн на кольӢма лӢчьяс, лымйысь пыркӢдӢма и пелысь розъяс – пӢткаӢс ылӢданторъяс. БӢрынджык висьталіс: лым усьӢм бӢрын чышкан пуртіксӢ роскӢн да зӢв на и шедӢ чукчи-вийӢрыд. СійӢ гылӢдлӢ лымсӢ и сьӢла кьян сӢръяс вылысь. ШедӢ и тайӢ пӢткаыс.

Кывлі: мед эз веськав лымйыс пуртікӢ, вӢчӢны сы весьтӢ лӢбув. ТӢда весиг: татшӢм «изобретательыс» эм Дзоль сиктын, шуӢны сійӢс ЁгорӢн, но эг на слӢймыв сыкӢд сӢрнитны. Да и сьӢкыд пӢ сійӢс суны гортсьыс, КулӢмдінса ӢльӢксан моз век жӢ пармаын.

Ме на моз «ог дур». Мый шедӢ арнас, сійӢ мед и шедӢ. Абу тайӢ сир вийӢдӢм, мед кушӢдз пычкыны.

## ВАРЫШ

*Медся джуджыд коз пу йылын,  
Гашкө-й, пицальөн он судз.  
Ставсө аддзө, ставсө кылө,  
Лунсө олөмысь оз мудз.*

*И ме ачым зэв жө варыш,  
Енэж шөрөдз лэптө борд.  
Ог кө сэсянь синмөс арышт,  
Оз и тыдав морт ни горт.*

## БУБУЛЯ

Уна жө и ягсер петавлөма Пипу пос бокас, юладорса туй дорышас. Ыркыд да, абу на эськө сисьсөсь, но гырысьсөсь да лапгья пеляось нин. Татшөмъяссө, вижөдөмгьяссө, эг босьтав, а посныдикьясөс, банйыштөмаясөс корсялі. Некымынысь ва вежлөмөн курьдсө вөтлан да төвнад пөсь картупельнад ныма сөян, абу быть ельдөг корсьны.

Абутөмсө он на и корсь. Коркө эськө зэв вөлі петлө Грязнушка (эм татшөм нима ёль) бокшаын, да важөнкодь нин дзикөдз дугдөма. Скөт пө өні, йирсяніныд сикт дорын мыйта колө да, сэтчөдз оз ветлы, местаыс дзикөдз нитшсяліс, да сы вөсна, шуоны сиктсеаяс.

Пипу поскөдз верст нель. Олөмаяслы ылынкодь.

– Сы ылнаад менам мунсьөма нин, – шуө Матвей Агния. – Керөсө ветливла. Сэтчө быдторйыс петө.

Збыльысь петө. Пипу пос дорас ветлытөдз на өтчыд ме Керөсас кайлі жө да кытшовті коркөя колхозлысь му гөгөрсө. Зэв уна вөлі петөма чорьдкодь мулюк, коді

рочөн, буракө, шусьө бычокөн. Вөліны сідзжө ньыв-тшак, ягер, кос ельдög, рыжик да весиг виж ельдög – пипудзур.

Ставыс эськө вөлі бур, эз кө быттьө зэр. Гортысь петігөн коставліс да, мися, лөняс, а өддзис да эз и дугды. Роскөдыс келалігөн дзикөдз көтаси. Сикт вылын паныдаси Витякөд, коді менө аддзөм бөрын шай-паймуніс.

– Мый нө тэкөд лоис? – юалис.

– Нинөм эз, – вочавидзи.

– Чужөмыд дзик сьөд да. Бубуля кодь лоөмыд.

Пыри гортө, видзөдлі рөмпөштанө да – бубуля и эм! Картузысь да юрысь пөсьыс да няйтыс зэрнад чужөмө визувтөма да менө вөчөма повзьөдчысьөн. Чышкалі жө быттьө синмө лэччигөн, да абу ставыс мынөма.

«Тшакнас и сорөн эськө!» – шуи, да өд кынмавтөдз на вотчи.

## ВОКЛӨН ПЫЖ

*Сөмын куим воськола  
Чери кыян пыж.  
Ки вылө кө босьтлыны,  
Абу жө дзик кыш.*

*Дзибрөсджык, но кывзысьө,  
Абу пур ли джек.  
Катысьсө и кывтысьсө  
Сійөн панъя век.*

*Өти кывйөн шуны кө,  
Пыжнас абу шог.  
Сизимдасө мунігөн  
Вөчліс сійөс вок.*



*Аттö шаньöн вöли да,  
Эштис мувыв нэм.  
Сылöн пыжö сöла да,  
Ачыс быттьö эм.*

## МУ ЛОВЗЯН КАД

**Т**адзи важысянь нин шуоны тулысöс – му вылö збыльысь ловзян кад вайысьöс. Тöлыс да гожöмыс синмö ёнасö оз вöзйысьны, а сийö пырöмөн пырö. Менам нырис серти кö, сийö кылö нин январын, кор шондi бура вылын нин пукавлö енэж пöлатьын. Но лым небзытöдз ылын на. Весиг март помын, ыркавлас ывлаыс да, бура кутö чарöм. Век жö буретш да мартсянь ывла шоналöмөн шоналö. Кодкö быттьö шондiсö, бипурöс моз, лöдсалö и лöдсалö. Мир туй вылын артмö рокöс, лым öтарö ляпкалö, тыдовтчöны кушинъяс. Регыд чепöсьясны шоръяс, а сөсся и вөрзяс йи, кылöдас юкмöсьяс и чери кыйысьяслысь лампа туйяс.

Вöрысь тайö кадö корсьны нинöм. Кыйсян кад помасис, пес керавны водзджык на. А зарава кö дум вылад усис, позьö сикт мыш вылысь видлыны. Сьöлаяс, дерт, чипсасьöны, кужан кö ылöдны, ныр улöдзыд локтасны, но жаль и айсö лыйны, гажтöм иньыслы лöö. Мортлы кö пöвтöгыс гажтöм, и вöрас-ваас, көнкö, сiдз. Мед муслун йылысь водзö сьылöны, пöсь сьөлöмөн олöны да посниясöс лöсьöдöны-быдтöны. Оз сöмын сьöлаяс, но и мукöд ловъя ловъяс, кодъяс вуджисны войвывса чорыд кöдзыдъяс: дозмөр-таръяс, кöч-ручъяс, ур-туланъяс, кöин-ошъяс. Эмöсь найö да гажа вöрын-ягын. Пысталысь чипöстöмсö кылан, и то майбырöй.

Вöрысь кö вайны нинöм, то мыйкö да вичмöдас ю. Муртса лöзаласны видзьяс вылын ваён тырöм гöгрöс и

кузьмөс тасьтияс, видзөдан да, пыжаяс вөйтасьоны нин. Оз кө талун, то аски паняласны выль юква да муркасны сир тшупөдъяс. И ме лэдза Öндреевка ёль кырйивса коз улысь төв кежлө кымынтлөм пыжөс, нюжөдла курьяө берег пөлөныс да ю шөрланьыс кулөмгъяс. Көдкө да пысаяс, ог коль вом вежантөг.

Тайө, өти-кө. А, мөд-кө, бурпөт нимкодяся ывланас. Сийө öнi – художникөн муртеа гижөм серпас. Рөмгъясыс югидөсь, синмө колянаоьс, сьөлөмө йиджанаоьс. Серпасыс дась нин, а сэтчө век содöны выль сергъяс да рөмгъяс: то утка чукөр, гөгралас-гөгралас да, шыв пуксяс кытчөкө, то таргъяс сьөд мольясөн öшгъясны ылі тилльö, то варыш кынмас медся джуджыд коз йылö. Дзолясянь аддзантор, а быд пөрйö нимкодъ.

## ВÖРСА-ВАСА

*Вöрын пö эм Вöрса,  
Ваын пö эм Васа,  
Но эг аддзыв йöрсö  
Ни эг аддзыв пассö.*

*Мöвпавла жö эськö:  
Петас пуяс сайысь,  
Либö, кыдзи тэьскуль,  
Менам пыжö каяс.*

*Сöмын эз на петав  
Некод сингъяс водзö.  
Кöнкö, вöльнöй светас  
Абу татшöм дзодзув.*




*Тайö, дерт жö, сөрöм,  
Валы – биа öгыр.  
Но кор ветла вöрын,  
Кыйкнитлывла гөгöр.*

## МЕДВОДДЗА ДЗОРИДЗ

**Т**увсовъя медводдза дзоридзöн лыддьöны лымдорчачаöс (подснежникöс). Миянладорын сийö абу. Миянладорын медводдза тувсов дзоридзöн, ме думысь, колö лыддьыны берба-баляöс.

Роч «вербаысь» «берба» лоöма да «баля» нöшта содтöмаöсь. И гөгöрвоана, мыйла: пушыд еджыд бербаыс дзик баля нигöн кодъ и эм.


Повтöм баддьыс, водз ловзьö, йötкыштö небыд ёкмыльяссö. Чорыда на корсюрö кынмавлö, а терпитöны, луныс нюмдас да веж биön сяркнитöны.



---

*Китыр морта грездöй  
Меным медся рай*

---



\* \* \*

*Дона, муса чужан муой,  
Тэ тай вель нин көдзыд лола.  
Төдысь вөлі коркө шуө,  
Мый ме сёясөдзыд ола.*

*Но и лолөй петөм бөрын  
Тэнад эрдзяс вылө коля.  
Либө пыра Кынвидз йөрө,  
Либө муна Яга ёльө.*

## КЫСНАНЪЯС

**Н**инөм и шуны, бура өні вөчалөны чери кы-  
йысыяслы коланаторъяс: вугыръяс, крукъяс,  
табъяс, кыснанъяс, мормышкаяс, сөнъяс, шатинъяс.  
Сёрни мунас кыснанъяс йылысь.

Ветлөма воддза лунас кыснасыны Өльөксан да ни-  
нөм абу шедөма. Кыснанъясыс батыслөн на. Кодкө  
патронысь, кодкө паньысь, кодкө ыргөнторйысь да с. в.  
Ваыс пө содөма да сійөн эз шед, шуис.

А ме век жө лэччи ю дорө. Мися, лавкаысь ньөбөм  
кутшөмкө да кыснан вылө, зэв бурөсь да, өти йөй көть  
ылалас. Татшөмъястө, ме кө быттьө сирөн ли көть нин  
ёкышөн вөлі, быть тшапниті. Вель кузь шатин помө

пысалом кысансө вежлаломон шыблалі сикт весьтын и вель вылө кайломон, но весьшөрө. Чери, тыдалө, өшиньяссө занавесалис да бок вылас водис: берегод ветлысь кык кока сылы вөлі веськодь.

Сідзкө, абу кысанань делөыс, а поводдяыс оз лөсяв. Варполомлөн кысаньяс вылө грекуйтны оз позь: коть ас кион вөчөмаяс, а бурөсь. Кор ловья вөлі көзяиныс, черитө медся ёна кыйліс.



*Төлыс бадьяслань пөлялө русө,  
Сьөртө номгьяслы дзесбсясьны суюө.  
Вөлөс аддза ме: поткөдө юсө,  
Өда ветки моз гортланьө уйө.*

*Пипу пос дорын, төдөмысь, вөліс,  
Кытчө волө и сюр пөла йөра.  
Войбыд йирсьөма ёль бокас вөлыс:  
Сэни туруныс небыд да көра.*

*Абу пырөма йөракөд вөрас,  
Көні лясныыс, ичөтсянь төдө..  
Бура видласис югдыштөм бөрас,  
Мича сынгясөс чуманам лөда.*

## СЬӨЛАЛЫ СЮРӨ

**Т**аво джуджыд вөрын пувйыс абу. Эз артмы сійө и лэч туйпөлөнса яг дорышгьясө. Уна пув сяркнитіс во куим-нөль сайын пөрөдөмингьясын. Сэтысьысысь и вотчөны сиктсеяс, волөны тшөтш и ю катыдысь



да кывтыдысь. Оз ю кузя (юным ляпкыд, моторён он лыб да и уна бензин мунас), а машинаясөн, кутшөм-некутшөм туй эм да.

Но абу та йылысь сёрниыс. Ме көсйи висьтавны, мый и джуджыд вёрсыс этшаник вотöсыс пötкаяслы тырмымөн: сьöлалысь зобсö восьтан да – тырыс пув. Гырысь и посни. Оз морт моз бөрйысь, а мый сюрыштö – сийöс и кокыштö.



*Ме верма сетны тэныд видз,  
Көн бобöнянь да малязияс.  
И быттьö колö кө нин сідз,  
То абу жальöсь баддя дияс.*

*Эм нöшта галя изья шор,  
Көн келавла на челядь ногыс.  
А сэсся абусö эн кор,  
Он босьт кө содтöд вылö шогöс.*

## ШЫР МОЛИТВА

**И**чötдырсянь юрö кольöма: «Шыр молитва, рака крест». Видзöдөм серти, коми шусьöг. Шуöны сэк, кор көсйöны, мед мортыслөн мыйкö да эз артмы, мед сылы эз мойви.

Кор меным этша мый шедас вöрысь ли ваысь, усьлö дум вылö тайö шусьöгыс да гортö воём бöрын шулывла куш ноп вылö шензьысьяслы: «Бара, тыдалö, шыр молитва кодкö лыддис».



## ЗЭР

*Тыдалө, кынмөма зэрыс,  
Ва вылас шонтысьө-йөктө,  
Бытьёкө посныдик чери,  
Каляыс кодөс тай өктө.*

*Бара на шоныдсө пергяс,  
Пөсьысла ваас и сылас...  
Банйымөн гожгялөм кергяс  
Вартчөны мемыс на ылө.*

## ДОЗМӨР – КАРТА САЙЫН

Газетө гижан могөн пыралі Воль деревняө, коді менам Габовыс на дзоляджык. Дзик вөр пиын. Миян деревня гөгөрын кө бура паськыд видзьяс да муяс, то тані өшинь уланыс и кольыштөма. Гортын ме дозмөръясөс аддзылі метра куимсө сайса шойनावывса пожөмгяс вылыс, а тані дозмөр позсө лөсьөдөма да кольксө пуктөма керка мыш вылө. Мися, өд понгяс аддзасны. Ми пө арнас кыйсыны босьтчытөдз понгястө дом йылын видзам.

## ЕВСЕЙ КЕРКА ДІН

*Кокөс эжөр гартіс,  
Өдва лэдзис бөр.  
Чужөмбанө вартіс  
Пегыртчылөм ньөр.*



*Мыйлакө оз сибөд  
Евсей керка дін.  
Йөзөн чайтө, либө  
Куньса менам син.*

*Веськыда кө шуны,  
Эг нин волы дыр.  
Сьökыд тасянь нуны,  
Матысь вотчи пыр.*

*Эг нин важөн юлы  
Ерө ёлысь ва.  
Эг нин гортө нулы  
Горсгя пуысь ма.*

*Эг нин важөн гылөд  
Сусгяс вылысь коль.  
Эз нин менө ылөд  
Дзоридз-маргьямоль.*

*Шудыс ёна колө,  
Сійө мед оз чин.  
Видза жө дай олан,  
Евсей керка дін.*

## БИПУР

**П**он кындзи, вöрын медся бур ёрт – бипур. Зэв лөсялө и ю дорын. Сійөс лөсьодны ёна велөдөм оз ков, мед сөмын вөлі мыйысь вöчнысө. Эн дышөдчөй корсьны сирөд. Сійө, торйөн нин öзтөм-пестөм вылө, сө пөв бурджык кос увъясысь да сямөдысь. Кыдзи важ йөз шулөмаөсь, сямөдыд – морт виысь, а сирөд-

ыд – дорйысь. Сюмөдыд, абу кө нопсыд (ме мукөд-дырйи дзоляник торок босьтлывла), а сөмын на кытыськө кулыштөма, вермас дасысь куслыны, а сирөдыд, посныдыка чагйөмөн, стружки кодьон вөчөмөн, өзъяс пырысь-пыр да вочасөн өддзас. Ни зэр, ни слөт, ни лым, ни төв кусодны оз вермыны. Шонтас, косьтас и чайон юкталас сирөдыд. Сийө век кос, көть лым улысь перьян, көть зэр улысь босьтан. Ас вөрын кө, төдан, көни мый эм, да өдийө аддзан. Менам чөс туй вылын көнсюрө весиг вундалөма сирөдсө да кондасө дженьыдик чуркаяс вылө да меститөма пу бокө. Ковмас да, сирөдсө лөсышта да кондасө посныдыка поткөдлышта сөмын. Ёна и бур. Зэригьясөн өд зэв деливө корсьысь-нытө.

Бипурыд вермас не ловзыны и бур «сөянөн», нинөмөн кө быттьө өзтыны. Овлө татшөмыс, нильзяс кө дзык өти истөг көрөбыд. Та вөсна колө босьтны этша вылө кыкөс да нөшта пуктыны плёнка пытшкө, мед эз көтась. Ме новлөдла и зажигалка, коді сідзжө плёнка пытшкын да век кос. И төда, мый любөйлаын меным шедас би, коді шонтас, вердас-удас да вайөдас гортө.

## ЯГЫН

*Дзык ведра тырым тшак, и ягас мыйта колө,  
Но сюрис лөсьыд мыр да сиктө мунны дыш.  
Тан шойччө пыктөм юр, тан колипасьө лөдй,  
А сәні – зык да вен, а сәні – пинь да гыж.*

*Тан керан ныра сизь оз баялөжөс розьөд,  
И, эм кө быттьө ош, оз песовт менсьым юр.  
И тані, сөмын тан и вунөдлыны позьө,  
Мый абу ставыс лөк, а эмышт на и бур.*



*И ог на ёна пов, көть деливё нин лолё,  
Мый коркё нетас лов, и вёрас ог нин мун.  
А медым эськё тан и эштас коркё олём,  
А медым эськё тан и босьтас помтём ун.*

## КЫЙСЬӨМСӨ ДУГӨДЛЫНЫ

**В**өрын да ва вылын кыйсян правилёясö бөръя кадö пыртисны вель уна вежсьөм. Менам видзöд-лас вылö, öткымынторъяс ваясны сöмын лёк. Мыйла колö тöждысьны посни чери вöсна, а гырысьсö позьö кыйны мыйта окота? Гырысьсö кө öд кыян – и посниыс оз ло. «Бать-мамтöг» «челядь» оз овлыны.

Мыйла сетöны позянлун лыйлыны арнас сьöлаөс «мелкобысь»? Сьöла кындзи, öд этш тöдтöмъяс колскöдасны став ловъясö – зверсö и пöткасö. Кодкö усьö да кодкö оз. Зэв уна воштöм лоö весьшөрö.

Сетисны позянлун лоны öружиеаөн дас квайт арöссянь, а öд вöчисны пыдисянь мөвпыштлытöг. Вунöдисны мортöс воспитайтöм йылысь. Öнiя дас квайт арöсаыд зэв абу кызь ли комын восайса том морт кодь, ог нин сёрнит нэм джын сайö кольём кад йылысь. Водзти кө бать велöдис писö, кызди овны-вывны вöрын ичöтиксянь пестерын новлөдлөмөн, то важөн нин абу тадзи, сы вöсна мый кыйсьөм помысь кынөмпöt дугдiс шедны. Дзoляниктö öнi пестерын ли ноппын оз нин новлөдлыны, оз нин велöдны быдсяматорйö, мый колö тöдны вöрын да ва вылын. Да и асьныс челядь видзöдöны оз вөрö, а телевизорö да компьютерö. Öнi уна семьяын бать-мамлөн öлöдана кыв ныв-пилы абу закон, и дас квайт арöсалы киö ружье босьтны позьöмыс, ме думысь, бергöдчас лёкторъясөн. Öнi öд дугдiсны вежавидзны весиг сиктса челядь. Аддзыланныд тай туй пöлönгьясысь дрöб

зарадъясөн розьөдлөм пасъяс – тайө кызвыннас налөн «уджыс». Пасъясө да банкаясө лыйлөм кындзи, гындöны коньөр ракаясөс да катшаясөс. Найө жө тотшкөдöны борд вылө кыпавтөм на пөткаөс. Ас уткаяс калянысь гырысьджыка оз и быдмывны – сюрöны зарад улө.

Дас квайт арöснад мортыдлөн этша на вежöрыс. Ме думысь, ружье сетөмсө колө урчитны дас көкъямыс арөссиянь, кор эмышт нин олөмлөн кутшөмкө опыт да общество водзын кывкутан вежөр. Паспорт сетөм бöрын морт лыддыссьө тыр арлыдаөн да сылы колө кывкутны законъяс водзын, но сёрни муно оз рогатка, а öружие йылысь.

Ас кадө ыджыд öшыбкаөн лоис сийө, мый сетисны позянлун ньöбны да вöдитчыны нарезной öружиеөн, торйөн кө, карабинөн. Татшөм öружиелөн зарадыс судзö ылөдз, некутшөм звер ни пөтка оз куж видзчысьны. Со и гылөдисны став дозмöрсө да тарсө, швачйөдлисны став көчсө да ручсө. Вöрын, этшаник сьöла кындзи, нинөм нин эз коль, и со сийөс лэдзисны лыйлыны «мелкашкаысь». Правилöяс да законъяс лөсьöдысьяс олöны оз государственной юрөн. Ме ногөн, колө бөр сдайтöдны нарезной öружиесө, тырмымөн шыльыд стволаыс. А мед мыйкө колис на вöрын-ваын, колө дугөдлыны вöрын да ва вылын кыйсьөм көть нин öти во кежлө. Та вöсна некод оз кув, а зверыс, пөткаыс да чериыс содас.

## ШЫШ

*Тайө войнас сиктын шобсис ар.  
«Восьтлөй!, Восьтлөй!» – кильчө вылын долис.  
Чöртыс тöдö, мыйысь вöли яр,  
Ставсө узьтөг тешитчысьыд колис.*



*Югдiс кор, ми öшинь дорö – гузь,  
Аддзим быдөн: абу төв ни, ар ни.  
Кодкö сиктö волöма зэв сюсь –  
Шышнитöма öтитöг став зарни.*

## САРАПАНА КЫЙСЬЫСЬЯС

**Т**атшöмъясыс – нывбабаяс. Дзoлядырсянь тöдa миян Габов деревнякöд орчча сиктысь Öсип Вераöс, кодi öни абу нин ловъя. Евсей верöсыс, кодi абу жö нин ловъя, велöдöма да ассыс бурджыка сэссия сюсь аныд кыйсьöма. Зэв шаньöсь вöлины тайö гозъяыс. Керканыс сулалiс аэропортö нуан туй вылын медбөръяөн (водзтi кызвыннас самолётөн и лэбавлисны) да пыралысьыд век вöли, и век пызан выланыс сёян-юантö лэптылисны.

Миян деревняыс Пуд (вöли татшöм нима морт) гöтыр (нимыс эськö Анна вöли, но век тадзи шулисны) вуграсис. Водзтi черид уна на вöли да вугырад зэв шедлис. Швыргас черисö шатиннад пельпом саяс да кызкö тай аддзас жö. Эз надзöникөн кыскыв, а век швыргылис. И ми, челядь, тадзи жö вöчлим. Мун пö да и тöд, кытысь тайö модаыс.

Кывли, мый и мукöд сиктыясын да деревнясын нывбаба кыйсьысьясыд да вуграсысьясыд вöлины, и öни эмöсь. Кодöскö лолыс тшöктö, кодöскö олöмыс, мед пинь улын мыйкö вöли. Öни йи улысь чери кыйысьяслысь ордйысьöмъяс нуöдлöны да сэсыясысь унаöс аддзылан, весиг айловъясысь унджык кыйлöны. Но тайö ёнджыкасö шойччöм.

Кыйсьöмыд – век жö айловлөн удж. Сийö ёна мудзтысь да весиг лов босьтысь. Кымынөн гортаныс бöрсö эз бергöдчыны: ош чашйис ли мыйкö асьныс лоисны.

Вотчөм – мөд делө. Сийөс тай и төдөны, арнад ёна шарсийоны пувтө да чөдтө. Иналасны да сьөмтор вичмыштө. Зэв на и отсалө парманым. Бура мөвпыштлө мөн бөрйылөмаось чужан мунысө комияс, тырмылөма вежөрныс.

## ЗАРНИ КАД

*Ворсігмоз кыдзьяслысь төлыс  
Нетшыштіс медводдза кор,  
Быттьөкө пуяссө өліс,  
Вотчыны өні мый сёр.*

*Ыркөдіс васө и мусө,  
Жугыльтіс ставсө и рад.  
Век жө тэ, век жө тэ муса,  
Зарниөн пасьтасьысь кад.*

## ВЕЛӨДІСНЫ...

**М**иянладорө вөр лэдзөм помысь нажөвитны «кузь руб» локтісны сюрсьясөн. Төдсаось «вербованнойясөн». Сідзи и шуам найөс, көть эськө, коми ногөн кө, колө шуны вербуйтчөмгьясөн ли медасьөмгьясөн. Унаөн бөрсө гортаныс эз и мунны, гөтрасялісны да верөс сайө петісны, сорлалісны коми вир. Талунъя йылөм комиөн оз нин көсйы сёрнитны. Со мыйөдз вайөдіс гурйив өдзөсөн олөм. Но абу та йылысь сёрниыс.

Көсья пасйыштны, мый налысь велалім вөрө-ваө петалігөн. Эг төдлөй йи улысь вуграсьөм. Төвнад черитө кыйлім жө, но дөмөдгьясө гымгаяс вөйтөмөн. Зэв на и шедліс. А мед луннас йи вылын кад коллявны – татшөм

модаыс комилөн эз вөв. Весиг восьса юөн берег пөлөн шландайтысьос прамой мортөн эз лыддывны. Прамой морт уджавліс, черитө кыйліс рыт-асывсө. Локтөм йөзлөн кердор удж бергөдігөн вөліны шойччан лунъяс, да унаөн мунлісны йи вылө. «Висьмисны» и мян да вель уна удж эновтісны гөтыръяс выланыс. Тшөтш велалісны «пыдзыртны» сәні еджыд доз, мөд ногөн кө, водка. Эз бөрыньтлыны и спирт. И өніөдз тадзсө кыйсьөны да «пыдзрасьөны». Вөйласны и быдсөн, но оз эновтчыны. Окотаыс йиджөма вираныс, оз пет кувтөдзныс.

А рочьясөс да мукөдөс ми велөдім кыйсьыны чөсьясөн да лэчьясөн. Зятьясөн лоисны да кыз он велөд? Өткымынъяс сэтшөма паськөдчисны, мый асьным маті берегө эг кутөй сибавны.

Олам, юрнымөс гыжъялам. А мый и гыжъявны весьшөрөсө. Олөмыд – сійө ытва, пыжөс моз мөдарө он бергөд. «Лым сывтөдзыс» ас юрөн коліс овны.



*Чужаніө бөр ме келі,  
Арсө ола сән.  
Өшинь улын өкмыс пельсь  
Нюмъялөны мен.*

*Дас кык керка, кызь вит олысь,  
Вөвлөмыслөн тор.  
Но өд сәні на и лолысь  
Петө сьылан гор.*

*Но өд сәні на и джуджыд  
Сувтса парма-вөр.  
Но өд сәні на и уджөн  
Олө му да йөр.*



Но өд сәні на и кужö  
Съывны дозмөр койт.  
Но өд сәні на и чужö  
Дөра вылын мойд.

Но өд сәні на и мича  
Дона чужан кыв.  
Но өд сәні на и видза  
Вежавидзысь ныв.

Но өд сәні на и кылö  
Муса челядьдыр.  
Но өд сәні на и сьылö  
Сьөлөм медся дыр.

Но өд сәні на и олö  
Медся гажа лун.  
Но өд сәні на и волö  
Медся чөскыд ун.

Но өд сәні на и мамöй,  
Сәні жö и вок.  
Но өд сәні на и сямöй,  
Сәні шуд да шог.

Чужанінö бөр ме келі,  
Дыр нин ола сән.  
Öшинь улын öкмыс пельсь  
Розъялöны мен.

Дас кык керка, кызь вит олысь,  
Вөвлöмыслөн тор.  
Но өд сәні на и лолысь  
Петö сьылан гор.

## ХА-ХА-ХА!

Чос туй вылысь петом да Оңдреевка курьяо вөйтөм куломъяс видзөдлөм бөрын, арнад зэв өдйө пемдө да, войми. Пемыднад төдса туйөд мунөмыд, кыз шуласны, тшаква, но восьлалі, дзик нинөмыс эз шед да, дөзмөм лолөн. Арбыд нинөм прамөя оз пысась, ёльсьыс комыс лэччылө да вель шедлө-а. Кодкө помис али мый? Öнi өд быд ногыс пакөститчөны. Но өд и юсьыс нинөм оз шед. Тонө Öльөксей дядь сөмын кулом весалөмсө жө и төдө. Чери пыдди виж нуйтыс сирасяс да грекөвөйтө: некыз ёрччыштлытөгыс.

Восьлалігкості ныр увті төвныраліс – сюзьлөн мыгөрыс вөлі. Сійө и эм. «Ха-ха-ха!» пө, тешитчис здук мысти. Сійө – артист, не татшөмторьяс на чудитлө. Кыйөдіс али мый чери кыйөмөс да, эз шед да, сы вылын сералө?

Оз ставсө төд. Абу дзик куш нопйөй. Сьөлаяс сәні әмөсь дай вийөр, сылөн шырьяс дорысь век нин чөс-кыджыкөсь. Мед дульсө ньылалө.



*Тэд муса Әжва, меным – Воч,  
Мен сійө чөскыд нянь моз колө.  
И сьөлөм вылын лөсьыд лолө,  
Мый сылөн нимыс абу роч.*

*Воч – сідзкө, чужан мулөн водз,  
А абу дор ни абу бөрыс.  
Тан гажә Öсип керка нөрыс,  
Көн пувйыс өти розйын–содз.*



*Тан сэтөр ваа Войим ёль,  
Тан дозмөр койта Риза чалльөг.  
Тан йёзыс вёсна менам жальёй,  
Тан мегыр улын зиль да зель!*

*Тан ставыс, мыйысь шоныд лов,  
Да мыйён съёлём олө-вылө.  
Тан унджык йёзыс мекөд съылө,  
И эмось, кодъяслы ог ков.*

## ДЕСАНТНИК

**Ю**катыдө мөдлапөлөд мян деревня ветлө Гу ягөд. Тшөтш и ме. Чери кыйны, вөравны, вотчыны. Ставыс на сюриштө.

Пөшти быд мунігөн тані котшкөдчө сизь. Мудзлытөм кузнеч. Сөмын оз Семө Вась Иван моз мөлөтөн вачкав да мыйкө көртысь вөч, а медся чөскыд сёянсө – номырөс – корсьө.

Ме өткодяла сійөс кузнечкөд, а позьө өд и десантничкөд. Сэтшөм жө өмидз беретa, кодөс медся сюсь да повтөмъяслы сөмын сетөны. Збыльысь оз и пов. Пу дорөдзыс локтан, видзөдан, кызди уджалө, а сылы дзик веськодь: водзө котшкө да пу ёгсө гылөдө.



*Абу тун да этша мый ме төда,  
Но ме төда: коркө сылас лым,  
Чужан муөс полошуйтны мөдас  
Кыкнан стволсьыс съөдас лыйлысь гым.*

*Дзебсяс быдён, коді кытчө кужас,  
Мед эз керав биён саякыйыс чер.  
Кодкө кулас, кодкө муртса чужас,  
Ставсө сэсся мыськас дэбыд зэр.*

## МЕНАМ ПУР

Өльöш тыыс нинөмөн уткаяс судзөдны да тэрмасьөмөн вөчлі пур. Ог и соссы – лёкиникөс. Öти ар кө, мися, тырмас и, мөд во мөдөс вөча. Лөсьы-дөс, мед та моз оз повзьөдчы путкыльтөмөн.

Кыкыс кымын и смелмөдчылі петавны ва вылас. Ог төд, мукөдъяс сөвлісны эз. Забыль, Варполом Öльөксан шуліс: аслыд пө и вөчөмыд.

Öти воө ытваыс менсьым пурйөс колис тыбокса бадь дорө. Таво нуис Ыджыд видз помө яг дорышланьыс. Сідзи и оліс вөрзьөдлытөг. Ытшкысыяс гөгөртөмаөсь, абу вөрзьөдөмаөсь. Көдкө кутас ноксыны ютш колодаөн...

Вот менам и рөбөта йөзлы серам вылө. Оз кө син водзыс выль ытва ну, жугөдны лоө да кытчөкө вөрас суйыштны.

И выльсө на эг вөч. Потшъясөн да мыйөн да утка-яссө судзөдала, төлыс матысталө да. Некор на вөлі, да и уткаыс судзөдмөныс абу, кытчөкө ыджыд ва вылө бокиті лэбө, миянө ылалөмъясыс сөмын веськавлөны.

\* \* \*

*Ытва вөлі да саридзө кывтіс,  
Кытчө мунысьыс некод эз вөв.*



*Лунён вежөдөм веретя вывти  
Югыд тільгуна котралө вөв.*

*Эзысь прөшвияс гылалөм бөрын  
Оз на енэжысь нинөмыс усь.  
Муртса синмасьөм тыкөла шөрын  
Йөктө гортөдзыс воөдчөм юсь.*

*Уна дзоридза мичаджык чышгян  
Бөрийө сьөлөмнас ырсмунөм ныв.  
Регыд гортысь ме гудөкөн пышгя,  
Төвнас велөди сө сьыланкыв.*

## КЫРНЫШ

**М**ун дай сэся эскы, мый вөралысьөс кырныш маті берегө оз сибөд. Пукалан пу увтіыс мунім, да вөлисти клонгис. Эз кө шыась, эг эськө и казявлөй, синнымөс муө сүйөмөн мунім да: вөрад абу асфальт, быд вуж крукыштны видзөдө.

Ружьеөс эськө босьтлі жө пельпом вылысь, но ньөжмыд вөлі. Зарадсө весьшөрө эг нин видз, водзджык сьөд лэбачыс егырас уйкнитіс.

– Вот адыд, – шуис өртөй. – Морт туйө оз пукты.



*Быттьө сідзи-й колө,  
Ызгө-бузгө шор.  
Кынмөмысь көть полө,  
Петөма нин кор.*



*Быттьö сідзи-й колö,  
Енэж лöz да сöдз.  
Бура дыр нин олö  
Мудöд вылын пöч.*

*Быттьö сідзи-й колö,  
Юргö сьыланкыв.  
Пывсян горгя лолөн  
Ветлөдлө том ныв.*

*Быттьö сідзи-й колö,  
Абу ун ни вөт.  
Коді кытчö волö,  
Төдö да оз төд.*

## ПОВТӨМЪЯС

**М**ай коймөд лун. Воч ю местаясөн бура кузя нин воссялөма. Йи рыж да вöсни, но йи улысь чери кыйысьяс катша-рака мындаөн на Öльöш тывомса джумъяын. Лысьтöмаөсь на кайны йи вылө, көть эськө Павел Öньö воддза лунас купайтчöма. Оз кө вöлі шед, эськө öдвакө нин вуджисны, юрнаныс ворсөмөн, берегсянь косталөминсö потшгьяс вывті, да мык бура босьтö. Видзöдышті да – сöмын мачалöны!

– Вöянныд öд öтчүкөрөн, ерöмаканьяс! – горөді кыр йывсянь.

– Эн пов. Победа лун бöрын на йиыс кылалас! – вочавидзисны меным.

И збыльысь, сідзи и лоис. Май дасөд лунас йи вөрзис да мөд лунас на лунтыр торокъясыс кылалісны, көджъясөд чукыль-мукыль вöчалігтыр. Видзөдан ылісянь да, йиыс бөр бöрыньтчылö, быттьö вабергачö веськавлö: ёна чуклялö миян Воч юным.

Уткаяс йиа дырйи на волісны, гөпъясын пука-  
лөны, а дзодзөгъясөс, туриясөс ни юсьясөс эг аддзвы.  
Ю миян дзоляник, нюръяс дзоляникось жө. Паськыдіно  
лэбисны-ордйисны.



*Лымсө мырддисны, а зэрыс  
Эз на усьлы тусь.  
Кор на тулысылөн серас  
Пырас дзодзөг-юсь.*

*Кор на юным мылькйөн ойдас,  
Вөрзяс лөп да чаг.  
Кор на лөзгюгыдсянь койтас  
Чукчияса яг.*

*Кор на дзоридзьяса чышгян  
Плавгас мича ныв.  
Кор на кыргяс йылө пышгяс  
Унтөм съыланкыв.*

*Лымсө мырддисны, а зэрыс  
Эз на усьлы тусь.  
Но ме качи енэж серас,  
Лэбзя, быттьө юсь.*


## ЖОВ

**М**иянладорын оз быдмы да, деревняө жов пу  
вайи сө верстсайса юрсиктысь. Өкмыс вуж  
лэдзи арнас муө, потши, мед скөт оз талаяв. Тулыснас



видзӧдлі да, ставныс босьтчӧмаӧсь. А кодсюрӧ ӧлӧдліс:  
зэв пӧ асныра пуыс да вермас и бӧрыньтны йӧз мутӧ.

Ме ӧд нимкыв лыдди дай шонид вылӧ вӧв куйӧд  
вуж улас пункті. Гашкӧ, жовтӧгыс олі, ӧшинь улын пе-  
лысьяс мич вылӧ сикӧтшасьлӧны, да оз быд во. Сьӧ-  
лаяслы лэчкасьны нинӧмӧн овлӧ, а гӧрд молля жовыс  
быд во розъя.



---

*Тайӧ гажа парма вылыс –  
Миян муса чужанін*

---





*Олам-вылам Эжва йылын,  
Сылөн медся ыджыд чин.  
Тайё гажа парма вылыс –  
Миян муса чужанін.*

*Олө миянкөд бур важыс,  
И виль луныс вайё бур.  
Лунын – уджыс, рытын – гажыс,  
Шаньджык олөмыс оз сюр.*

*Кодлы вичмис тані чужны,  
Сылөн сьөлөм шудөн тыр.  
Юясбокса паськыд вужным  
Татысь некорсё оз быр.*

## ШОЙНА ВЫЛЫН

**М**иян деревнялөн шойнаыс Матвей вис тылөн джуджыд кырйывса пожөма діын. Водзті таті Воч юыс визувтлөма да веськыдалөма сэсса. Кос да гажа места. Мусё мыш вывсьыс эновтісны да бура ыджыд көджыс регыд бөр пожөма ягөн лоас, тіллыс вель нин джуджыд.

Тані ас сиктсаяс пөвстын ыджыд мамө да Наста ичинь. Деревняө быд волігөн ме век кежавла татчө.



Воан и лэччан лунё дай шөракостас, дырдзык кё олём вичмылө. И мукөд гуяссө кытшовта, видзөдала. Оз-оз да и выль крестьяс сувтёны сідз нин этшаник йёзнас.

Кыдзи олөмын, сідзи и шойна вылын. Кодьяс пыдди пуктёны рөдсө-вужсө, налөн гөгөр лючки потшөма да краситөма, идралөма да сөстөммөдөма. А кодьяс олөны ылөсас, налөн и тані абу морттуйыс. Ог нин шу пөль-пөчьяс, ыджыд мамьяс да ыджыд батьяс йылысь, весиг бать-мамныслысь пөрөм крестьяссө оз вежны да выль потшөсьяс оз сувтөдны. Коді потшсьөма да сюрьяс вылө вөляник пожөмьяссө пөрөдөма, пуяссө идратөг и кольөма, абу увйөма ни чукөртөма. Мир туйлансьө урөстөмаөсь дзикөдз. Ёна жө и мисьтөм видзөдны. Пыралан да сьөлөмтө сөмын дойдан.



*Майбырөйыс – Эжва йылыс –  
Миян дона чужан му.  
Тані уджалам да сьылам,  
Кутам шоныд олан ру.*

*Бурсө сьөлөмгясын видзам,  
Гөсьтлы–пызан, ёртлы – сыв.  
Аски лоё нөшта мича,  
Нэмсө олас Эжва йыв.*

## КИТАЙ КУЛӨМ

Сөнысь вөчөм Китайса кулөмьяс пыр, кодьясөс Сомоль вөснаыс ме шуа «нямөдьясөн», гырысь сирьяс мунасны да сөмын «өшиньяс» колясны. Зэв жө



розьөдлөны ва шыръяс. Лэптан кулөмтө да серамыд оз пет, шыбитны кольёма. Но ёнасө он вишкы: донтөм да кило куим чериён вешмө. А өти кулөмнас дас та мында кыйлан. Вөсни сиа кулөмас сетчө чериыс да сы боксянь бур тайө кыйсянторйыс. Кытчөкө кө пысаяс – прөщай жө дай: кушөдз косясьлас.

Лөк сийө, мый ёна посни синмаөс тшөтш лэдзөны да браконьеръясыд посни черитө ёна бырөдөны. Колө дугөдны вывти посни синма кулөмъяссө вөчөмысь да вузалөмысь.



*Лапъя пеля турун,  
Лапъя пеля кор.  
Шонди пөжө бура,  
Косьмис весиг шор.*

*Жуялөма вөрыс,  
Упкөны и йөз.  
Сөмын енэж шөрыс  
Век на пөсь да лөз.*

*Но өд чукля пуртөн  
Локтас кыськө чард.  
Гымыс камгас-дзуртас,  
Весьөпөртас тат.*

*Но өд көшысь кисьтас,  
Ведрायсь ли зэр.  
Коляс менам висьтө  
Сылөн югыд сер.*



## ВОМ ВЕЖЫСЬ

Сьökыд шуны, кор пуксьö гожöмыс. Тöлысь сер-ти кö, июньын, а овлö, мый май шöрнас нин гожöмсьыс гожöм: турун кос шөрöдз пуритöма, картупель мудйим, выль тшакöн бурпöт нин чöсмасим. Но кызвыннас июньнас и дзикöдз шоналö муыс да гöрдзасьöм дзоридзьясысь босьтчö кисьмыны быдсяма пöлöс вотöс.

Гожöм пывсьöдö выль корöсьөн. Гожся Иван лунö пырам сйён лов бурмöдöм да сöстöммöдчöм бöрын. Та гөгөр жö и петам видзьяс вылö, мед пуктыны чорзытöм на медся чöскыд турунсö. Водзтi петлöмаöсь вит кымын лунөн сёрöнджык – Петыр лун бöрын – да эштöдчылöмаöсь Илья лунöдз. Но öнi йöзыд уджтö оз нин тöдны сiдзи, кызди водзтi. Овлö, дышджыкъяс пуктысьöны на сентябрын.

Гожöм – вом вежысь. Пасйи нин: медводз чöсмöдлö тшакöн. Менлы вылö медся чöскыдöсь посныдик гöрд гобьяслөн жаритöм юръясыс, кодъяс тай пиньяс улад дзуртыштлöны. Челядьдырйи зэв чöскыдөн вöли бипур весьтын нёр йылын жаритöм да слыштöм уртшак.

Тшак бöрас зэв лöсялас йöла оз. Абу градвывсаыс, а вöрса эрдъяс вылысь вотöмаыс. Посныдик да весиг кружка тыр бура дыр лоö вотны, но, номъясысь öвтчиг-моз, вотан, мед панясигөн синтö куньтыравны.

Сэсся воöны чöдлач да чöд. Август помланьын вузалöм могысь вотöны нин и пув. Но аслыд сёйöм вылö медбур вотны лым усьöм водзвылын сьöд пувсö, парма-ыслөн верстьö кöрасö, кодi абу сöмын юмов, но и пöтöс.

Гожöм – звер-пöткалөн быдтысян кад. Тулыснас, лымъя дырйи на ловнысö кыпöдöм бöрын, сьöла-дозмөр лöсьöдiсны позъяс, чöвтiсны сэтчö колькъяс, кодъясöс пöжöм бöрын шыödчисны сильöяс. Сйö и тöжд – сюяв-

ны паськөдөм воманыс гут-гагөс. Борд вылө кыптасны да асьныс сэсся кынөмпөтсө шедодасны. Сентябрын ыджданас бать-мамнысө пөшти суодасны. Гожөмыс и зверьяслы верстяммөм вылө. Сьөла-дозмөр кө вотөстө өти тусьөн кокалөны, то ош коддьөм «китырнас» шарейөны. Варгыль кокыслөн ыджыд тыртан «бөчкаыс», зато сэсся, гуө пырас да, төвбыд нистө.

Дерт жө, гожөм – турун пуктан, медуна пөсь кисьтан кад. Абу весьшөрө шулөмаось, мый гожся лун во вердө. Сидзи и эм: турун пуктан – төвбыд пызан вылыд еджыд сёяна лоө. Он, небось, пыктав, йөвнад да выйнад, нөкнад да рысьнад. Төдлі и ме страднасө, кор Габовын олі. Помнита: поводнөя мудзан гөрбуш косаөн лунтыр өвтөм бөрын, но, войыс веськөдас да, бара ловтырнад кыпалан. Том на да, верман на да!

Гожөм – тайө и вакөд медъёна ёртасьөм. Челядьдырйи сәні сьальөдчан лун-лун. Да и верстьөдырйи турун пуктигъясад бузгысьлан.

Гожөм йылысь позьө гижны кузя, сийө – помасьлытөм висьт.



*Ичөтик зэв сьөла,  
Но өд ловгя лов.  
Трачкөдчылө төлыс,  
Да оз сыысь пов.*

*Джуджыд лымйө сунас  
Да и узьө сән.  
Петө небзьөм лунас,  
Кодкөд абу вен.*



*Сылөн вомö пырö  
Пелысь, пув и чöd.  
Вөр кө лымйөн тырö,  
Кыдз пу гарйөн пöt.*

*Вöрсö видзны колö,  
Жугöдны оз ков,  
Мед сэн водзö олö  
Сера борда лов.*

## ЛЫЙÖМ ОЗ ПОВЗЬÖД?

«Охотничьи просторы» журналсы ли, кысь ли, лыддылы, мый звер да пötка оз повзыны лыйöмысь: он кө веськав, кольöны места выланыс, он кө тыдöдчы ачyd. И тадзи, и абу тадзи. Зверьяс кузя ог куж шуны, а пötка йылысь верма. Оз лэбзыны, оз вермыны да, сöмын мудзöм уткаяс, кодьяслөн дыр лэбзьöм да ва вылö пуксьöм бöрын гөгөр лыжалö. Лыйöм бöрад лэбзьöны весиг орчча тын пукалысь уткаяс. Гöграласны-гöграласны да кытчökö ылыстчасны. Тадзи жö и вöрса пötкаяслөн котырьяс.

Коді гижö тадзи, ньöти оз тöd вөр-васö. Öнi ставсö повзьöдлісны сэтшöма, мый некод маті берегö оз сибöд.

\* \* \*

*Ветлам, пиö, вөрö,  
Сэні, пиö, рай.  
Вöрыс чöскыд көра,  
Сэні сьылö кай.*



*Сійө медся гажа,  
Сійө медся шань.  
Сэни мойдса Маша  
Көтө ошлы нянь.*

*Зэв нин ёна колө  
Бипурыввса чай.  
Мый нө гортын олам? –  
Мөдөдчылам вай.*

## КӨК

**Д**золядырйи ме чайтi, мый көк кутшөмкө аслыс-пөлөс лэбач, өшинь улын чипанъяс вылын ыджыдалысь чиган паськөма петукысь на мичаджык. Висьтавлісны эськө, мый сійө дзоляник руд варыш и эм, но ме эг эскы: татшөм сьөлөмсянь «ку-ку» шуалысьыс, йөзлы нэмсө арталысьыс, абу варыш, а кутшөмкө мөдпөлөс лов. Но школаын велөдысь петкөдліс серпас вылысь да эскөдіс, мый руд лэбачыс збыльысь көк и эм. Сэтчө жө книгавывса серпас улас вөлі гижөма: «көк».

Дача вылө миянкөд ветлөдлысь дзоля внукөс дыркодь эскөді, мый дзык орчча вөрын көкысь – град йөр потшөс вылын корсюрө пукалысь лэбачыс и эм, да, пөрйөдлан пө, пөльө, сөмын шуалис. Но өтчюд дзоля морт ачыс аддзыліс, кыдзи көк потшөс вывсьыс кыпөдчис матысса кос козйө, лөсьөдчыштіс ув вылын да босьгчис лыддысьны.

Абу мичлун сайын сывны ли мөдторйөн шензөдны кужөмыс. Со, сквореч – сьөд ёкмыль и эм, а кутшөм мичаа босьталө. Оз торъяв мичлунөн и миянладорын медъёна сьылысь квайтпалич. Тадзи жө и йөз пөвстын: синмө усьтөмыслөн овлө медыджыд енби. Татшөмъясыс

сьөлөмтө босьтөны пытшкөсса мичлунөн. Сідз кө нин шуны, му вылын став ловъяыс аслыснога мича.



*Ош мясянь бокитіджык муніс,  
Том козъяс вөрзъыштлісны сөмын.  
Мый ыджда вөлі, ог куж шуны,  
Но казялі, мый мугөм рөмыс.*

*«Оз вөрзъөд, асьсө кө он вөрзъөд», –  
Ош йылысь сёрнитөны важөн.  
Ми ськөд өти кытшыын гөрсям  
Да дыр нин олам өти гажөн.*

*Ме вота пув, и сійө вотө,  
Ме кыя лэч, и сійө кыйө.  
Ог юав сылысь: «Тэ нө коді?»,  
И сійө ме вылө оз кыйяв.*

*Ме серти, мортыс ошкөн вөлі  
Ли ошкыс коркө мортө пөрис.  
Дзик өти налы парма йөлыс,  
И нинөм юкны өти вөрас.*

## МАЧТӨМ ЯЙ

Лэч туй кыйысь семьяясын водзті быд кыйөм Лбөрын сьөла-дозмөртө вайлісны эз некымынөс, кызди өні, а ноп тыр. Дозмөр ли сьөла яя шыд моз медшөр сөянөн вөлі и мачтөм яй – кызвыннас сьөла. Дзолядырйи ыджыд мамө первойысь паньыштөдіс, да

менө вукөдіс, а велалі да – тасыті дорсыд пельөд он  
вөлі кыскы. Сёянсьыс сёян. Пельняньнас, нянь көрыс  
содө да, абу нин сэтшөм чөскыд.

Бурджыка шедігъясөн мачтөм яйыд пызан вылын  
овлө и өні, кыдзи асланым мукөд сёян: черинянь, тшака  
картупель, пувъя йөв да мукөдтор. Ставнымлы өтитөг  
колө сувтны вөр-ванымөс дорйөм вылө, мед и водзө  
вылө вөлі ас сёян. Кыськө вайөмторъясыд, майтөг кодъ  
калбасъясыд – сөмын кынөм ылөдлысьяс да висьөм  
көвъялысьяс.

\* \* \*

*Кывлін кө чукчильсь койтөм,  
Сійө дзык некор оз вун.  
Сьөлөмтө ловзьөдысь войтөн  
Югзьөдө тэнсьыд быд лун.*

*Абу и быттьөкө сьылөм –  
Кутшөмкө трачкөдчөмтор.  
Сөмын тай сьөлөмад кылө,  
Быттьөкө медмуса гор.*

*Кытыськө сюрс нэмзяс сайысь  
Виргястө вөрзьөдысь шы.  
Сідзи жө сьөлөмө кайысь,  
Кыдзи ён бордгяса гы.*

*Сійө и медыджыд шогөй,  
Шогала кодөс сё во:  
Гөгөрбок вөр лэдзан могөн  
Койтысьыс регыд оз ло.*

## ЛАПҚОР

**М**ыйла татшөм нимыс туруныслөн – гөгөрвоа-на: лап (вевт, тупйөд) кодь. Лыс лап зэв на и бур вевт. Зэригөн пыран лыска пу улө да косөн колян. Эм бурыс и лапкорсянь. Көрталан кө сийөн доймөмин, дугдө петны вир. Челядьдырйи көмтөг ветлигөн унаысь кок чуньясөс санөдлі вир петмөнөдз да век көртавлі лапкорйөн. Кыдз шулөны, понлөн моз век бурдліс.

Бур сийө, мый тайө турунсө оз ков ёна корсьны: өшинь улын и быдмө, весиг ветланинын.



*Вөрө ветла дзик быд лун,  
Мыйөн воө арыс.  
Мудзөм бөрын чөскыд ун,  
Муса пывсян жарыс.*

*Весь өд пармаын оз ов:  
Помся кыйся, вотча.  
Сэні некод мен оз ков,  
Понйөй сөмын орччөн.*

*Вөрын-ваын ветлигөн  
Кольө бурыс юрө.  
Пув да съөла кындзи, мен  
Сэтысь кывбур сюрө.*

## УРАЗНӨЙ

Рочөн кө, адонис. Тайё турунсө, кодөс нөшта шуёны коми женьшеньён, корсьмөн. Петө медсясө яг бокшаясө. Вужйыс чөскыд одеколон көра, заыс вöсньыдик, корйыс морковлөн кодь. Лекарство вылө (а сійө бур быд висьöмысь) босьтöны дзоридзалигас июньын да сöмын шондi пуксьöм бöрын, да шондi петтöдз. Луннас кө вотан, выныс абу, оз бурдöд. Сидзкө, колө корсьны луннас, а вотны войнас. Миян войвылын гожся войясыд югйдöсь, да аддзан.

Юöны чайöс моз заваритöмөн. Тöv кезлө косьтöны корöсьöс моз гартыштöмөн.

Дум вылө усьлө челядьдыр. Ыджыд мам, кодi век вотлис бурдöдчан турунъястө, уразнөй чайнад менö юктавлис тшöкыдакодь. Нёрпалöмысь мынли. Öни, висьöм кө топодас, лоö шыödчыны больничаö. Ыджыд мамыд мед эськө век эм.

## МИЯН СЫЛАНКЫВ

*Чужим Эжва йылын, тани жö и олам,  
Некор ми ог вежöй дона кок ув му.  
Тани öта-мöдлы медся на и колам,  
Сьöлөмгясын кутам вежавидзан ру.*

*Велöдисны батьяс чер да пила кутны,  
Велöдисны мамгяс кутны шоныд лов.  
Кужам, кызди колö, уджсö-й-гажсö шутны,  
Асланым дзык ставыс, йöзыслөн оз ков.*

*Некодлы да некор увтыртны ог сетчöй,  
Медся дона вöля, сылы абу дон.*



*Миян мича нывлӧн синваыс оз лӛччы,  
Вылын юрӧн ветлӧ миян удал зон.*

*Варыш бордйӧн лӛбам, колипкайӧн съылам,  
Енӛжшӧрса эрдысь некодӧ оз кут.  
Зиль да кыпыд йӧзӧн Коми муын кылам,  
Сӧмын чужанӧнын долыдалӧ шуд.*

*Шаня овны кужам вежавидзан лолӧн,  
Лӛксъыс нӛмсӧ видзӧ яндзим тӧдан ру.  
Чужим Эжва йылын, сӛнӧ жӧ и олам,  
Некор ми ог вежӧй дона кок ув му.*

## ПУД ВАСЬ

**В**о нелямын мысти сӧмын аддзысим астшӧтшья-кӧд – Пуд Васькӧд. Эн чайтӧй, мый ме нимтыся: батыслӧн збыльвылӧ нимыс Пуд и вӧли. Кутшӧмкӧ поп татшӧм ним пуктылӧма, морт вылас тешитчӧма. Но Вась та вӧсна олис, увгыртӧмаӧн асьсӧ эз кыв. Сылы зӛв бура сетчисны арифметика да математика, но гижис мисьтӧма, ӧшыбкаясӧн, да коми и роч кывйысь медбур оценокӧн вӧли «три». Помавлӧс профтехучилище да лоис трактористӧн.

Мунлис ас чужанӧнысь да олӧ Ленинградскӧй обласьса кутшӧмкӧ сиктын, гӧтырыслӧн рӧдинаын. Висьталӧс эськӧ нимсӧ да менам юрысь петӧс. Пенсия вылын, оз нин уджав, локтӧма видзӧдлыны кольӧм рӧдвужсӧ. Сувтлӧма нин Ульянаӧ, кӧнӧ тай манастыр, да кӧнӧ коркӧ уджавлис Кулӧмдӧнса леспромхозлӧн подсобнӧй овмӧсын. Локтӧма юрсиктӧ чой ордас да со кежис ме ордӧ. Корис висьтавны Габов деревня йылысь, кӧнӧ ми ськӧд чужим да быдмим, зӛв на томӧн янсалӧм

велөдчөм да специальность серти удж абутөм вөсна. Абу нин волөма во комын вит. Ме эськө бура дыр жө коставлі, но во дас вит век аръя сәні да костьясас на гөгыльтчыла сә верстсө юрсиктесянь.

Мися, воддза ветымын кымын керкасыы «ловъя» сөмын дас вит кымын. Олысыы муртса унджык. Став керкасө и олысысө лыддьөдлі чуньяс вылын. Мися, удж некутшөм абу. Кодлы некытчө воштысыны да коді нәмсө көсйө помавны тані, найө и колисны. Унаөн вөрө пес заптыны оз мунны, пилитөны эновтөм керкаяс. Вась шемөсө эз усь: миянладорын пө тадзи жө.

Челядьдыр казтылігөн вуджим вуграсьөм-кыйсьөм вылө. Вунөдөма нин вуграсян местаяслысь, тыяслысь, видзьяслысь нимъяссө. Сиктсаянь верстөн-джынйөн кымын горулын зэв пө вөлі шедө ком. Мися, местаыс шусьө Визув косьтөн, а сикт катыдын эмось Ревин да Павел вис косьтъяс, кытысь комыд шедө и өні, көть воддза серти ёна этша.

Но Грязнушка ёль паметяс кольөма. Гашкө, сы вөсна, мый Яга ёль йылө каян туй вылын тайө ёль пөлөныс вөлі колхозса мөсьясөс видзан пөскөтина, а пастукаліс батыс да Васьлы гоҗся каникулъяс дырйи ковмыліс отсасыны сылы.

– Сәтчө зэв ёна ельдөг петліс, – казтыштіс өт-тшөтшъяй. – Ёна и ваявлім.

– Ёні дзик ньөти оз пет. Раскыс нитшсяліс да бы-рис чөскыд тшакыс, – юөрти ме.

Висьтавны эськө позис и кушөдз чирсөм сись кодь поҗөма ягъяс, чериа тыяс пыдди кольөм лягушаа гөпъяс, дзикөдз нин россялөм видзьяс йылысь, но аддзысьөмысь кыпалөм ловсө Васьлысь уськөдны эг кут. Мед олө гөгөрбок на лөсьыд челядьдырас. Мед чужаніныс сулалө син водзас век на озырөн да мичаөн, кыдзи вөлі водзті. Эз өд шу кайлыны деревняөдз. Нинөм нин пө менам сәні абу.

Өтпырйö жалъ и эз ло жалъ меным өттшөтшъяйö.  
Жалъ, мый көнкө вель ылын йöзын олö. Абу жалъ,  
батысылы копыртчывны деревняса шойна вылөдз ку-  
тшөмкө сё верст эз кайлы да.

## МИЧА НЮМА МАЙ

*Шоналышитіс гажа енэж улыс,  
Бара лэбач бордзя öшинь сай.  
Эжва йылö уна рöма тулыс  
Бара вайис мича нюма май.*

*Унаторйөн дзескөдö на олөм,  
Но и бурыс вель нин уна эм.  
Со и сылам-йөктам кыпыд лолөн,  
Эскам: бурджык лоö тайö нэм.*

*Тайö бурыс, ёртъяс, миян сайын,  
Некод сійöс блюд вылын оз вай.  
Гажа тулыс бара радлун вайис.  
Видза олан, мича нюма май!*

## МИЯН РОБИНЗОНЪЯС

**Б**ыдөн, көнкө, лыддылыс Даниель Дефолысь «Ро-  
бинзон Крузосö». Интересной книга, торйөн нин  
челядылы. Тайö романыслөн подулын збыль история.  
Корабльса капитанкөд чорыда тангысылөм бöрын Ти-  
хөй океанса овтөм ді вылө, коді Чилисянь 560 километр  
ылнаын, чеччөдлісны моряк Александр Селькиркөс. Сэні  
сійö өтнас оліс нель во да нель төлысь.

Романас мөд ногөнджык. Корабль, код вылын вөлі Крузо, сибдіс ляпкыдінө да пасьмуніс овтөм дісянь неылын. Спаситчөм могысь команда пуксис шлюпкаө, мед воодчыны ді вылөдз, но путкыльтчис. Ловйөн колис сөмын Робинзон Крузо: сійөс йөткыштіс берег вылөгы.

Жалыд, дерт, петө: видлы та дыра овны өтнад, но мортыс эз тшыгъяв. Мөд лунас, кор лоис отлив да ваыс ляпкаліс, сійө варччис корабльөдз да бөрсө пур вылын сэтысь вайис куим сундук, көні вөліны, кызди гижө Дефо, «рис, сукар, куим кытш Голландияса сыр, вит тшупөд косьтөм көза яй, бура уна изтөм нянь. Таысь өтдор, колана инструментъясөн плөтниклөн ящик, вина ящикъяс, порок тыра куим нейджыд бөчка, зэв бур кык ружье да кык пистолет, уна пөлөс паськөм». Робинзон корабль вылас ветліс мөдысь на да вайис «куим көрт лом, ружьелы пуляяса кык нейджыд бөчка, сизим мушкет, нөшта өти кыйсян ружье да неуна порок». Таысь өтдор, Робинзон «вайис корабль вылысь дзык став паськөмсө, кодөс аддзис да нөшта парус, гамак, вольпась да юрлөс». Робинзон ветліс корабль вылө дас өтиысь да петкөдіс берег вылө ставсө, мый вермис.

Кызди аддзанныд, Робинзонлөн вөлі ставыс, мед не сөмын овны кызкө-мыйкө, а овны сьылігтырйи. Ныр увсьыс и лыйліс пөткаясөс, кодъяс вөліны тырыс. Сукар быригкежлө воис нянь, коді быдмис киссьөм тусьясысь. Сөмын өкмыс төлысь мысти сійө босьтчис төдмасыны діөн.

Мый эськө вөчис Робинзон, веськаліс кө дзык нинөм кежысь, сөмын куш кияснас, миян войвылө да эз арын, кор вөрын быдторйыс эм, а төв пуксигөн ли тулыснас? Эськө куліс. Сэк жө ме эг на кывлы, мед коми морт вөрын куліс тшыгла. Весиг челядь дзолясянь төдөны, мый позьө суйны вомө кок улысь да пу вылысь. Овлө,

вошасны да төлысь кытшлалёны, но кольёны ловйён:  
либө аддзёны корсьсыяс, либө петёны асьныс.

Жаль, өнiя челядлы да том йёзлы интереснөйджык  
компьютер, а абу вөр-ва. Унаөн этша мый төдөны весиг  
сикт гөгөрсьыныс. Татшөмгьясыд кок увсьыныс ни пу  
вылысь нинөм оз аддзыны.



*Абу нин зэв уна  
Вөрын звер да пөтка.  
Веськыда кө шуны,  
Кодсюрөыс өтка.*

*Өтка колис йөра,  
Сиджжө-й вөрса порсьыс.  
Ош оз пет туй шөрө,  
Мой оз сюр ю дорсьыс.*

*Ставсө морт өд шырө  
Да оз некыдз дугды.  
Регыд ставыс бырө,  
Юрыс кө оз югды.*

## СЬӨКЫД ВО

Зэрө и зэрө, зэрө и зэрө. Ёна жө нин и дөзмө-  
дiс. Гожөм шөр, а йөз косаөн эз на өвтыштлы-  
ны, а кодi и ытшкыштлiс, туруныс сiсьмис. Та каднад  
умсявмөн нин сёйлам тшак, а таво синмөн на эг аддзыв.  
Омөля дзоридзалiс пув. Пелысь и то зэв жебиник.




Чайта да, и котралысьыс да лэбалысьыс вöрас этша лоö. Буретш пöткаяслөн поз вылын пукалiгөн вель кöдзыд вöли, да и сы бöрын зэв на дыр ном эз пет.

Васöдинö пуктöм картофель пöдис. Петыштöмсö, öтарö зэригөн, он вермы мудйыны. Абу серам, но войтыр шмонитöны: таво пö картофельтö ковмас ньöбны Белоруссияысь. Мися, матысьджык на сюрас. Оз ков корсьöм, асьныс котöртöдасны, кыз шулöны öни, вöчасны бизнес.

Водзынджык, этш тöдтöг, тешитчисны бушков да шер. Ёна пöрласисны би да телефон везьяс вылö пуяс. Чипан кольк гыря шерыс дойдалiс машинаяс, зёллис öшиньяс, чегьялiс пуктасьяс.

Öтияс шуöны, мый шогмытöма олöмысь Енмыс тадз мыждö. Мöдьяс серти, тадзсö артмö асланым «мач» вылысь ставсö гөгöрбок чашйöмысь-пузувтöмысь. Ме тадзи жö чайта. Му шар вылысь мортлөн адгорш вöсна олöмыс унаысь нин бырлöма. Кыз шулöны, ми абу медводдзаяс да медбöрьяс.



---

*Тані майбыралө лов,  
Тані муса ставыс*

---



## ОЛАН ГАЖ

*Йöзын сьöлöмьд оз ов,  
Чужаніныд маыс.  
Тані майбыралö лов,  
Тані муса ставыс.*

*Асьным бöрйим вөр и ю,  
Шонді увсьыс сюрис.  
Олан гажным – Коми му,  
Мирын медся бурыс.*

*Чужан муын вомьд ваш,  
Овьö лэбан руөн.  
Луннас удж, а рытнас гаж,  
Ныла-зонма дзуюн.*

*Енэжаным еджыд юсь,  
Керка шонді бана.  
Шудыс кытöнкö оз усь,  
Сійö сöмын тані.*

## ЧЕЛЯДЬДЫРСЯ СЕЯН

**Ы**джыд гажъяс кежлö, торйöн нин юрсиктын  
ли юркарын ас аньтуйöн петкöдчигöн, гöсти-

төдан пызан вылө лэптылөны на ляз, сором, пикан, рака кузъя да шомакоръя пирөгъяс, а өд менам челядьдырйи татшөм вөлөгаыд вөлі быдлунъя сёянөн. Ми, дзоляяс, и вотлім да өктылім. Бать-мамлы вөлі некор, найөс сёр ытөдз вурыштліс колхоз удж.

Ставыс вөлі, кыз шулөны, ныр улын, ылө мунны эз ков. Медся ыліс – вертсайса Керөс, көні колхозлөн муяс вылө зэв петліс ракакуз. Шомакорла ветлім Шөр виддзө ли вуджавлім мөдлапөлө Кык зорөдаө. Сэтысь-асысь жө нетшкылім пикан.

Зэв чөскыда пыравлісны вомө ли, коляоз, пожөм йыв, гум, гөнян, ог нин сёрнит оз, чөд, чөдлач, мырпом, пув, сэтөр, льөм, лежнөг йылысь. Шомасъыс кусыньтөдліс вомъяс, но сөйлім и ыжнёнъ, турипув да пелысь. Велөдлісны мамъяс: өнджыкөсь пө лоанныд, онджык пө висьмөй.

Збылысь, висьөмыс өнасө эз и сибавлы, көть водз тулыссянь сёр арөдз котравлім көмтөг. Кыткө кө киным пуртөн вөласигөн вундысьліс ли кокным сангысьліс да босьтчыліс петны вир, сідзжө отсавліс быдманаяс да сюранаыс: доймөминө пуктылім лапкор ли гульчунъысь пуртөн вуштөм пызь. Кыз шулөны, пон вылын моз бурдліс.

Эм мый казътывны челядьдырысь. Сэні ставыс мортногса.



*Парма-вөрыс дзик аптека,  
Мый тэд колө, ставыс эм.  
Мортлы дзоньвидзалун сетө,  
Медым кузьджык лоис нэм.*



*Бурдөдөны кор и турун,  
Кокньод вайо йыв и вуж.  
Быдтор вöрысь-ваысь сюрö,  
Сöмын бöрйынысö куж.*

*Пöрысь йöзлысь бура юась,  
Лыдды книгаяысь тиöтш.  
Сэки му вылысь и пуысь  
Сетас козин вöрса кöдж.*

*Бурдөдчытöг бурдан көрсьыс,  
Кодöс лэдзö парма-вөр.  
Сійöс сетö сьөлөм шөрсьыс,  
Медым ловзис сьөлөм шөр.*

*Вöрас тиöкыдджыка волы,  
Йöзлысь кывкөртöдсö тöд:  
Мортыд дырджык сэки олö,  
Кор и лолыс сылөн пöт.*

## ЧЕРИ – ÖГУРЦЫ

Сёрниыс ком йылысь. Сійö збылысь öгурцы кө-  
ра. Миян Воч юын, торйөн нин сылөн йылас, кө-  
ни менам Габов сиктöй, медся пыдди пуктана да чöскыд  
чери. Гашкө, кодкө шуас, мый сьöмга донъявсьö вылө-  
джык, но оз быдөн тöд сылысь көрсö. Сьöмгаыд катлас  
да и лэччас, аньтуй на колö сійöс кыйны, а комтö, сөйö  
кө, быд визулысь позьö мачавны. Гырысьлы и посни-  
лы. Ыджыд аньтуй оз ков. Сöмын зумыдджыка вугыр  
шатинтö кут, быгыльтан коддьöмъясыс поводнöя верма-  
сьöны, лэптымөн берег вылөдзыд.

Өтитор лёк – зэв өдйө небзё. Ёкышгъясос моз кертөг лунтыртө оз позь видзны, артмас рокос. Дугдас сёйө-мысь, дугдан жө вуграсьны, да пыр и колө керны да солыштны черисө, абу кө сикт весьтын да он вермы котөртөдны гортөдзыд.

Сідзсө ком шедө быд косьтысь, но эмось ёна шедан местаяс: Визув косьт, Павел вис косьт, Дранесник весьт, Ревин косьт, Яга вом. Кад вылө кө веськалан, бура шедө и Яга, Ёндреёвка, Войим ёльясысь. Кор гылалөм бө-рын ёльясысь лэччө йиргъясө да, кыз шуоны мянладорын, нянявлө кулөмгъясө. Солаласны да төвбыд сэсся чөсмасясны.

Воддза серти мича чериыс ёна этша. Вөр пөрөдөм вөсна Воч дзикөдз ляпкалис, чериыслы эз ло вөляыс. А сытөг оз быдмы нинөм: ни звер, ни пөтка, ни пу, ни турун. Весиг гурина бырис, коді дзолядырйи куш вугырсө босьтліс.



*Лунвывланьын эм каштан,  
Пальма сэн быд йөрын,  
Но өд медся муса тан  
Асланым кузь вөрыс.*

*Медся мича войвыв рөм,  
Сійө нянь моз колө.  
Сьөлөмын век быггя льөм  
Дзолядырсянь олө.*

*Сэн жө пелысь – небыд би,  
Сэн жө кыз – век муса.*



*Мичсө шаня кылам ми,  
Сійөн и ог кусой.*

*Лунвывланьын эм каштан,  
Пальма сэн быд йöрын.  
Но öд медся гажа тан –  
Асланым сад шöрын.*

## АРТИСТ

**К**арело-финской лайкаос босьтлі кычион орчча тi корсьлыны да сійö меным вайис. Друг ним сетi да абу век друг кодь. Дышöдас кө парма-вөрöд котравны, кыдз шуласны, синсö лапниттöг, менö вермас эновтны, сиктö кольöм аскоддьöмгъяс дорö шутөвтны. Чöс туй вылысь воа гортö, сійö, бöжсö легöдöмөн, öшинь улысь петö, менö вочаалö, гашкö, весиг дыр ветлöмысь видö. Ме броткышта да сійөн и кольö: ог жö кут чужъявны ли беддьөн вачкавны, кыдзи öткымынөн ассыныс понъяснысö «велöдöны». Оз позь кывтöм пемöстö кедзовтны.

Ме ачым мыжа, мый понйöй татшöм. Кыйсьыськөд понйыс век вöрын, а ми ськөд деревняö волам отпуск дырйи сöмын арнас. Бур понйөн сылы лоны некыдз. Со и уртö дас пуысь увтö да муртса вöтчыштöм бöрын дозмөртö эновтö. Скөрмыла жö эськö, но Друг вылö лөкысь ог горзы ни син водзысь ог вöтлы. Мöдарö, прöща кора, «Тшыкөдi ме тэнö, Другöй, тшыкөдi...» – шулывла.

Чöс туйтö вöдитны эськö ёна понйыс оз и ков: мый шедас, сійöс чукöрт дай, но ловъя лолыскөд гажаджык. Сылы мыйкö висътавны позьö, и ош коддьöмтö кө кы-

лас, кӧнкӧ, юӧртас. Оз эськӧ шуны варгыль коксӧ морт  
вылӧ воысьӧн, да код тӧдас...

Зато Другӧй кужӧ артиставны. Кор став уджсӧ бер-  
гӧдӧм бӧрын рытнас пукся ворсны баянӧн, сийӧ дыр оз  
кӧсйы, пыр и босьтчӧ «сьывны», посводзын нюжйӧдлӧ  
операса солист моз. Кытчӧдз ог дугды, сэтчӧдз и оз  
ӧвсьы. Петавла жӧ эськӧ посводзӧ, янӧда йӧзсӧ шызьӧ-  
дӧмысь, но мыйӧн босьтча ворсны, пыр и босьтӧ асьыс  
партиясӧ. Пон омлялӧмтӧ миянладорын оз бурӧн лыд-  
дыны да «концертасям» регыд, но и тайӧ миян сьӧ-  
лӧмъяслы тырмымӧн.

\* \* \*

*Вӧрӧ пыра, горша лолала,  
Чӧскыд пармаыслӧн кӧр.  
Сийӧс юны век ме волывла,  
Кӧть ог мунлы вӧрсьыс бӧр.*

*Шоныд лываясӧд келала,  
Шондӧ косьтӧ, петӧ кор.  
Тадзи овны томсянь велалӧ,  
Томсянь муса парма гор.*

*Аттӧ коркӧ татчӧ сувтысьлы,  
Тавысь бурыс абу нем.  
Кодӧ шуӧ, чудь мый кувтысьлис?  
Сийӧ – буретш ме и эм.*

## ЖОГНИТӨМ

**М**иянладорын шуоны оз пөръялөмөн, а жогнитөмөн. И медся ёна жогнитөдысьяс – вөралысьяс да чери кыйысьяс. Съола-мөд кө шедас – висьталасны ноп тыр вайөмөн, весът кузя кө чери пысася – петкөдласны сыв кузя сирөн. Йөзыслөн этшыс татшөм да мый сэсся вөчан?

Пөшти быдөн пөръялө, но эмось медся пөръясьяс. Кыдзкө ме пасйылі нин, мый татшөмъяс лыдын Павел Ёньө. Пув вотанінсянь локтігөн кызкө суөдіс Яга таладорын. Велосипед вылын, багажник вылас ноптор. Эз и сувтлы. Гөгыльтчигас юалім, уна-ө шедіс, да пыр и сөрыштіс: комын съола пө да куим чукчи. Но и баквал (тадзи шуоны ошйысьясөс): татшөм нопъяд мед нин дас вит кымын съола.





*Вöрын тшакгяс йöктöны,  
Аддзылі ме тайöс.  
Оз ков, бара, тшöктыны  
Миянöс моз найöс.*

*Кытшын сюся бергалö  
Ёнджыкасö томыс.  
Весигтö вөр керкалөн  
Вашмунöма вомыс.*

*Йöктан шысö коялö  
Увгяс костысь тöлыс.  
Вотчысьяслөн збоялö  
Ягын-раскын гөлöс.*

## ВÖР-ВАЫС ДОРЙÖ

**Ч**ужан му йылысь сёрни дінö, ме думысь, лöсялас и тайö гижöдыс.

Модерн туйвизь серти серпасасысь Василий Васильевич Кандинскийлөн нимыс тöдса став мирын. Этшаөн тöдöны, мый сійö 1889 воын, кор велöдчис Москваса университетлөн юридическöй юкöнын, научнöй экспедициякөд воліс Коми муö. Студентлы, коді вöлі политической экономиялөн да статистикалөн кафедра вылын, интересуйтчис римскöй да уголовнöй правоөн, а сідзжö этнографияөн, окота вöлі пыдїсянджык тöдмасыны ылі пельöсса войтырлөн олöмкөд.

Экспедицияö ветлöм бöрын студент-юрист гижис кык статья. «Из материалов по этнографии сысольских

и вычегодских зырян. Национальные божества (по современным верованиям)» гижӧд веськыда йитчӧма Коми мулӧн историякӧд. Сэтысь унатор верман тӧдмавны сійӧ кадся чужан му йылысь. Но унджык выльтор аддзан дневникас вӧчӧм гижӧдъясысь. Пасъялӧ, кызди олӧны зыряна, кутшӧм налӧн сёян-юан, паськӧм, керкакарта. «Сьӧлӧм шонтысь тайӧ керкаясас ме кылі сьӧлӧмӧн сійӧс, мый сы бӧрын сэсса эг на кывлы. Найӧ велӧдісны менӧ пырны серпасӧ, овны сәні», – гижис сійӧ бӧрынджык.

Записной книгаыс, кытчӧ сійӧ пасъяліс коми йӧзлӧн олӧм-вылӧм йылысь, вӧлӧмкӧ, «ловъя»: сійӧ Парижын ӧнія искусстволӧн Ж.Помпиду нима национальной музейын. Сэтысь пасйӧдъяс пыртисны В.Кандинскийлӧн бӧрйӧм гижӧдъяса кык тома книгаӧ, коді петіс 2008 воын. Петіс Москваын сӧмын 1500 экземплярӧн да абу Коми Республикаса ни ӧти библиотекаын. Неважӧн дневникас пасйӧдъяссӧ чинталӧмӧн йӧзӧдіс чужан му туялан «Дым Отечества» торъя выпускын «Республика» газет. Ме лыдди да аслым вылӧ вӧчи татшӧм пасйӧдъяс: «Центр зырянского края – Усть-Кулом»; «В день Петра и Павла, до которых соблюдают пост, зыряне варят всей деревней пиво изо ржи у часовни, заменяющей церковь. Тут же служат молебен. Пиво потом пьётся всеми. Напиваются, поют, пляшут. «На игрищах» тоже пляшут и поют, но песен своих нет, есть лишь переводы с русского»; «Зыряне запуганы чиновниками до невероятности. Но легко поддаются ласковому обращению»; «Ночью коми заботливо укрывал меня»; «Да здравствует Усть-Кулом! Бог Чудов найден!!!»; «Зыряне – премилый народ. Все на них клеветают»; «Я положительно влюблён в зырян»; «На меня смотрели как на нечто чудесное и никогда не виданное».

Кулөмдинөс, миянлысь Эжва йывнымөс, век лыд-дылысны помтөм-дортөм пармалөн шөрөн. Кольөм нэмса кызьөд воясын вежөра юръяс вөзйисны вöчны сийөс весиг юркарөн. Тайö менö ёнасö эз шензьөд. Менö шензьөди В.Кандинскийлөн «Да здравствует Усть-Кулом! Бог Чудов найден!!!» пасйöдыс. Мый йылысь нö сёрниис? Эз öд весьшөрö куим горöдан пассö пукты. Сёрниис, дерт жö, оз мун Чудов ова морт йылысь. Сёрниис, кызд ме чайта, чудьяслөн, комилы вуж сетысьяслөн, Зарни Ань Ен йылысь, кодлысь мыгöрсö дзеблöмаöсь да эз на сюр öниöдз. Эз вермы сийö лоны и Кулөмдинын. Гашкö, сёрниис мойд ли сыланкыв йылысь, кодъясöс гижалис сэки В.Кандинский? Кайлöма Керчомъяöдз. Пасйö, мый сэнi гижис öти фольклорной сыланкыв, но эз помöдз, сылысьыс висьмис. Кывбуръяс гижны и то кадыс абу да збыльсö тöдмавны ме ог эшты, но мый Эжва йылöй бурмöди сёлöмсö ыджыд художниклысь, паметьын олас нэм помöдз. Аттö сылы миянöс шаньөн шуöмысь да пыдди пуктöмысь, аттö кутшöмакö да дорйöмысь.

Сёлöмöй ас местаын сыысь, мый öни эмöсь асла-ным сыланкывъяс. Öниä выль коми сыланкывъяслысь «Василей» фестиваль-конкурс мөвпыштöмөн, öтүвтöма республикаысь став ашшөр композиторöс да сыланкывсыд ми ог тшыгъялöй, радпырысь юксям и финн-йöгра котырö пырысь мукöд войтыркöд.

Дзик збыль сийö, мый миянöс нэмсö чиршöдлöны чиновникъяс да мыйлакö нэмсö жö и терпитам. Миянöс ньöти оз пыдди пуктыны быдлаысь локтöм йöз, а ми бара жö кыв ни джын.

В.Кандинский гижö: «Моя задача была двоякого рода: изучение у русского населения обычного уголовного права и собирание остатков языческой религии

у медленно вымирающих зырян, живущих преимущественно охотой и рыбной ловлей». Збыльысь, и бырам надзöникöн, кызд народ. Важöн нин, гашкö, эг вöлöй, да вөр-ваыс, асланым муса парманым, дорйö. Кытчöдз?

\* \* \*

*Пыран вөрö – сьöлөмишөрö,  
Ставыс сэни ловлы личöд,  
Ставыс сьöлөм пышкад төрö,  
Ставыс синзясыдлы мича.*

*Весиг коса пу кодь пожöм  
Абу чукля морт моз урöс.  
Весиг коз, код куим вожа,  
Чужтö мөвптö сöмын бурöс.*

*Вичкоясын юрбитöны,  
Овлö, Енсö пöрзявлöны.  
Вöрас, пуяс сöмын көни,  
Налы-й помöдз висьтасьöны.*

## ВОДЗ ВЕРСТЯММАН

**В**өр-валысь олөмсö туялысь, сийöс бура тöдысь да радейтысь, кыйсьысь да öтпырйö гижысь Николай Васильевич Верещагин гижö, мый налön Пертовка сиктын вөр вöли керка мыш выланыс, и сийö сэгчö пырис куим кымын арöсөн. Гырысьяслөн вотчыны мунöм бöрын дзебсясьöмөн вöтчис на бöрся да регыд мысти и сибдiс нюрö. Аддзис понйыс да кутiс гораа увтны, локтiсны вотчысьяс да мездiсны. Кöкъямыс

арөсөн повтөг нин гежмаліс весиг бура ылі ягъяс-  
расъяс, дас кык арөссянь пельпом вылас волысалис  
ружье да кутіс ваявны пөтка.

Миян Габовын вөр дзик жө орччөн, мед нин лоас сё  
воськов. Дзолядырсянь эз ылыстчы, а матыстчис, сы  
вөсна мый вөрсялісны эновтөм муяс. Ляпкыдик по-  
жөма тиллын тулысъяснас койтөны нин таръяс. Ме  
пөшти кагаөн на жө тапсьөді колхозлөн потшөс пөлөн,  
код сайын зарниөн гыалис нянь, Исак мугорувса ягө,  
кытчө кыкысь кымын нин, мыш вылас өшйөдөмөн,  
некодлы вөлі кольны да, нуліс мам. Сійө сэтысь вотіс  
тшак – гөрд гоб. Аттө чөскыд вөлі жаритөмөн посны-  
дыс, мурчкакыліс пиньяс улын. Со и муні ме корсьны  
чөскыдсө.

Вочаси кө гырысьяскөд, гашкө, зэв на дзолятө сув-  
төдісны, но найө вөліны удж вылын, мыйлакө эз тыдав-  
ны и пөрысьяс – ныв-пилысь ме коддьөмсө видзысьяс.  
Со и тюри мамөлөн ыджыд вотчан чуманнас маті ягө.  
Дзоля мортыдлы Енмыс сетіс тшаксө аддзымөн и вот-  
мөн да эз тшөкты, тыдалө, пыдө пырны, туй дорсьыс  
и вотчи. Өдва и кыски тыра чумантө. Бөр локтігам  
верстьө йөзыд вөліны нин.

– Со өд Өдялөн детинаыс кутшөм шань, шег на-й  
эм-а, – шензисны найө. – Коньөрөй, ачыс нин асьсө  
вердө.

Ме, дерт, эг төд, мый сэтшөмыс «шегйыс» ни  
«коньөрөйыс», но «шань» кывтө вежөрти нин да шеш-  
муні ошкөмсьыд. Пельясөдз нюмөн и локті гортө. Гы-  
рысьяс пиысь кодкө, буракө, весиг отсалис вайны тшак  
тыра чумантө. Мамө эськө көсйис ньөръявны (вошин  
кө пө нө?), но жалыс петіс да морөс бердас сөмын то-  
пөдіс, мыйлакө весиг бөрдыштіс.

Сэссия вөліны ыліджык тшакъяс да чөд розъяс,  
збыльысь вөрса ордымъяс да войковъяс, бипур и ружье.  
Сиктад водз верстямман, торйөн нин, абу кө батыд.

## ЮРҚЫТШ

*Юркытша нывка  
Сикт кузя мунё.  
Сы бөрся зонка  
Видзөдө уна.*

*Кытысь нө тайё  
Пыстаыс воис?  
Мый, бара, налөн  
Сьөлөмкөд лоис?*

*Карысь ли, кысь ли  
Бобулыс тайё.  
Пёчыс ли, код ли  
Гөститны вайис.*

*Некыдз оз суюны  
Юраныс найё:  
Асланыс Наста  
Ю дорсянь кайё.*

## ГУЯС ВЫВТІ

**В**арламув тысысь, пуяс костөд видзөдалөмөн, кы-йөді уткаясөс. Дзолядырйи тысыс вуграсьлім, а талун кежлө ватуруналөма да он сибав. Да и чериыс абу. Дизельнөй станциялөн вель уна тонна солярка тыас петліс да став ловъясө вөтліс. Ключьяс эськө вочасөн сөстөммөдөны васө, но чери олө омөля на. А уткаяс тулыс-арнад век пуксьөны дай асланымъясыс, горда коддьөмъяс, быдтысьөны. Мыйлакө радейтөны пукав-

ны дзикөдз нин турунзбөм висладор помын. Сэтысь и казялі гордаос, но лыйны эг сяммы: кыліс весиг ствол помон турун сі вештөмсө.

Но тайо мено эз дөзмөд. Кыдз шулөмаось рочьяс, абу век каньлы Йөввыв. Арыс кузь на. Бурпөт на келала, корсюрө весиг дышөдлас. Тадзи мөвпалөмөн восьлалі гортлань да бара на аслым пасйи, мый өтилаті восьлала мортъясөс дзебөм гуяс вывті, кыті сиктсаяс важөн нин лөсьөдөмаось ты пөлөн ветлөдлан туй. Крестъясыс абуось нин, сөмын өти, дзикөдз сісьмөм, куйлө кыр горувлань лэччыштөм коз улын. Мылькъяс өдва жө нин төдчөны. Кыті ветлөдлөмаось, өтвесьтасьөмаось шыльд му веркөсыскөд.

Татчө дзеблөмаось водзынджык кулысьясөс. Ёна важөн, мамөлөн висьталөм серти, шойнаяс вөлөмаось и вөвлөм конюшня да порсь видзанін бокин. Век шуа аслым водзө вылө ордйөдны тайо местасө, а уткатө кыйөдігөн век вунө. Потшны али мый местасө?



*Куръяө кулөмъяс чөвті,  
Шедас кө – бур, оз кө-й – оз.  
Лысвасө джуджыда көвта,  
Катлалысь вөвъясыс моз.*

*Гортын ме, ас чужан сиктын,  
Лоа тан быдса кык лун.  
Өдзөсөс талань эг сиптыв,  
Юрсиктысь ылө эг мун.*

*Ассьым на воясөс лыддьө  
Лөсьыда чөвталысь көк.*



*Дзор нин, а дзоля на быттьö,  
Котрала дышöдчйтöг.*

## ВÖР-ВАСÖ ВИÖНЫ

**Т**улысыс таво, этша вылö, сёрмис тöлысь, а пöt-калön быдтысигас на, август 8 лунсянь, восьтисны вавывса пötка вылö кыйсьöм. А вöрса пötкаöс позьö кыйны та бöрын вежон мысти. Ветли видзöд-лигмоз деревняö. Уткапиян каллян ыдждаöсь на и эмöсь, мамныслön бöж дораныс на кутчысьöмаöсь. Вöрын сьöла пышкай ыджда.

Кодлön вежöрыс эм, дерт, кагаястö оз лыйлы, но öд öни урöдыс тырмö, шаркöдасны да синнаныс весиг оз лапнитлыны. А медся урöдъясыс – чина йöз, кодъяс гижöмön лэдзöны тадзи вины вöр-васö. Таысь судитны колö, но эг на кывлы, мый код вылысь кö «гön» усис.

\* \* \*

*Мöд вежон зэрыс дурö,  
И тайö зэв öд лёк:  
Он запты, небось, турун,  
А пöжан сöмын шог.*

*Кык вежон чöж нин косьтö,  
И тайö ёна бур:  
Зэв мича турун босьтим,  
И, сідзкö, лоö нур.*

*Код эськö бурсö вöчис?  
Мам шуö: «Сетис Ен».*



*И пöчö тадз жö шуö,  
И, сідзкö, тадз и эм.*

## АС ВÖЧÖМ ТЫЯС

**Ш**уöны, мый ва из писькöдö. Вермас лоны, но мыйсюрö абу вынъяс серти весиг ытвалы. Ме во дас нин видзöда, кызди веськыдавны кöсйö Вочю Матвей вис кöдж, но оз вермы, сöмын ичöтикаöн курччышталö берегсö. Кузь вужъя баддыс тшöкыда петöма да оз лэдз кырöднысö. Эз кö эськö баддыс вöv, важöн нин дзoляник ты артмис. Зырьöн некод жö оз отсышт дай. Ыджыд кö быттö вöли кöджыс да вермис ыджыд жö и ты артмыны, гашкö, кодкö и пöсь кисьтис, гортсянь матын да, а дзoляник кöджыс да некодлы абу окота мырсыны.

Сідз кö нин шуны, морт отсöгөн вöчöм тыяс Габов гöгöрын уна. Коді писькöдліс, сйö и кыйсьыліс, сылөн и черыс век вöлі. Вöчысьяс пövстысь öні некод нин абу. Рöдвужыс, эм кö, вöдитчö, а кызвынас дзик нин бокö-вöйяс кыйсьöны, весигтö йöз сиктсаяс да посёлксаяс.

\* \* \*

*Муса чужанінö  
Арыс чövтис син.  
Пельысь и калина  
Банйöмаöсь нин.*

*Мöдлапöлын зорöд,  
Талапöлын и.*



*Мича рытъядорыс,  
Вөр-пу йылын би.*

*Сулалө на эжөр,  
Лөз на енэж сер.  
Бөрынджык на кежас  
Унмө суюысь зэр.*

*Век на абу кизя  
Восьса гөгъя ныв.  
Мед и дыр на видзас  
Шаня ывлавыв.*

## НЕМОРТЪЯС

Омоль йөз, кодъяслы веськодьюсь мукөдыс, да кодъяс олөны сөмын өти лунөн, важысянь нин кыйсьөны сідз шусяна электроудочкаөн, коді виө оз сөмын чериөс, но и ва пиысь став ловъясө, тшөтш и черилысь сёянсө. Кызди чайтөны бур йөз, та вөсна медясө и чиніс миян юясын чери. Ме синмөн на эг адззыв тайө кыйсянторсө. Кулөм кодъ жө пө, кыззкө токалөны-виөны аккумуляторөн. Ток улө веськавлөм чериыс, кодлы абу кувмөн лоөма, оз пө весиг сэсья пөкъяв, кельчилөн синмыс быдсөн кельдөдө.

Татшөм йөзсө, кодъяс вөчөны, мый оз позь, ме шуа немортъясөн. Йөзладорысь ог төд, а асланым сиктысь татшөм немортъяссө, кызд оз шогмы кыйсьысьяссө, эг на казавлы. Горулысь воласны да найө «дурөны». Төдөны, көні мый окотасө вөчны: этшаник йөза ыл пельөсад видзөдысьыд да чырыштысьыд өтчыдысь кө вонас волас.



*Сиктын гожом уна йоза,  
Пуктам турун вуджны төв.  
Сиктлөн уна ыж да көза,  
Сиктлөн уна мөс да вөв.*

*Сэни-й-тани виддзыс гора,  
Йөзлы нюмгялө кө лун.  
Кодкө весиг Енлысь корө,  
Медым тати зэр эз мун.*

*Гөгөр чышгян, гөгөр дөрөм,  
Гөгөр лёдзьяс, гөгөр юр.  
Пажун дырйи чөскыд шөрөм,  
Көдзыд ырош ёна бур.*

*Позьё гижны дзонь поэма,  
Но ме кывбурысь ог вудж.  
Сиктөй лоё ыджыд нэма,  
Тадз кө төдө асьыс удж.*

## АСЬНЫС ЫДЖЫДТЪЯС

**С**ёрни мунас Помөсдин вожсаяс, торйөн кө, тат-чөс кыйсысьяс-вөралысьяс йылысь. Кор лоис пось ни көдзыд вөралысьясслөн да чери кыйысьясслөн районса котырысь, кодi уджаліс нисьё эз, найё лёсьодісны асьыныс котыр. Юралысьён да сылы отсасысьясён бөрйисны медся пыдди пуктана йөзөс – и со мөдөд дас во нин Эжва йывса вөръясын асьныс ыджыдтъяс. Эм пуля-порокөн вузасян магазин, лёсьодалісны лёсьыдіник керкаяс, көні позьё шойччыны оз сөмын вө-

ралысьяслы, но и вотчысьяслы. Дзоньталёны да выльысь вёчоны ёльяс вомён посъяс, ветланаён кутоны ордымъяс да туйяс. Кызвынсё вёчоны взносьяс весьтё, отсалёны ассыныс удж котыртысьяс. Быд во чукөртчылёны некымынысь, сёрнитёны вёчөм удж йылысь, казялёны бурсё, эрдөдөны тырмытөмторъяс, сувтөдөны водзё вылө могъяс, а сэсся урчитөмасё вёчоны. Вöрын вывтiасъысьяс тайö вожын абуöсь.

Эм татшөм котыр нöшта Югыдъягын. Сэни абу на сэтшөм бур, кызди Помөсдинын, но бурланьö вежсьөмтьяс эмöсь. А мукөдлаын парма бöрся сюся видзөдысьыс абу. Сийөн и помалөмөн помалёны зверсё, пөткасё и черисö.

Бөрдам да элясям, мый ставыс бырö, дорйыны корам, а ставыс ас саяным.



*Берегын парусъяс-вонъяс  
Абуöсь коркөя моз.  
Матисö-й пуктёны зонъяс,  
Ылисö – важөн нин оз.*

*Тырöны ю пöлөн видзъяс,  
Быдлаын гырысь нин чаль.  
Видзөдны быттьөкө мича,  
Төдан да, морт ногсөн жаль.*

*Сьөлөмын воддзасö видза,  
Син водзын зорöда кöдж.  
Тырöны оз сөмын видзъяс,  
Тырö и олөмным тишөтш.*

## ЛАПЪЯПЕЛЬ

**Т**алунъяыс вунö, а челядьдырысь ставыс син водзын да юрын. Сэни жö Лапъяпель. Татшöм ним эськö ме пункті понлы, кодöс ме аддзи медводдзаясь да ёна и шензи.

Öни ме тöда, мый зэв ыджыд пельяса, кузь кокъяса да гыркъя понйыс вöлі гончöйöн, а сэки школаö на ветлытöм мортлы вöлі ыджыд дивöөн. Миян сиктын вöліны сöмын кöлач бöжа понъяс да ме чайті, мый му вылын татшöм понъяс и эмöсь.

Öтнам вöлі да, мися, пурас, но сійö сöмын исыштис да водзö лабутнöя восьлаліс сиктса дзик öти улича кузя. Бöрсяныс кузь воськовъясөн жö локтіс кöзяиныс. Понсö моз ме сійöс эг жö на аддзыв. Тыдалö, эз лыдды коланаön шыасьны шег дорö, весьтасьöм бöрын сöмын бергöдыштліс юрсö мелань да мөдöдчис водзö. Видзö-дөмпырысь, тöдіс, кытчö мунны.

Рытнас нин тöді, мый миянладорö локтö мупытша озырлунъяс корсьысь экспедиция. Сиктö пырысь мортыс колхоз контораын сёрнитчöма юралысь Педөр Матвейкөд, мед налы дон вылö вичмөдасны картофпель, йөв-яй да мукөд сёянтор. Ме, дерт, эг гөгөрво, мый сэтшöм экспедицияыс, кутшöм сэтшöм озырлун вермас лоны му пытшкын, из да картофпель кындзи. Буракö, нинöм эз сюрлы. И мед. Эськö ягъяснымöс моз гөгөрбок пасьвартісны.

А Лапъяпельыс, кушенчаысь на гырысьджык пельяса мугöм понйыс, быттьö мича серпас, син водзын.



*Ыджыда съодасис ягыс,  
Ыпъялис некымын лун.  
Өзтис эз арөса кага,  
Эз жө и гымньөвйыс мун.*

*Кусөдтөг кодкө да колис  
Бипур ли чигарка пом.  
Дорйис тат визувтысь ёльыс,  
Эськө став вөрыслы пом.*

*Вотөс ни тшакыс оз петны  
Сотчөмас зэв уна во.  
Тати и зверыс оз ветлы,  
Тани и пөтка оз ло.*

*Ягъяссө чишкалан биын  
Сотчө и асланым лов.  
Тадзи и асьнымөс виам,  
Пуля ни порок оз ков.*

## КОМИӨН ОЗ ГӨГӨРВОНЫ

**К**ыям Дон ты вылын йи улысь чери. Медводдза йи вылас лөсьыда шедөма, а кык вежон кольөм бөрын черыс оз көсйи весиг видлыны. Өтилаын розьдчам, мөдлаын, коймөдлаын, но весьшөрө.

– Коминад, тыдалө, оз нин гөгөрвоны, рочьясыд ас ногныс велөдисны да. Часлы, рочөн шыасьла, – шмонитө орччөн пукалысь. – Ловись, рыбка, большая и маленькая. Куда ты, сопливый ёрш, спрятался?

– Тадзтө омөльтөмнад эськө оз нин матыстчывны да, – шмонитөмыс сьөлөм серти и меным. Мыйкө өд вөч, асьтө пикө он вошты.

Бокөвөй йөзыс, тшөтш и рочьясыс, збыльыс ёна кутисны локны шеданаджык местаясө быдлаыс, весиг кыксө верстайса карыс. Сы мындаон чукөрмыласны, весиг машинаяснысө некытчө берегас сувтөдны.

Но вугралөмнад чериыд өдвакө бырас. Лыдтөм-тшөттөм кулөм йи улас вөйталөмаөсь да тадз кыйөмнад збыльыс нинөмыс оз коль.

Абу мича юөм-кодалөм. Öтилагын сы мында нин куш доз, быттө пионерскөй бипур öзтыны пес ваялөмаөсь. Йи сылас да ва пыдөсө лэччасны. Му вылын пө медся омөльыс морт. Збыль, гашкө?



*Ракаясөн тыр телеантенна,  
Ракаясөн тыр и вөр-пу йыв.  
Мисьтөм бордйөн шенасьысыс эм на,  
Оз и лөньлы, кравзө ывлавыв.*

*Нэмсө эськө рака шойыс вөлі,  
Но и сьывліс петук Петрöван.  
Сылөн гора, часі пыдди гөлөс  
Кыліс мян сиктын сэн и тан.*

*Рака кежыс өмөй сөмын колям?  
Катша өмөй сөмын сісьтас юр?  
Коми вежөр абу татшөм дзоля,  
Мыйкө мөдтор тані – абу бур.*

## ЕДЖЫД ВИР

Начальной школаын на велөдчигөн ме веська-нлі орчча Дзоль сиктө да ёна и шензи: сиктыс абу ю бокин, а дзульён петысь ключьяс дорын. Тайё ключьясыс абу горулынось, а пöшти сикт шöрынось, мыльк вылынось. Му пыдöсысь зэв югыд ваис петö еджыд лыа чирьяс лэптöмөн, сэссия тёргö жöлöбөд, кытысь веськалö муö либö матыстчöм нывбабаяслөн ведраясö. Ва катöдысь мужичöйясöс татысь он аддзы, тайöс найö оз лыддыны асланыс уджөн.

Ваис аслыспöлöс кöра, юсасыд чöскыдджык, но, видзöдöм серти, арлыдтö оз содты: дзольсаяс мукöдьяс серти дырджык оз овны. Кöнкö, чöскыд ва вöснаыс и пуктылис коркö кыйсьысь ассьыс вөр керкасö, а сэссия матыстчалисны мукöдьяс да овмöдисны Перымса мусö, кодi татi, Сöветьяслөн кадö административной границаяс вылö юклöмөн, лоис Комилөн. Мöд татшöм сикт, кодi ключ дорын, а абу ю бокин, гашкö, парма-вöрас сэссия оз и сулав.

Бöрынджык суйисны вежөрö, мый став ёльяс да юяс артмöны ключсянь. Муыслөн еджыд вирыс ку-тшöмкö нöрыс йылын сöдзтысьö войтьясөн, а сэссия вочасөн гартыштчö визулö да шуньгö горув бережьяс костын, небыд мусö йöткöмөн, изьяс вештöмөн да орд-йöдöмөн. Та мында вöляыс и эм. Ыджыд вöляыс сылы вичмылö ытва дырйи, кор сийö и медся вына да гора.

Еджыд вир лöсялö му вылын став быдмысьыслы, сы помысь и ловьяось ставөн: вöрыс и туруныс, зверыс и пöткаыс, гутыс и гагйыс. Зэв лöсялö сийö и пöсь вира мортлы: оз сöмын горшсö веськöд, но и ловсö кыпöдö кывбурьяс тэчöмөн, сыланкывьяс лöсьöдöмөн да ливкйöдлöмөн.

## КОЙТ

*Абу на и дзикөдз тулыс,  
Лымйыс кушөдз эз на сыв.  
Но өд кылө енэж улын  
Аслыспөлөс сьыланкыв.*

*Чукчи ветлө дозмөр водзын  
То ли өксы, то ли сар.  
Сійө гажа ваысь коддзис,  
Сьөлөм шондйысь на жар.*

*Томгъяс пукалөны чөла,  
Коркө-й налөн ёнмас сыв,  
Коркө-й налы сюрас пөлыс,  
Водзө юргас сьыланкыв.*

## АДДЗЫСЬЛЫТӨДЗ

**К**ык кытшолысь кык лун жө и лэдзалі лэчьясөс – меным сьөла-дозмөр кыйысьясөс. Арыс вөлі вотөстөм да шедіс этшаник, но и сы вылө аттьө, век нин чөсмаянтор.

Бөръя лунас медбөръя лэч лэдзөм да ю кыр йылө петөм бөрын пестылі бипур да пузьөді чай. Тэрмасыны вөлі некытчө: юрсиктө лэчча аски, талун узя на аслам муса Габовын, ломтыла на дзоля жырйысь пачөс да кывзышта на коз пелысь печласьөмсө.

Отпускалігөн чужанінса вөр-ваөд келалөм, дерт, мудзтө, но сійө жө и бурмөдө сьөлөмөс. Сөмын тані кыла ме ачымөс збыльвылө ловъяөн, збыльвылө бордъяөн. Сөмын чужанінысь кыла кывъяс, кодъясысь сэсся гөрддзасьөны кывбуръяс. Сөмын чужанінысь кыла



шыяс, кодъясысь сәсся бордъясьӧны сыланкывъяс. И кыла ачымӧс йӧзыслы коланаӧн, сы вӧсна мый найӧ тайӧ кывбуръяссӧ лыддьӧны, тайӧ сыланкывъяссӧ сылӧны. Вермас-ӧ лоны таысь ыджыдджык шуд?

Ләччан луно томнала ӧдзӧс да сёрнита шоныда да пӧтӧса видзысь керкакӧд:

– Атгӧ став бурсыс, донаӧй. Эшта кӧ, медводдза йи улысь чери кыйны вола, а ог кӧ, – Виль во кезлӧ виччысь. Кык вежонся каникултӧ вӧчисны да слӧймӧдча. Аддзысьлытӧдз, эн гажтӧмтчы.

– Аддзысьлытӧдз, габовсаяс, – прӧщайтча ас сиктса войтыркӧд, дум вылӧ найӧс уськӧдӧмӧн, а Ӗльӧксей дядькӧд да рӧдвужкӧд – ки кутлӧмӧн, кутшӧмкӧ да кывъяс шуалӧмӧн.

– Керкатӧ видзӧдавлам. Эн дыр костав. Виль во кезлӧ кӧть вола, – кыла на машинаӧ пуксытӧдз ас йӧзлысь кывъяссӧ да кӧсйыся:

– Вола, вола.

Шуа «Аддзысьлытӧдз!» и тӧныд, дона лыддысьысь.  
Ас чужанінса вӧр-ваын да йӧз пӧвстын олӧмӧн, шоны-  
да ачымӧс кылӧмӧн, ме тӧныд козьнала на сӧлӧмлысь  
виль петасъяс.



## ЮРИНДАЛЫСЬ

Водзкыв пыдди ..... 3

**Тані олө шоңыз руөн  
Нэмсө бордъя коми йөз**

«Лымсьыс еджыд чужан муй...» .....	6
Ёгор чөс туй пом .....	6
«Кык өшинь костын сімөм пелысь...» .....	7
Биа төв.....	8
«Абу өшинь улас дзоридз...» .....	9
Лөсьыд гозъя .....	9
«Быттьө еджыд шалля пөчъяс...» .....	10
Уколтөм санаторий .....	11
«Эмөсь вель на ыджыд йирьяс...» .....	11
Вылыс и важыс .....	12
«Веськодъ мен Австралия...» .....	12
Кодыс бурджык? .....	13
«Сюра лешак тайө көчыс...» .....	14
Пуктылөма ки.....	14
«Вөрын пө эм Вөрса...» .....	15
Чачаяса коз .....	16
«Гортад овлө жө шогалан луныс...» .....	16
Бадъ – кукань гадъ .....	17

**Овны велөдө и вөр,  
Тшөтш и визув юыс**

«Велөдөны бать да мам...» .....	20
Анча – синмыс клянича .....	20
«Ассьыс чужанінсө...» .....	21
Руд вывкышаяс.....	21
«Сөмын тшөтшөдөм нин вөр...» .....	22
Лов керка .....	23
Аньтуй .....	23
Көинъяс.....	24

«Косьмис весиг сьöрт...» .....	25
Лупа синма кöч .....	25
«Компас кöть оз новлы...» .....	26
Коді кусньöдлö? .....	27
Асывводз .....	28
Чöскыдтö тöдöны .....	28
«Небыд кинас асывводз...» .....	29
Синпöла.....	29
«Дзолукöй дай юй...» .....	30
Васьö, лый .....	31
«Пелыся бипурийөн керасыс сотчö...» .....	32
Бич пакет .....	32
«Видз шöрö гатшөн воді...» .....	33
Уткаяс да вöвъяс .....	33
«Тан абу сöмын лымйыс юсь кодь еджыд...» .....	34
Еджыд гозъя.....	34
Баба гожöм .....	35
Кöрт пос .....	35
Менам потшöс.....	36
Пожöм вир.....	37
«Гортын век ола да выла...» .....	37
Пуяс, кыдзи и йöз .....	38

**Пармаыс – менам и батый,**  
**Пармаыс – менам и мам**

«Усьöны коръясыс, усьöны...» .....	40
Натöг гажа.....	40
«Катöдöй менö кöть райö...» .....	41
Гуся яг .....	41
Вöрса ю .....	42
Гыча ты.....	42
Мыр.....	43
Мамлы пув .....	44
«Гожся зэрыс регыд оліс...» .....	44
Тіль .....	45

«Муыс-ваыс лөнис таті...» .....	46
Пажун .....	47
«Эжва бара арся ваяс нуө...» .....	48
Нажөтка .....	48
Ар пом .....	49
Гөсьтинеч .....	50
Июль .....	50
Павел вис косьт .....	51
«Коми муным уна вөня...» .....	51
Тьөзө .....	52
Аддзысьөм .....	53
Пөл пиня ад .....	53
Төвлань .....	54
Сөрмис .....	55
«Зэра төлыс морөсөдзым пырө...» .....	55
Тулан, мед тэ кулан .....	56
Петыр яг .....	56
Камыш .....	57

**Пипу пыжөн ката чужанінөд,  
Кыркөтш йылө петіс гажа яг**

«Чужанінысь кывза йөласө...» .....	60
Киподтуй .....	60
«Пипу пыжөн ката чужанінөд...» .....	61
Куштөм сьөла .....	62
Көдздөдіс .....	62
Дозмөр варыш .....	63
«Тайө абу еджыд лым...» .....	63
Лэч-чемпион .....	64
«Кытысь нө тیانлы...» .....	65
Мырпом көр .....	66
«Атгьө, пармай – вердысь-удысьөй...» .....	66
Пытш .....	67
«Лым усьліс, сыліс, бара усис...» .....	67
Понлы шыд .....	68

Өндрөөвка .....	69
Эскадрилья .....	69
Пармаса шуд.....	70
Васа вурун.....	71
«Катөдөй менө көть райө...» .....	72
Бордтөм «сьөлаяс» .....	72
«Вөрзё нин пөткаыс, нюрсаыс...» .....	73
Дарөвөй-вөрөвөй .....	73
«Бура дыр өд кольсө лыддис...» .....	74
Ытшкысь.....	75
Курыд жов пу .....	75
Кык көчөс оз кыйлыны .....	76
«Байдөггьясыс бадьяс сайті...» .....	76
Хорь вөлөма.....	77
«Оз төлыс лымсө важ моз гарт...» .....	78
Женялы козин .....	78

**Менам потшөсөй өдвакө пөрас,  
Сійө – нэмгясөн сулалысь вөрыс**

Октябр пом .....	80
Кыйтөм сьөлатө эн кушты.....	80
Шуд.....	81
Лымкайяс.....	81
Ю дорын.....	82
Локатор пель .....	82
Вылысь аддзысьөм .....	83
Век велөдчы.....	83
Пожөм .....	84
Пайкысьяс.....	85
Лөсас.....	85
Абу ва шыр, а вурд .....	85
«Тэ мыйла, мортөй, татшөм скөр...» .....	86
«Баб, баба».....	87
Выль мойд.....	87
Чукчияс – шойна вылын .....	87

«Эм сус и кыдз...» .....	88
Мустангъяс .....	88
Ловзян кад .....	89
Эз волыны .....	89
Нюр .....	90
Бипура варыш.....	90
Дона серпас.....	91
Витамин .....	91
Тулысын.....	91
Гулюяс .....	92
«Бара тулыс йылысь висътӧй...» .....	92
Пышйӧма .....	93
«Рака кодӧскӧ да ёрӧ...» .....	93
Бӧрдьсь зорӧдъяс .....	94
«Коркӧ и жӧлӧбысь войтваыс орӧдчас...» .....	94
Кык кока кӧч.....	95
«Шондӧ улысь места сюрис...» .....	95
Сямтӧмъяс .....	96
«Сылыӧ морт, мый шонтӧ сылысь лов...» .....	96
Сюзьпи .....	97
«Эжва вӧлі бура джуджыд...» .....	97
Кулӧмын – шыръяс .....	98

### Миянлы медся ӧд дона

#### Эжва йыв – ас чужан му

Ас чужан му .....	100
Воыс бур – эм ур.....	100
«Пелысьыс кор быгъялӧ...» .....	101
Сюлка .....	101
«Кага чабыр ыжда сьӧла...» .....	102
Лым вывтӧ – уткала .....	103
«Ёна тай – эрдъяс да мылькъяс...» .....	104
Мой-герой .....	105
Пожӧма яг .....	106
Беддя вийӧр .....	106

Чибльөг .....	107
Съыланкыв .....	107
«Вөрөдыс кытшов ме вөчи...» .....	108
«Гөсьтинеч» .....	109
Чукча.....	110
Каникулъяс.....	110
«Мортлы колө зэв бур ёрт...» .....	111
Ловъя ловъяс .....	112
«Сьолөмөй – енэжын...» .....	112
Весалөм пуртік .....	113
Варыш.....	114
Бубуля .....	114
Воклөн пыж.....	115
Му ловзян кад.....	116
Вөрса-Васа .....	117
Медводдза дзоридз.....	118

**Китыр морта грездөй  
Меным медся рай**

«Дона, муса чужан муөй...» .....	120
Кыснанъяс.....	120
«Төлыс бадьяслань пөлялө русө...» .....	121
Сьолалы сюрө .....	121
«Ме верма сетны тэныд видз...» .....	122
Шыр молитва.....	122
Зэр.....	123
Дозмөр – карта сайын .....	123
Евсей керка дін .....	123
Бипур.....	124
Ягын .....	125
Кыйсьөмсө дугөдлыны .....	126
Шыш .....	127
Сарапана кыйсысыяс.....	128
Зарни кад .....	129
Велөдісны... .....	129

«Чужаніно бөр ме келі...».....	130
Ха-ха-ха!.....	132
«Тэд муса Әжва...» .....	132
Десантник.....	133
«Абу тун да этша мый ме төда...» .....	133
Менам пур .....	134
«Ытва вөлі да саридзө кывтіс...» .....	134
Кырныш.....	135
«Быттьө сідзи-й колө...».....	135
Повтөмъяс .....	136
«Лымсө мырддисны, а зэрыс...» .....	137
Жов .....	137

**Тайө гажа парма вылыс –  
Миян муса чужанін**

«Олам-вылам Әжва йылын...».....	140
Шойна вылын .....	140
«Майбырөйыс – Әжва йылыс...» .....	141
Китай кулом .....	141
«Лапъя пеля турун...» .....	142
Вом вежысь.....	143
«Ичөтик зэв сьөла...» .....	144
Лыйөм оз повзөд?.....	145
«Ветлам, пиө, вөрө...» .....	145
Көк .....	146
«Ош мясянь бокитіджык муніс...» .....	147
Мачтөм яй .....	147
«Кывлін кө чукчильсь койтөм...» .....	148
Лапкор.....	149
«Вөрө ветла дзык быд лун...» .....	149
Уразной .....	150
Миян сыланкыв.....	150
Пуд Вась.....	151
Мича нюма май .....	153
Миян Робинзонъяс.....	153

«Абу нин зэв уна...» .....	155
Сьökыд во .....	155

**Тані майбыралö лов,  
Тані муса ставыс**

Олан гаж .....	158
Челядьдырся сёян.....	158
«Парма-вöрыс дзык аптека...» .....	159
Чери-öгурцы .....	160
«Лунвывланьын эм каштан...» .....	161
Артист.....	162
«Вöрö пыра, горша лолала...» .....	163
Жогнитöм .....	163
«Вöрын тшакъяс йöктöны...» .....	165
Вөр-ваыс дорйö .....	165
«Пыран вöрö – сьölöмшöрö...» .....	168
Водз верстямман.....	168
Юркытш.....	170
Гуяс вывті.....	170
«Курьяö кулөмъяс чөвті...» .....	171
Вөр-васö виöны .....	172
«Мöд вежон зэрыс дурö...» .....	172
Ас вöчöм тыяс.....	173
«Муса чужаніö...» .....	173
Немортъяс .....	174
«Сиктын гожöм уна йöза...» .....	175
Асьныс ыджыдъяс .....	175
«Берегын парусъяс-вонъяс...» .....	176
Лапъяпель .....	177
«Ыджыда сьöдасис ягыс...» .....	178
Комиöн оз гөгөрвоны .....	178
«Ракаясөн тыр телеантенна...» .....	179
Еджыд вир.....	180
Койт.....	181
Аддзысьлытöдз.....	181

*Литературно-художественное издание*

**ЛОДЫГИН ВАСИЛИЙ ГРИГОРЬЕВИЧ**

**БЕРЕСТЯНОЙ ЧЕРПАЧОК**

Стихи, зарисовки

*На коми языке*

Редактор В.И. Трошева  
Компьютерная вёрстка – С.И. Оверин

В книге использованы фотографии  
В.Г. Лодыгина, Н.А. Лютоева, А.В. Шебырева, В.Е. Острякова

Подписано в печать 14.08.2012. Формат 60x84<sup>1/16</sup>. Бумага офсетная  
Печать офсетная. Усл.печ.л. 11,16. Уч.-изд.л. 8,23. Тираж 1000 экз.  
Заказ №

ООО «Анбур». 167982, г. Сыктывкар, ул. К.Маркса, 229

Отпечатано в ОАО «Первая Образцовая типография»,  
филиал «Дом печати – ВЯТКА» в полном соответствии  
с качеством предоставленных материалов.

610033, г. Киров, ул. Московская, 122

Факс: (8332) 53-53-80, 62-10-36

<http://www.gipp.kirov.ru>; e-mail: [order@gipp.kirov.ru](mailto:order@gipp.kirov.ru)

ISBN 978-5-91669-075-0



9 785916 690750